

## Tuhun Nyoo Tsa Tyaa Ra Mateo

*Nyivi ra Jesucristo tsa tsicoo tsa ndi cumañi ca cacu ra*  
(Lc. 3.23-38)

<sup>1</sup> Ihya nyecú tandihí sivi nyivi ra Jesucristo tsa tsicoo tsa ndi cumañi ca cacu ra. Nyivi ra David tan nyivi ra Abraham cuv̄i tsi ra.

<sup>2</sup> Sehe ra Abraham cuv̄i tsi ra Isaac, tan sehe ra Isaac cuv̄i tsi ra Jacob. Tan sehe ra Jacob cuv̄i tsi ra Judá tsihin tandihí ra yañi ra.

<sup>3</sup> Tan ra Fares tsihin ra Zara sehe ra Judá tsihin ña Tamar cuv̄i tsi ra naha. Tan sehe ra Fares cuv̄i tsi ra Esrom, ra cuv̄i jutu ra Aram.

<sup>4</sup> Tan sehe ra Aram cuv̄i tsi ra Aminadab, jutu ra Naasón. Tan sehe ra Naasón cuv̄i tsi ra Salmón.

<sup>5</sup> Tan ra Booz, sehe ra Salmón tsihin ña Rahab cuv̄i tsi ra. Tan sehe ra Booz tsihin ña Rut cuv̄i tsi ra Ōbed, jutu ra Isaí.

<sup>6</sup> Tan ra David, ra cuv̄i rey, sehe ra Isaí cuv̄i tsi ra. Tan sehe ra rey David tsihin ñaha tsa cuv̄i ñasihí ra Urías cuv̄i tsi ra Salomón.

<sup>7</sup> Tan sehe ra Salomón cuv̄i tsi ra Roboam, ra cuv̄i jutu ra Abías. Tan sehe ra Abías cuv̄i tsi ra Aza.

<sup>8</sup> Tan sehe ra Aza cuv̄i tsi ra Josafat, ra cuv̄i jutu ra Joram. Tan sehe ra Joram cuv̄i tsi ra Uzías.

<sup>9</sup> Tan sehe ra Uzías cuv̄i tsi ra Jotam, ra cuv̄i jutu ra Acáz. Tan sehe ra Acáz cuv̄i tsi ra Ezequías.

10 Tan sehe ra Ezequías cuv̄i tsi ra Manasés, ra cuv̄i jutu ra Amón. Tan sehe ra Amón cuv̄i tsi ra Josías.

11 Tan sehe ra Josías cuv̄i tsi ra Jeconías tsihin tandih̄i ra yañi ra. Tsicoo ra naha quiv̄i t̄in ra ñuu Babilonia naha ra tsi nyiv̄i Israel, tsa cua cuhun ñi cuv̄i ñi musu ra ñuu Babilonia can naha ra.

12 Tsa yaha can, tan tsicoo sehe ra Jeconías, tan ra ican cuv̄i ra Salatiel, jutu ra Zorobabel.

13 Tan sehe ra Zorobabel cuv̄i tsi ra Abiud, ra cuv̄i jutu ra Eliaquim. Tan sehe ra Eliaquim cuv̄i tsi ra Azor.

14 Tan sehe ra Azor cuv̄i tsi ra Sadoc, ra cuv̄i jutu ra Aquim. Tan sehe ra Aquim cuv̄i tsi ra Eliud.

15 Tan sehe ra Eliud cuv̄i tsi ra Eleazar, ra cuv̄i jutu ra Matán. Tan sehe ra Matán cuv̄i tsi ra Jacob.

16 Tan ra Jacob cuv̄i jutu ra José, ȳi ña María. Juv̄in ña cuv̄i sihi ra Jesús ra cuv̄i Cristo, o cuñí tsi catyí, ra tsa jaquitsi Nyoo tyin quih̄i ndaha tsi yo.

17 Tacan tsicoo utsi cumi taahan tata ra Abraham nda cuanda cacu ra David. Tan ra David, tsicoo utsi cumi tata ra nda cuanda quiv̄i t̄in ra ñuu Babilonia naha ra tsi nyiv̄i Israel. Tan nda cuanda quiv̄i can tsicoo utsi cumi ca tata ñi nda cuanda quiv̄i cacu ra Cristo.

*Nu cacu ra Jesucristo*  
(Lc. 2.1-7)

18 Tyehen cuv̄i tan cacu ra Jesucristo: tsa yaha cundaa tyiñu tsa cua tindaha ña María tsihin ra José. Tan tsa ndi cumañi ca naquihin ra tsi ña, ñih̄i sehe ña tsa cuenda Tatyí Ii Nyoo.

19 Tan ra José, ra cua cuv̄i ȳi ña, vaha xaan iñi ra. Ña cuñí ra cuhva ra ticanuu tsi ña. Yacan cuenda

tsica iñi ra tsa nacoo xeehe ra tsi ña tan ña cua tindaha ca ra tsihin ña.

<sup>20</sup> Tan tsitsi tsa tsicá iñi ra yacan, quituv̄i iin ángel Jutu Mañi yo nuu ra nu quixí ra. Tan nyehe ra ñumaahna, tan catyí ángel can tsihin ra:

—José, tata ra David, ña caça iñi un quihin un tsi ña María cuvi ña ñasih̄i un, tyin sehe ña tsa cua cacu, sehe Tatyí li Nyoo cuví tsi.

<sup>21</sup> Tan tsa yaha cacu lee can, cua jacunañi un tsi ra: Jesús. Tacan cua cunañi ra tyin cua jacacu ra tsi nyiv̄i ra tsa iyó cuatyí ñuu ñayiv̄i —catyí ángel can tsihin ra José.

<sup>22</sup> Tacan cuv̄i tyin tacan tan cundaa tsa cahan ra cuv̄i ndusu yuhu Jutu Mañi yo tahan tsanaha.

<sup>23</sup> Tan catȳi ra tyehen:

Ñaha yoco tsa ñaha ca coo ȳi, cua cuhun sehe ña.

Tan cua coo iin sehe ña. Tan cua cunañi ra: Emanuel.

Tan siv̄i can cuñí tsi catyí: “Nyoo iyó ra tsihin yo.”

<sup>24</sup> Tan tsa ndotō ra José, javah̄a ra tumaa catȳi ángel can tsihin ra. Quihin ra tsi ña María tyin cuvi ña ñasih̄i ra.

<sup>25</sup> Maa tyin ña quix̄i ra tsihin ña nda cuanda tsa yah̄a cacūi sehe ña. Tan jacunañi ra tsi lee can: Jesús.

## 2

*Nu cuahán ra tsitó xaan, ra cuví rey, cua nyehe ra naha nu cacūi ra Jesús*

<sup>1</sup> Cacū ra Jesús ñuu Belén tsa canyíi nu cuví Judea. Tan quiv̄i can ra cuví rey Judea nañí ra Herodes. Tacan tan tsaḡ juhva ra naha nda ñuu

Jerusalén. Quee ra naha ityi nu caná ñicanyii. Tan ra tsitó xaan cuví ra naha.

<sup>2</sup> Tsicā tuhun ra naha tsi nyivi tan catyí ra naha:

—¿Nu maa nyíí ra cuví rey cuenda nyivi Israel?

Tyin ityi nu caná ñicanyii nyehē ndi tiñuu tsa tsahá cuenda tyin cacu ra ityi ihya. Tan vatsí ndi vatsí jacahnu ndi tsi ra —catyí ra naha.

<sup>3</sup> Quivi tsa tsitō ra rey Herodes tsa cahan ra can naha ra, tuñu xaan cuñí ra cuví. Tacan tucu tandihí nyivi ñuu Jerusalén can.

<sup>4</sup> Tacan tan canā ra Herodes tsi tandihí ra jutu tsa cuví ityi nuu tsihin ra cuví jutu tan tsihin tandihí ra cuví maestro cuenda ley vehe ñuhu naha ra. Tan tsicā tuhun ra tsi ra naha numaa nda taahán tsi cacu ra Cristo.

<sup>5</sup> Tan nacahan ra can naha ra tan catyí ra naha:

—Ñuu Belén tsa canyií Judea, ndacan taahán tsi cacu ra tyin tyehen tyaā ra cuví ndusu yuhu Nyoo nu tutu tahān tsanaha:

<sup>6</sup> Tan yooho Belén ñavin iin ñuu luhlu ñi cuví un tsa nuu tandihí maa ñuu tsa cayucú Judá tyin nuu yooho cua quita ra cua quihi ndaha tsi nyivi ñuu yu Israel. Maa ra cua jaha cuenda ra tsi ñi.

Tacan catyí nu tutu Nyoo, —catyí ra can naha ra tsihin ra Herodes.

<sup>7</sup> Tacan tan canā xeehe ra Herodes tsi ra tsitó xaan can naha ra, tan tsicā tuhun ra tsi ra naha náa quivi tan náa hora quituvī tiñuu can.

<sup>8</sup> Tacan tan jacuhun ra tsi ra naha nda ñuu Belén, tan catyí ra tsihin ra naha:

—Cuaahan ndo, tan ndaca tuhun vaha ndo tsa cuenda ra lee can. Tatun nañihi ndo tsi ra, quitsi catyi tuhun ndo tsihin yu, tyin cuhun ndihí yu

cujacahnu yu tsi ra —catyí ra Herodes tsihin ra naha.

<sup>9</sup> Tsa tsiñi ra tsa tsitó xaan can naha ra tsa cahan ra Herodes, tan quihin ra naha ityi cuahán ra naha. Tan tiñuu tsa nyehe ra naha ityi nu caná ñicanyii can, cuahán tsi ityi nuu ra naha. Tan tsicuiñi tsi maa maa siqui nu canyií ra lee can.

<sup>10</sup> Tan tsa nyehe ra tsitó xaan can naha ra tyin tsicuiñi tiñuu can, si xaan cuñi ra naha.

<sup>11</sup> Tan quihvi ra naha tsitsi vehe nu canyií lee can. Tan nyehe ra naha tsi ra tsihin ña María, sihi ra. Tan tsicuiñi tsiti ra naha tyin jacahnu ra naha tsi lee can. Tacan tan nuña ra naha yuhu caja tsa ndahá ra naha. Tan tavá ra naha regalo tsa cuví xuhun cuaan, tan cutu vixi, tan ndutya tami tsa nañi mirra. Tan tsaha ra naha tsi lee can.

<sup>12</sup> Tsa yaha tsa nyehe ra naha tsi ra Jesús tan cuanuhu ra naha. Tan tsa cuanuhu ra naha nyehe ra naha ñumaahna tan catyí tsi tyin ña taahán tsi cuhun ra naha cucatyí tuhun ra naha tsihin ra Herodes. Yacan cuenda sin ityi cuanuhu ra naha.

*Nu tsinu xeehe ra José tan ña María tsihin lee she ñi nda Egipto*

<sup>13</sup> Tsa yaha cuahán ra tsa tsitó xaan can naha ra, tacan tan iin ángel Jutu Mañi yo quituvi nuu ra José tsitsi ñumaahna. Tan catyí ángel can tsihin ra:

—Nduvita, quihin tsi lee ihya, tsihin sihi ra, tan cuhun ndo nda ñuhu Egipto. Ndo ndo ndacan nda cuanda cahan nyico yu tsihin un. Tyin ra Herodes cua nanducu ra tsi ra lee ihya tyin cuñi ra cahni ra tsi ra —catyí ángel can tsihin ra José.

<sup>14</sup> Tacan tan nduvit̄a ra José tsacuaa can. Tan quih̄in ra tsi lee can tsihin sihi tsi. Tan cuahán ñi nda Egipto.

<sup>15</sup> Ndacan tsicoo ñi nda cuanda tsa tsihi ra Herodes. Tacan cuv̄i tyin cundaa tsa cah̄an ra cuv̄i ndusu yuhu Jutu Mañi yo tah̄an tsanaha jah̄a Nyoo. Tyehen catȳi ra: “Nda Egipto cana yu tsi Sehe yu”, catȳi ra.

*Nu tava tyiñu ra Herodes na cah̄ni ra naha tsi ra nyihi*

<sup>16</sup> [Tsa ndi cumañi ca cúu ra Herodes tan ndi ndatú ra tsa quitsi nyico ra tsitó xaan can naha ra] tan tsa tuv̄i ñi ra Herodes tyin ra tsitó xaan can naha ra jandav̄i ñaha ra naha tsi ra, tan nduxaan xaan ra. Tan tava tyiñu ra na cah̄ni andaru tsi tandihi ra nyihi tsa iyó ñuu Belén can tan inga ñuu tsa cayucú yatyin ñi, ra nyihi tsa ndi cacu nda cuanda ra nyihi tsa uvi cuiya. Tacan javah̄a ra tyin tsicá ñi ra tyin tacan cuiya ra Jesús tumaa catȳi ra tsitó xaan can naha ra tsihin ra.

<sup>17</sup> Tacan cuv̄i tyin cundaa tsa cah̄an Nyoo tan tyaa ra Jeremías, ra cuv̄i ndusu yuhu ra tah̄an tsanaha. Tyaa ra tyehen:

<sup>18</sup> Tsiñi yo iin ndusu ñuu Ramá, tsacú tsa nyivi, tan iyo taahán ñi.

Juvin ñi nyivi cuv̄i tata ña Raquel, nyivi Israel, tsacú tsa ñi tsa cuenda sehe ñi.

Maa tyin ña cuñi ñi tsa naquihin ndaahvi nyivi tsi ñi tyin tsa yah̄a tsihi sehe ñi, catȳi tsi nu tutu Nyoo.

<sup>19</sup> Maa tyin tsa yah̄a tsa tsihi ra Herodes, tacan tan quituv̄i nyico iin ángel Jutu Mañi yo nuu ra José nu quixí ra nda Egipto. Tan catȳi ra tsihin ra:

<sup>20</sup> —Nduvita, quihin tsi lee ihya tsihin sihi ra. Tan cunuhu nyico ndo nda Israel, tyin tsa tsihi nyivi nducu cahni tsi ra lee ihya.

<sup>21</sup> Tacan tan nduvita ra José, tan quihin ra tsi lee can tan tsihin sihi ra. Tan cuanuhu ni nda Israel.

<sup>22</sup> Maa tyin quivi tsito ra José tyin ra Arquelao, sehe ra Herodes, cuvi ra rey nda Judea, nayuhvi ra tan na cuñi ra cahun ra ndacan. Tan cuanuhu ni nda Galilea tyin tacan jacoto Nyoo tsi ra tsitsi ñumaahna.

<sup>23</sup> Tsa tsaá ni ican, tan cuahán ni nda ñuu Nazaret, cua coo ni. Tan ican tsicoo ni. Tacan cuvi tyin cundaa tsa cahan ra cuvi ndusu yuhu Nyoo tahañ tsanaha. Tyin catyi ra naha tyin ra Jesús ra ñuu Nazaret cua cuvi ra.

### 3

*Nu cahan ra Juan tuhun Nyoo tsihin nyivi  
(Mt. 1.1-8; Lc. 3.1-9, 15-17; Jn. 1.19-28)*

<sup>1</sup> Quivi tsa ndi iyó ni ñuu Nazaret, ra Juan, ra jacoondutyá tsi nyivi, cuahán ra nu tsiqui tsa iyó Judea. Tan quitsaha caahán ra tuhun Nyoo tsihin nyivi tsa tsaá nu nyii ra.

<sup>2</sup> Tan catyi ra:

—Ndu uvi ini ndo cuatyí ndo tyin tsa cuñi tsa quivi cundaca ñaha Nyoo tsi yo.

<sup>3</sup> Juvín ra Juan cuvi ra tsa cahan ra Isaías ra cuvi ndusu yuhu Nyoo tahañ tsanaha. Tan tyaa ra tsa tsañ Nyoo tsi ra tyehen:

Cua tyaa soho yo ndusu ra nu caná tsa ra nu tsiqui tan catyi ra:

“Nuña ndo iin ityi cuiti.

Tan natyiso vaha ndo tsi ndo tyin tsa vatsi Jutu Mañi yo,” catyí tuhun tsa tyaá ra Isaías.

<sup>4</sup> Tan ra Juan nditsí ra jahma tsinu tsihin ixi camellu. Tan cinturón ra, ñi cuví tsi. Tan tica xama tsatsí ra tan tsihí ra ndutya ñuñu.

<sup>5</sup> Quitsi nyivi ñuu Jerusalén tan tandihí ñuu tsa cayucú Judea, tan nyivi tsa iyó yatyin ñi ityi yutya cahnu Jordán can; quitsi tyaá soho ñi tuhun caahán ra.

<sup>6</sup> Tan tsa yaha nahma ñi cuatyí ñi, ra Juan jacoondutya ra tsi ñi yutya cahnu Jordán ican.

<sup>7</sup> Maa tyin nyehe ra Juan tyin cuaha xaan ra fariseo, ra tsa tyaá yahvi xaan ley vehe ñuhu, tan cuaha xaan ra saduceo, quitsi ra naha tyin coondutya ra naha. Tan catyí ra tsihin ra naha:

—¡Nyooho, tumaa tata coo xaan cuví ndo! ¿A cuñí maa ndo tyin tsihin tsa coondutya ñi ndo tan ña cua tatsi tuñi ca Nyoo tsi ndo? Ña cuví.

<sup>8</sup> Nasama ndo cuhva iyó ndo, na nyehe yo tyin tsa ndu uví iñi ndo cuatyí ndo nuu Nyoo.

<sup>9</sup> Maa tyin ña nduyaa ndo tan catyí ndo tyin nyivi tata ra Abraham cuví ndo. Tyin vasu tsihin yuu ihya, Nyoo cuví jananduvi ra nyivi ra Abraham.

<sup>10</sup> Tsa ndatú yatsa Nyoo tsi tandihí ndo tsa cuví ndo tumaa yutun tsa ña tsahá tsiti vaha. Cua tyahnya tun tan cua cayu tun, tacan cua javaha Nyoo tsihin ndo —catyí ra Juan—.

<sup>11</sup> Tsa nditsa tyin yuhu jacoondutyá yu tsi nyivi tsihin ndutya, tan cuví tsi iin seña tyin tsa ndu uví iñi ñi cuatyí ñi. Maa tyin tsa yaha jacoondutya yu tsi ñi tsihin ndutya, vatsí inga ra cua jacoondutya tsi ñi tsihin Tatyí Ii Nyoo tan tsihin ñuhu ihñi. Iyó ca tunyee iñi Nyoo tsi maa ra tan ñavin ca yuhu.



Tan ndi tsa cuiso yu nditsan ra tan nduve yahvi nyaá yu, tyin maa ra cahnu ca cuví ra.

<sup>12</sup> Tan ra ican ndahá ra pala tyin cua jandava ra trigu. Cua tava s̄in ra trigu vaha, tan cua natyihi vaha ra itsi. Tan cua cahmi ra tsahan tsa quita tsihin trigu can tsihin ñuh̄u tsa ña cua ndahva maa —catyí ra Juan.

*Nu tsicoondutyā ra Jesús*

*(Mr. 1.9-11; Lc. 3.21-22)*

<sup>13</sup> Tacan tan quita ra Jesús Galilea tan tsaā ra yutya cahnu Jordán nu nyí ra Juan, tyin cuñí ra tsa jacoondutyā ra Juan tsi ra.

<sup>14</sup> Tsa jihna ñi ña cuñí ra Juan jacoondutyā ra tsi ra, tan quitsahā catyí ra tsihin ra:

—Cuñí un tsa jacoondutyā yu tsi un, maa tyin ña taahán tsi tsa jacoondutyā yu tsi un. Maa un taahán tsi jacoondutyā tsi yu —catyí ra.

<sup>15</sup> Maa tyin ra Jesús catyí ra tsihin ra:

—Tsa vityin, na cuvi tsi cuhva catyí yu tsihin un. Tyin cuñí tsi tsa javaha yo tandih̄i tsa vaha tsa cuñí Nyoo —catyí ra tsihin ra Juan.

Tacan tan ndoo ra Juan vaha.

<sup>16</sup> Tsa yahā tsicoondutyā ra Jesús tan quita ra tsitsi ndutyā. Tan nuñā andiv̄i, tan ra Jesús nyehe ra vatsí nuú Tatyí Ii Nyoo, tumaa iin paloma. Tan tsaā tsi siqūi ra.

<sup>17</sup> Tacan tan cahān iin ndusu ityi andiv̄i, tan catyí tsi tyehen:

—Ra ihya cuví Sehe yu, tan cuñí xaan yu tsi ra. Tan s̄i xaan cuñí yu tsihin ra —catyí ndusu can.

## 4

*Nu nducu cuhva nu ña vaha tsi ra Jesús  
(Mr. 1.12-13; Lc. 4.1-13)*

<sup>1</sup> Tacan tan tsindac̄a Tatyí Ii Nyoo tsi ra Jesús iin nu tsiquí, tyin cua nducu cuhva nu ña vaha tsi ra.

<sup>2</sup> Tsicoo nyitya ra uvi xico nduvi tan uvi xico tsacuaa. Tsa yah̄a can tan quits̄i socó tsi ra.

<sup>3</sup> Tacan tan natuhv̄a nu ña vaha nu nyaá ra, tyin cuñí nu nducu cuhva nu tsi ra. Tan catyí nu tsihin ra:

—Tatun Sehe Nyoo cuví tsi un, cahan tsihin yuu ihya, na nanduvi tsi paan —catyí nu ña vaha tsihin ra Jesús.

<sup>4</sup> Maa tyin ra Jesús nacahan ra tan catyí ra:

—Tuhun Nyoo tsa nyaá nu tutu catyí tsi tyin: “Ña maa ñi tsihin tsa catsi nyivi tan coonyito ñi, tyin coonyito ñi tsihin tandih̄i tuhun caahán Nyoo” —catyí ra Jesús tsihin nu ña vaha.

<sup>5</sup> Tacan tan quih̄in nu ña vaha tsi ra. Tan cuahán ra tsihin nu nda ñuu ii Jerusalén. Tan jandāa nu tsi ra jiñi vehe ñuhu cahnu.

<sup>6</sup> Tan catyí nu tsihin ra:

—Tatun Sehe Nyoo cuví tsi un, ndava nu nyaá un nu sucun ihya nda cuando nu ñuhu. Tyin catyí tsi nuu tutu Nyoo tyehen:

Nyoo cua tava tyiñu ra tsi ángel naha ra, cua jaha cuenda ra naha tsi un.

Cua janahndi ra naha tsi un,

tan ña cua nañi tsaha un nuu yuu.

<sup>7</sup> Tan nacahan ra Jesús tan catyí ra:

—Tan juven ñi catyí tuhun Nyoo: “Ñã nducu cuhva un tsi Nyoo un” —catyí ra Jesús tsihin nu ña vaha.

<sup>8</sup> Tacan tan quihin nu ña vaha tsi ra inga tsaha, tan cuahán ra tsihin nu iin jiñi yucu sucun. Tan janaha nu tandihí tsa cahnu cuví nu ndacá ñaha rey tan ra cumí tyiñu naha ra tsi nyivi iyó nu ñuhu ñayivi.

<sup>9</sup> Tan catyí nu tsihin ra:

—Yuhu cuhva yu tandihí maa tsa janaha yu tsi un, tatun yooho tan cuiñi tsiti un nuu yu tan jacahnu un tsi yu.

<sup>10</sup> Tacan tan nacahan ra Jesús tan catyí ra tsihin nu:

—Cuaahan, cuihna. Tyin nyaá tuhun Nyoo catyí: “Jacahnu tsi intuhun ñi maa Jutu Nyoo, tan jaha tyiñu tyiñu ra.”

<sup>11</sup> Tacan tan cuahán nu ña vaha, tan ndoo ra Jesús. Tan tsaá ángel tan jatyinyee ra naha tsi ra.

*Nu quitsaha caahán ra Jesús tuhun Nyoo tsihin nyivi tsa iyó ñuu tsa cayucú Galilea*

*(Mr. 1.14-15; Lc. 4.14-15)*

<sup>12</sup> Quivi tsa tsito ra Jesús tyin ra Juan nyii ra vehe caa, cuahán ra nda Galilea.

<sup>13</sup> Maa tyin ña ndoo ra ñuu Nazaret, nu tsahnu ra. Cuahán ra cua coo ra nda ñuu Capernaum, iin ñuu tsa canyii yatyin ñi yuhu miñi, nu ñuhu ra Neftalí yatyin ñuhu ra Zabulón.

<sup>14</sup> Tacan tan cundaá tsa cahan ra Isaías, ra cuví ndusu yuhu Nyoo, tahañ tsanaha. Tan catyí ra:

<sup>15</sup> Ñuhu ra Zabulón tan ñuhu ra Neftalí tsa cayucú yuhu miñi inga tsiyo yutya cahnu Jordán,

tsa cuví Galilea nu iyó nyívi tsa ñavin nyívi Israel cuví.

16 Nyívi iyó nu naa, ñi iyó nu iyó tixahñu tuhun tsihi,  
nyehé ñi iin ñuhu nditsin tsa jandunditsín nu yucú ñi, catyí ra Isaías.

17 Nda cuanda quívi can, tan quitsaha caahán ra Jesús tuhun Nyoo tsihin nyívi, tan catyí ra tsihin ñi:  
—Ndu uvi ñni ndo cuatyí ndo tyin tsa cuñí tsa quívi cundaca ñaha Nyoo tsi ndo —catyí ra Jesús tsihin nyívi.

*Nu cana ra Jesús tsi cumi taahan ra tsa tñn tyaca  
(Mr. 1.16-20; Lc. 5.1-11)*

18 Ra Jesús tsicá ra yuhu miñi tsa nañí Nduya Ñuhu Galilea. Tan nyehe ra tsi uvi taahan ra tsihin yañi ra, ra Simón tsa nañí tucu Pedro, tan ra Andrés. Ra tñn tyaca cuví ra naha. Tan cañí ra naha traya ra naha nu ndutya.

19 Tacan tan catyí ra Jesús tsihin nduvi taahan ra naha:

—Naha ndo, quitsi nyicun ndo tsi yu. Tan yuhu cua jatyinyee tsi ndo tyin tumaa tsa tñn ndo tyaca, tacan cua ñihi ndo nyívi cua cuví nyívi Nyoo —catyí ra Jesús tsihin ra naha.

20 Juvín ñi cuhva can nacoo ra naha traya can, tan cuahán ra naha tsihin ra Jesús.

21 Luxu ñi tsicá ra naha ityi nuu, tan nyehe ra Jesús tsi inga uvi ca ra tsihin yañi ra: ra Jacobo tan ra Juan. Sehe ra Zebedeo cuví tsi ra naha. Yucú ra naha tsitsi iin yutun ndoo tsihin jutu ra naha naquicú ra naha traya. Tan cana ra Jesús tsi ra naha.

<sup>22</sup> Juvín ñi cuhva can tan nacoꝝ ra naha tsi jutu ra naha tan yutun ndoo can, tan cuahán ra naha tsihin ra.

*Nu cuaha xaan nyívi jacuahá ra Jesús  
(Lc. 6.17-19)*

<sup>23</sup> Cuahán ra Jesús tsicá ra tandíhi ñuu cuenda Galilea jacuahá ra tsi nyívi tsitsi vehe ñuhu tan iin tan iin ñuu. Caahán ra tuhun vaha nácaa ndacá ñaha Nyoo tsi yo. Tan janduvahá ra tsi nyívi cuuhví tsihin tandíhi ñi nuu cuehe tsa yíhí tsi ñi.

<sup>24</sup> Tacan tan tsitoꝝ tandíhi nyívi ñuu cuenda Siria tuhun ra Jesús. Tan tsindacá ñi tandíhi nyívi cuuhví tsi ra: juhva ñi yíhí tatyí ña vaha. Tan yíhí ñi tsihí naaha ñi. Tan yíhí ñi ndohó ñi cuehe xii. Tan janduvahá ra Jesús tsi tandíhi ñi.

<sup>25</sup> Cuaha xaan nyívi nyicún tsi ra Jesús: nyívi iyó ñuu tsa cayucú Galilea, nyívi tsa quee nu utsi taahan ñuu tsa nañí Decápolis, nyívi iyó ñuu Jerusalén tan tandíhi ca ñuu tsa cayucú Judea, tan nyívi iyó inga tsiyo yutya cahnu Jordán.

## 5

*Nu cahan ra Jesús tsihin nyívi nu tsiqui  
(Lc. 6.20-23)*

<sup>1</sup> Nyehe ra Jesús tyin cuaha xaan nyívi, tan ndaa ra iin nuu yucu. Tan tsicunyaá ra ican. Tacan tan nyívi tsicá tsihin ra, tsinunduví ñi tsi ra.

<sup>2</sup> Tacan tan quitsahá jacuahá ra tsi ñi tan catyí ra:

<sup>3</sup> Nasocó Nyoo tsi tandíhi nyívi tsa tsitó tyin tsiñí ñuhu ra tsi ñi, tan tsa cuenda ñi cuví nu ndacá ñaha ra.

<sup>4</sup> 'Tan tandihí nyívi tsa cuiihya cuñí tsa cuenda cuatyí ñi, nasocó Nyoo tsi ñi tan ña cua coo ca ñi tucuiihya iñi.

<sup>5</sup> 'Tan tandihí nyívi tsa ña cahnu jahá ñi tsi ñi, nasocó Nyoo tsi ñi, tan cua naquihin cuenda ñi ñuhu ñayívi tsa catyí Nyoo tyin cuhva ra tsi ñi.

<sup>6</sup> 'Tan tandihí nyívi tsa cuñí xaan javaha cuhva catyí Nyoo, nasocó Nyoo tsi ñi, tan cua jatyinyee ra tsi ñi tan cua cuvi javaha ñi cuhva cuñí maa ra.

<sup>7</sup> 'Tan tandihí nyívi tsa cundaahví iñi tsi inga nyívi, nasocó Nyoo tsi ñi, tan cua cundaahvi iñi ra tsi ñi.

<sup>8</sup> 'Tan tandihí nyívi tsa janduvaha Nyoo aña, nasocó ra tsi ñi, tan cua nyehe ñi tsi ra.

<sup>9</sup> 'Tan nyívi tsa nducú cuhva tsa coo vaha nyívi tsihin Nyoo tan tsihin inga nyívi, nasocó ra tsi ñi tan cua catyi ra tyin sehe ra cuví tsi ñi.

<sup>10</sup> 'Tan tandihí nyívi tsa javahá cuhva cuñí Nyoo tan ndasi cuñí nyívi nyehe ñi tsi ñi, nasocó Nyoo tsi ñi, tan tsa cuenda ñi cuví nu ndacá ñaha ra.

<sup>11</sup> 'Nasocó Nyoo tsi nyooho tsa caahán nyívi ndavaha ñi tsata, tan javahá ñi tsa uhvi tsi ndo, tan caahán ñi cuendu tsa ña nditsa siqui ndo tsa cuenda tsa tsinú iñi ndo tsi yu.

<sup>12</sup> Cusii iñi ndo tun tacan javahá nyívi tsihin ndo; sii cuñi ndo, tyin cahnu xaan tan sii xaan caá tsa cua ñihi ndo nda gloria. Tyin juven ñi tacan javaha nyívi tsa ña vaha tsihin tandihí ra cuví ndusu yuhu Nyoo tañan tsanaha.

*Tatun jandihí yo tsa tsinú iñi yo tsi Nyoo cuví yo tumaa ñi tsa ndihí tsa uhva  
(Mr. 9.50; Lc. 14.34-35)*

13 'Nyooho tsa tsinú iñi tsi yu, tumaa ñii vaha cuví ndo. Maa tyin tatun ñii, tan ndihí tsa uhva tsi, ña cua jandu uhva ca tsi tsa catsi yo. Ña vaha ca ñii can. Tacan tan javita yo can, tan cuañi nyivi tsata can.

*Tatun tyaá yahvi vaha yo tuhun caahán Nyoo, cuví yo tumaa ñuhú tsa jandunditsín nu tsicá nyivi nu naa*

14 'Nyooho cuví ndo tumaa ñuhú tsa jandunditsín nu tsicá nyivi. Iin ñuu tsa canyíi jiñi iin yucu, ña cua cuví quihí xeehe tsi.

15 Ña tuhvá yo tyaá ñuhú tyuma, tan tyihí xeehe yo itsi tsitsi iin caja. Tyin tuhvá yo tyaá ñuhú tan tinyíi yo itsi iin nu sucun tyin tacan tan jandunditsin tsi nu yucú yo tsitsi vehe yo.

16 Tan tacan taahán tsi jandunditsin tucu nyooho tsihin ñuhú Nyoo tsa iyó aña ndo nu tsicá nyivi. Tacan tan nyehe ñi tsa vaha tsa javahá ndo, tan jacahnu ñi tsi Jutu yo Nyoo, ra nyaá gloria.

*Nu jacuahá ra Jesús tyin ñiñi xaan javaha yo tandihí tuhun tsa tsahá Nyoo tsi yo tan jacuahá yo itsi tsi nyivi*

17 'Ña cuñi ndo tyin yuhu vatsí janaa yu ley tsa tsahá Nyoo tsi ra Moisés tyin tyaa ra. Tan ndi ña vatsí janaa yu tuhun tsa tyaa tandihí ra cuví ndusu yuhu Nyoo tahán tsanaha. Ñavin tyiñu can vatsí yu. Yuhu vatsí yu vatsí tyaa yahvi yu tsa caahán ley can, tan catyí tuhun yu tsihin ndo náa cuñi tsi catyí ley can.

18 Tsa nditsa catyí yu tsihin ndo tyin tsitsi tsa ndi iyó ñuhu ñayivi tan andivi, ña cua naa ndi luxu ley

tsa tyaá ra Moisés tyin tandihí maa tsa tyaá ra naha tan cua cundaa tsi.

<sup>19</sup> Yacan cuenda, ra tsa ña tyaá yahvi cuhva catyí Nyoo, vasu iin tsa luhlu ñi; tan janahá ra tsi nyívi na javaha ñi tacan, luxu cuii ñi cua cuvi ra nu ndacá ñaha Nyoo. Maa tyin ra tsa tyaá yahvi tandihí, tan janahá ra tsi inga nyívi, cahnu xaan cua cuvi ra nu ndacá ñaha Nyoo.

<sup>20</sup> Catyí yu tsihin ndo tyin tun ña tyaá yahvi vaha ca ndo tsi Nyoo tan ñavin ca tumaa javahá ra cuví maestro cuenda ley vehe ñuhu naha ra, tan ra cuví fariseo naha ra, ña cuvi quihvi ndo nu ndacá ñaha Nyoo.

*Nu caahán ra Jesús tsihin yo tyin ña taahán tsi cahan yo tsi nyívi*

<sup>21</sup> 'Nyooho tsa cuaha tsaha tsiñi ndo tsa catyí Nyoo tsihin nyívi tsicoo tahan tsanaha. Catyí ra: “Ña cahñi ndo tsi nyívi, tyin tatun cahñi ndo nyívi, taahán tsi tsa cutuñi ndo.”

<sup>22</sup> Maa tyin yuhu, catyí yu tsihin ndo, tyin vasu tsa cuxaán ñi ndo tsi iin nyívi, vasu tsa caahán nyaa ñi ndo tsi ñi, taahán tsi tsa cutuñi ndo nu ra cumi tyiñu. Tan tatun catyí ndo tyin soho xaan caá ñi, taahán tsi cuhun ndo anyaya tsa cuenda cuatyí can.

<sup>23</sup> Tan yacan cuenda quívi cuahán un vehe ñuhu, tan ndahá un tsa cua jamañi un tsi Nyoo, tan nducuhún iñi un tyin iyó tsa javahá un tsi yañi un,

<sup>24</sup> ñacoo tsa cuahán tsihin un ityi nu altar vehe ñuhu. Tan cuhun jihna un ndacan un tucahnu iñi tsi yañi un. Tacan tan cuhun un nda vehe ñuhu inga tsaha, tan cuhva cuenda un tsa cua jamañi un tsi Nyoo.



<sup>25</sup> Tatun iin ra tsicán cuatyi tsaha un, tan cuahán un tsihin ra nda nu nyaá ra cumí tyiñu, nducu cuhva cahan un tsihin ra tyin tacan tan ña cundaca ra tsi un nu nyaá ra cumí tyiñu, tyin ra cumí tyiñu can cua nacuhva cuenda ra tsi un tsi ra juez. Tan ra juez can cua nacuhva cuenda ra tsi un tsi ra vitya naha ra. Tan ra vitya can cua tyihi ra naha tsi un vehe caa.

<sup>26</sup> Tan tsa nditsa catyí yu tsihin un tyin tun ña javaha un tacan ña cua tava ra naha tsi un vehe caa tun ña cua tyahvi un tandihí xuhun tsa cua ndacan ra naha.

*Nu caahán ra Jesús tyin ndi tsa tsicá iñi yo tsa coo inga ñaha, o inga rayi tsi yo, tan ña vaha*

<sup>27</sup> Nyooho tsa tsiñi ndo tyin catyi Nyoo tahañ tsanaha tyin nyooho tsa iyó ñasihi, ña cua coo inga ñaha tsi ndo, tan ndi ñaha tsa iyó yi tan ña taahán tsi coo inga rayi tsi ña.

<sup>28</sup> Maa tyin yuhu catyí yu tsihin ndo, nyooho tsa nyehé iin ñaha tan cuñi ndo coo ndo tsihin ña, tsa tsicoo cuatyi ndo.

<sup>29</sup> Tatun tinuu cuaha un janacavá tsi un tsitsi cuatyi, vaha taxin ca tava un tinuu un tan javita un can. Tyin vaha ca quihvi un nu ndacá ñaha Nyoo tsihin intuhun ñi tinuu un, tan ñavin ca tsa cahun un anyaya tsihin nduvi taahan tsi.

<sup>30</sup> O tatun iin ndaha un janacavá tsi un tsitsi cuatyi, vaha taxin ca cahnya un ndaha un tan javita un can. Tyin vaha ca tsa quihvi un nu ndacá ñaha Nyoo tsihin tsa lundu ndaha un, tan ñavin ca tsa nan un tan cahun un anyaya.

*Nu caahán ra Jesús tyin ña vaha tsa nacoo ihñi rayi tsi ñasiihi ra*

*(Mt. 19.9; Mr. 10.11-12; Lc. 16.18)*

<sup>31</sup> Tan juvin ñi catyi Nyoo tsihin nyivi tsicoo tahan tsanaha tyin yoo ra nacoo ihñi ñasiihi ra, cuñi tsi tsa cani ra tutu tsa tindaha ra tsihin ña.

<sup>32</sup> Maa tyin catyi yu tsihin ndo tyin nduve ndatu iyó tsi rayi tsa nacoo ra ñasiihi ra tatun ña quituvi ña tsihin inga rayi. Tyin tatun nacoo ra tsi ña, tan ñavin tsa cuenda cuatyí can, cua coo cuatyí ra nuu Nyoo. Tan tatun quihin ña inga rayi cua coo ndihi cuatyí ña. Tan tacan ra tsa cua quihin tsi ña cua coo ndihi cuatyí ra.

*Ña cahan yo “naha Nyoo maa”*

<sup>33</sup> Tan tsiñi ndihi ndo, tyin catyi tucu Nyoo tsihin nyivi tsicoo tahan tsanaha: “Tatun catyi ndo ‘naha Nyoo maa’ tyin cua javaha ndo iin tsa cua javaha ndo nuu ra, taahán tsi tsa javaha ndo can tan ña jandavi ñaha ndo.”

<sup>34</sup> Maa tyin yuhu catyi yu tsihin ndo tyin ña cahan ndo “naha Nyoo maa”. Tan ña cahan ndo tuhun andivi, tyin yacan cuvi nu nyaá Nyoo.

<sup>35</sup> Tan ndi tuhun ñuhu ñayivi ihya ña cahan ndo, tyin ihya cuvi nu tsañi Nyoo. Tan ndi ña cahan ndo tuhun ñuu Jerusalén, tyin ican cuvi ñuu maa Nyoo tsa cuvi ra Rey cahnu ca.

<sup>36</sup> Tan ndi ña cahan ndo tuhun jiñi ndo, tyin ña cuvi janducuitsin ndo tan ndi tsa jandutuun ndo ndi intuhun ixi jiñi ndo.

<sup>37</sup> Vaha ca cahan ndo iin ndaha ñi tun nditsa o tun ña nditsa tsa caahán ndo. Tyin tsa catyi ndo

“naha Nyoo maa” nu ña vaha jacahán tsi ndo tsa cahan ndo tacan.

*Nu caahán ra Jesús tyin tatun javahá nyivi tsa ña vaha tsihin yo, na javaha yo tsa vaha tsihin ñi*

*(Lc. 6.29-30)*

<sup>38</sup> Tan tsiñi tucu ndo tsa catyi Nyoo tañan tsanaha: “Tatun cañi nyivi tsi ndo, tan tavá ñi iin nuhu ndo, o iin tinuu ndo, taahán tsi tyin javaha ndihi ra cumi tyiñu tacan tsihin ñi, tumaa tsa javaha ñi tsihin ndo.”

<sup>39</sup> Maa tyin yuhu catyi yu tsihin ndo, tyin ña javaha ndo tsa ña vaha tsa javahá nyivi xaan cuñi nyehe tsi ndo. Tyin tun yóo cañi iin tsiyo nuu ndo, taahán tsi tsa cuhva ndihi ndo inga tsiyo na cañi ndihi ñi, tan ña cuxaan ndo tsi ñi.

<sup>40</sup> O tatun tsicán ñi cuatyí tsaha ndo, tan cuñi ñi quihin nyaa ñi iin camisa ndo. Taahán tsi cuhva ndihi ndo chamarra ndo tsi ñi tan ña cua cuxaan ndo tsi ñi.

<sup>41</sup> O tatun yóo cuñi cundaca ndo ndaha tyiñu ñi iin kilómetro, taahán tsi cundaca ndo can uvi kilómetro.

<sup>42</sup> Tatun yóo nyivi tsicán tumañi iñi tsi ndo, cuhva ndo tsa nducu ñi. Ña catyi ndo tyin ña javaha ndo tumañi iñi can tsi ñi.

*Na cuñi yo tsi nyivi xaan iñi tsi yo*

*(Lc. 6.27-28, 32-36)*

<sup>43</sup> Tan tsiñi tucu ndo tyin catyi Nyoo tañan tsanaha: “cuñi ndo tsi ra vaha iñi tsi ndo. Tan xaan cuñi ndo nyehe ndo tsi ra xaan iñi tsi ndo.”

<sup>44</sup> Maa tyin yuhu catyi yu tsihin ndo, cuñi ndo tsi nyivi xaan iñi tsi ndo. Tan javaha ndo tsa vaha tsihin nyivi caahán tsi ndo, tan tsi nyivi ña cuñi

nyehe tsi ndo. Tan ndacan tahvi ndo tsi Nyoo tsa cuenda nyivi tsa caahán nyaa tsi ndo tan tsa cuenda ñi tsa jacuví tsa uhvi tsi ndo.

<sup>45</sup> Tatun javahá ndo tacan, cuví ndo sehe Jutu yo ra nyaá gloria. Tyin maa ra jacaná ra ñicanyii, tan jacuún ra savi nuu tyiñu jahá nyivi vaha tan nyivi ña vaha.

<sup>46</sup> Tatun nyooho tan cuñí ndo tsi nyivi vaha iñi tsi ndo tan ndasi cuñí ndo nyehe ndo tsi nyivi xaan iñi tsi ndo, nduve tsa vaha cua ñihi ndo. Tyin juvin ñi tacan javahá tucu ra tavá xuhun cuenda ra ndacá ñaha nda ñuu Roma. Tan cuñí maa ndo tyin quiñi xaan iyó ra can naha ra.

<sup>47</sup> Tatun tsahá ndo nacumi tsi maa ñi ra tsa vaha iñi tsi ndo tan ña jacuu ndo tacan tsihin inga ca nyivi, nduve tsa vaha xaan javahá ndo. Tyin juvin ñi tacan javahá nyivi tsa ña tsitó tuhun Nyoo.

<sup>48</sup> Tumaa Jutu yo tsa nyaá gloria cuiti xaan iyó ra, tacan taahán tsi coo tucu nyooho.

## 6

### *Nu caahán ra Jesús nácaa javaha yo tumañi iñi*

<sup>1</sup> Jaha ndo cuenda tan ña nduyaa ndo náa tumañi iñi javaha ndo tsi nyivi. Tyin tatun javaha ndo tumañi iñi tyin nyehe nyivi, Jutu yo, ra nyaá gloria, nduve náa cua cuhva ra tsi ndo.

<sup>2</sup> Tun cua javaha ndo tumañi iñi, ña cua jacoto ndo tsi inga nyivi tyin javahá ndo tumañi iñi. Ña javaha ndo tumaa icá ra tsa jahá tyin vaha xaan ra tan tsicá nuu ra naha nuyahvi tan tsitsi vehe ñuhu. Javahá ra naha tumañi iñi tyin na catyi nyivi tyin vaha xaan iñi ra naha. Yacan ñi ñihi ra can naha ra, tan nduve náa cua cuhva Nyoo tsi ra naha.

<sup>3</sup> Yacan cuenda quiví javahá ndo tumañi iñi tsi nyiví ndaahvi, ña jácoto ndo ndi tsi ra tsa vaha xaan ca iñi tsi ndo.

<sup>4</sup> Xeehe ñi jatyinyee ndo tsi ñi ndaahvi. Tan Jutu yo Nyoo cua nyehe ra tsa javahá ndo tacan. Tan cua cuhva ra tsa vaha tsi ndo.

*Nu caahán ra Jesús nácaa ndacan tahvi yo tsi Jutu yo Nyoo*  
(Lc. 11.2-4)

<sup>5</sup> 'Tatun cua ndacan tahvi ndo tsi Nyoo, ña javaha ndo tumaa javahá ra tsa jahá tyin vaha xaan ra naha. Tyin ra ican naha ra tuhvá ra naha tsicán tahvi tsi Nyoo nu tuvi nyiví, tan nyecú nyityí ra naha tsitsi vehe ñuhu o ityi cahnu tyin taahán iñi ra naha tsa cahan nyiví tyin vaha xaan ra naha. Tsa nditsa catyí yu tsihin ndo tyin yacan ñi ñihí ra naha.

<sup>6</sup> Maa tyin nyooho quiví tsa ndacan tahvi ndo tsi Nyoo, ña ndacan tahvi ndo tsi ra nu nyehe nyiví tsi ndo. Quíhví ndo tsitsi vehe ndo tan nacasí ndo yuvehe ndo tan ndacan tahvi ndo tsihin tsa ñi iñi añima ndo. Tan intuhun ñi maa Nyoo Jutu yo cua nyehe ra tsa javahá ndo tacan tyin nuu maa ra tsicán tahvi ndo, tan ñavin nuu nyiví. Tan cua cuhva ra tsa vaha tsi ndo.

<sup>7</sup> 'Tatun cua cahan ndo tsihin Nyoo, ñavin juven ñi tuhun tsa nduve yahvi nyaa cahan ndo. Tacan javahá nyiví tsa ña tsitó tsi Nyoo. Cuñí maa ñi tyin tacan tan cua tyaa soho Nyoo tsa caahán ñi, tyin cuaha xaan tsaha caahán ñi juven ñi tuhun tsa tsa yahá cahān ñi.

<sup>8</sup> Ña javaha ndo tacan. Tyin Nyoo tsa tsitó ra náa tsiñí ñuhu tsi ndo tsa ndi cumañi ca ndacan ndo tsi ra.

<sup>9</sup> Yacan cuenda nyooho, tatun cua ndacan tahvi ndo tsi Nyoo, tyehen catyi ndo: Jutu Mañi ndi, tsa nyaá un gloria. Jacahnú xaan ndi tsi un.

<sup>10</sup> Na quitsi tsa ndaca ñaha un nu ñuhu ñayivi ihya, tan na javaha tandihí nyivi tandihí cuhva cuñí maa un, tumaa cuví nda gloria.

<sup>11</sup> Cuhva tsa catsi ndi tahan tahan quivi.

<sup>12</sup> Jaha tucahnu iñi tsi ndi náa tsa ña vaha javaha ndi, tumaa tsa jahá maa ndi tucahnu iñi tsi nyivi tsa javahá tsa ña vaha tsi ndi.

<sup>13</sup> Ña cuhva un tsa nducu cuhva nu ña vaha tsi ndi, coto javaha ndi cuatyí nuu un. Tyin maa un cuví ra jacacú tsi ndi ndaha nu ña vaha.

Tan maa un cuví ra ndacá ñaha tsi ndi. Tan iyó tandihí tunyee iñi tsi un. Tan taahán tsi tyin jacahnu tandihí nyivi tsi maa ñi un tandihí maa quivi tan na ña cundihí tsi. Na cuví tsi tacan ñi.

Tyehen taahán tsi ndacan tahvi ndo tsi Nyoo.

<sup>14</sup> Tyin tatun nyooho tan jahá ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo ra nyaá gloria, cua jaha ra tucahnu iñi tsi maa ndo.

<sup>15</sup> Maa tyin tatun ña jaha ndo tucahnu iñi tsi nyivi tsa javahá tsa ña vaha tsi ndo, tacan tucu Jutu yo, ña cua jaha ra tucahnu iñi cuatyí maa ndo —catyí ra Jesús.

*Tatun cua coo nyitya yo tyin nanducú yo tsi Nyoo, ña cua jacoto yo tsi inga ca nyivi*

16 Tan catyí tucu ra Jesús tsihin nyiví:

—Quiví tsa iyó nyitya ndo tyin nanducú ndo tsi Nyoo, ña cuihya nyehe ndo, tumaa javahá nyiví jahá tyin vaha xaan ñi. Tyin cahyí ñi nyaa nuu ñi tyin cuñí ñi tsa nyehe nyiví tyin iyó nyitya ñi tan nanducú ñi tsi Nyoo. Catyí yu tsihin ndo tyin yacan ñi ñihí ñi. Nduve ca naa cua cuhva Nyoo tsi ñi.

17 Maa tyin nyooho quiví tsa iyó nyitya ndo tyin nanducú ndo tsi Nyoo, nācatya ndo nuu ndo. Tan tyihí ndo cuca jiñi ndo.

18 Tacan tan ña cua tuvi ñi nyiví tyin iyó nyitya ndo tan nanducú ndo tsi Nyoo. Tyin intuhun ñi maa Nyoo nyehé tsa javahá ndo tsa xeehe ñi. Tan cuaha tsa vaha cua cuhva ra tsi ndo.

*Tsa vaha tsa iyó nda gloria*

*(Lc. 12.33-34)*

19 Ña jācaya ndo tsa cuca tsa iyó nu ñuhu ñayiví ihya. Tyin coto tiví tsi jaha tiquixin o jaha cuxi. O cuví quihví ñasuhu, tan suhu nu tandihí tsa jācaya ndo.

20 Vaha ca jācaya ndo tsa cuca tsa iyó nda gloria. Tyin ña cua cundihí tsi ndacan. Tyin ña cuvi tiví tsi ndacan, tan nduve quití jativí itsi, ndi nduve ñasuhu.

21 Tyin nu natyihí vaha ndo tsa cuca, ican cua cunyaa ndihí añima ndo.

*Nu caahán ra Jesús tyin na jaha yo cuenda ñuhu nditsin tsa tyihí ra añima yo*

*(Lc. 11.34-36)*

22 Tinuu ndo cuví ñuhu nditsin tsi ndo. Tatun vaha tinuu ndo, tanñi cuñu ñuhu ndo tan iyó ñuhu

nditsin. [Tan tuhun ihya cuñí tsi catyi tyin tatun iyó ñuhu nditsin Nyoo aña n̄do cuví n̄do nyivi vaha.]

<sup>23</sup> Maa tyin tatun ña vaha tinuu n̄do, tandihi cuñu ñuhu n̄do tan nyii tsi nu naa. Tan tacan tucu tatun nduve ñuhu Nyoo iyó aña n̄do, [cuví n̄do tumaa iin ra cuaa. Nu naa cuahán n̄do tan ña cuví nyehe n̄do ityi vaha tsa cuahán nu nyaá Nyoo].

*Nu caahán ra Jesús tyin ña cuvi tyaa yahvi yo tsi Nyoo tatun cuñi xaan ca yo xuhun*

*(Lc. 16.13)*

<sup>24</sup> 'Iin musu ña cuvi coo uvi tsitoho ra. Tyin musu can cuñí ca ra tsi iin ra tan ñavin ca tsi inga ra. Tan tyaá yahvi ra tsi iin ra, tan ñavin ca tsi inga ra. Tan tacan tucu nyooho, ña cuví cuñi n̄do tsi Nyoo, tan cuñi tucu n̄do xuhun.

*Nu caahán ra Jesús tyin ña caca xaan iñi yo náa ndihi tsa tsiñi ñuhu tsi yo*

*(Lc. 12.22-31)*

<sup>25</sup> 'Yacan cuenda catyí yu tsihin n̄do, tyin ña caca xaan iñi n̄do nácaa ñihi n̄do tsa catsi n̄do tan tsa coho n̄do. Ndi ña caca iñi n̄do nácaa cua ñihi n̄do jahma n̄do. Tyin nu Nyoo nyaá yahvi ca ñayivi tsa iyó yo tan ñavin ca tsa catsi yo. Tan nyaá yahvi ca cuñu ñuhu yo tan ñavin ca jahma yo. [Tyin maa ra tsahá ra ñayivi iyó yo. Tan ña y#i cuhva ra inga tsa tsiñi ñuhu tsi yo].

<sup>26</sup> Nyehe n̄do cuhva iyó saa. Ña tatsí ti itu. Tan ña jahá tyiñu ti. Tan ndi ña tyihí vaha ti tsa catsi ti. Maa tyin tsatsí ti tyin Jutu yo Nyoo ra nyaá gloria tsahá ra tsa catsi ti naha ti. Tan nuu Nyoo cahn̄u ca cuví nyooho tan ñavin ca saa can naha ti.



27 Tan vasu ndi maa tsicá xaan iñi ndo maa tyin ña cua cuvi jandusucun ca ndo ndi luxu ca tsi ndo.

28 "Tan tatun ndi luxu can ña cuví tsi ndo, ¿nácaa tsa tsicá xaan iñi ndo tsa cuenda jahma ndo? Nyehe ndo nácaa iyó yutun ita tsitsi cuhu, tyin ña jahá tyiñu tun tan ndi ña tavi tun yuhva.

29 Maa tyin catyí yu tsihin ndo tyin ndi ra cuví rey Salomón tsihin tandihí tsa cuca ra, tan ña tsinditsi ra jahma sii ca caá tan ñavin ca tsa jacunditsí Nyoo tsi yutun ita can.

30 Tatun tacan ñi jacunditsí Nyoo tsi yutun ita tsa iyó tsitsi cuhu vityin, tan tyaan cua cuvi tun nducu tan cayu tun. ¿A ña cua jatyinyee cuaha ca ra tsi ndo? Tyin nyooho cahnu ca cuví ndo nuu ra tan ñavin ca yutun ita can. Maa tyin maa ndo ña tsinú vaha iñi ndo tsi ra.

31 Yacan cuenda ña cua caca xaan iñi yo tan catyí yo: "¿Náa cua catsi yo, o náa cua coho yo, o nácaa cua ñihi yo jahma cunditsi yo?"

32 Tyin nyivi tsa ña tsitó tsi Nyoo tsicá xaan iñi ñi yacan. Maa tyin nyooho ña caca iñi ndo yacan tyin iyó Jutu yo Nyoo, ra nyaá gloria. Tan tsitó ra náa ndihí tsa tsiñi ñuhu tsi ndo.

33 Yacan cuenda, caca iñi ndo maa ñi maa tuhun Nyoo. Tan nanducu jihna ndo nácaa nacuhva cuenda ndo tsi ndo tsi ra na cundaca ñaha ra tsi ndo, tan na coo tsa vaha ra tsi ndo. Tyin tacan tan cua ñihi ndo tandihí tsa tsiñi ñuhu tsi ndo.

34 Jahá cuenda Nyoo tsi ndo vityin tan ityaan. Yacan ña caca iñi ndo tsa tsiñi ñuhu tsi ndo ityaan. Caca iñi ndo tan nyehe ndo nácaa yahá ndo quivi vityin jahá Nyoo.

## 7

*Ña cahan yo tsa caá inga nyivi  
(Lc. 6.37-38, 41-42)*

<sup>1</sup>Ña cahan ndo tsa caá inga nyivi, tacan tan Nyoo ña cua cahan ra tsa caá ndo.

<sup>2</sup>Tyin tumaa caahán ndo tsa caá inga nyivi, tacan cua javaha Nyoo tsihin ndo. Tan tumaa tsa javahá ndo tsihin inga nyivi, juvin ñi tacan cua javaha Nyoo tsihin ndo.

<sup>3</sup>¿Nacaa tyin nyehé un tsahan luhlu tsa nyií tinuu yañi un, tan ña jahá un cuenda yutun cahnu tsa nyií tinuu maa un?

<sup>4</sup>Tatun tinuu maa un nyií iin yutun cahnu, ¿nácaa cuví catyi un tsihin ra yañi un: “Naha, na tava yu tsahan luhlu tsa nyií tinuu un”?

<sup>5</sup>¡Yooho tsa jahá tyin vaha xaan un! Tava jihna yutun cahnu tsa nyií tinuu un. Tyin tacan tan cuvi nyehe vaha un tsahan luhlu tsa cua tava un tinuu yañi un.

<sup>6</sup>Ña jañihi ndo cahan ndo tuhun Nyoo tsihin nyivi ña cuñí coto tyin coto cañi ñi tsi ndo. Tyin cuví ñi tumaa ina tsa caán xaan tsi ndo, tan tumaa quini tsa tsacá tsaha iin ndaha tyiñu tsa yahvi nyaá, tyin caahán ñi tsa ndavaha ñi siqui tuhun Nyoo.

*Ña cu jutsan yo ndacan yo tsa ndacan yo tsi  
Nyoo, tyin tacan tan cua cuhva ra tsi yo  
(Lc. 11.9-13; 6.31)*

<sup>7</sup>Ndacan ndo tsa tsiñí ñuhu tsi ndo tsi Nyoo. Tan cua cuhva ra tsi ndo. Nanducu ndo, tan cua nañihi ndo. Cañi ndaha ndo yuvehe, tan cua nuña.

<sup>8</sup> Tyin tandihí nyívi tsa tsicán tsi ra, cua cuhva ra tsa tsicán ñi. Tan ra tsa cua nanducu, cua nañihi ra. Tan ra tsa cañi ndaha yuvehe, cua nuña yuvehe nuu ra.

<sup>9</sup> Tacan tucu nyooho tsihin sehe ndo. Tshá ndo tsa vaha itsi naha tsi. Tun tsicán tsi paan, ¿a cua cuhva ndo iin yuu itsi?

<sup>10</sup> O tatun tsicán tsi tyaca, ¿a cua cuhva ndo iin coo itsi?

<sup>11</sup> Nyooho vasu ndi maa quiñi iyó ndo, maa tyin tsitó ndo nácaa cuhva ndo tsa vaha tsi sehe ndo. Tan vihi ca maa Jutu yo, ra nyaá gloriá, cuaha ca tsa vaha cua cuhva ra tsi ndo tatun ndacan ndo tsi ra.

<sup>12</sup> Tumaa cuñi ndo tsa javaha nyívi tsa vaha tsihin ndo, tacan javaha tucu maa ndo tsa vaha tsihin ñi. Tyin tacan caahán ley tsa tsahá Nyoo tsi ra Moisés tan tacan tucu nyaá nu tandihí libru tsa tyaa ra cuví ndusu yuhu Nyoo tahañ tsanaha.

*Yuvehe tihin tan ityi cuiñi tsa cuahán nu nyaá Nyoo*

*(Lc. 13.24)*

<sup>13</sup> Nducu ndo cuhva quihvi ndo yuvehe tihin. Tyin quiihin yuvehe, tan quiihin ityi tsa cuahán nda nu cunaa nyívi anyaya. Tan cuaha xaan nyívi cuahán ityi can.

<sup>14</sup> Maa tyin tihin yuvehe tan cuiñi ityi tsa cuahán nu cuahán nyívi tsa ñihí ñayívi nyito coo ñi. Maa tyin ña cuaha nyívi nañihí ityi can.

*Tsihin tsa javahá nyívi, tan nacotó yo tatun nyívi vaha, a nyívi ña vaha cuví ñi*

*(Lc. 6.43-44)*

<sup>15</sup> 'Jaha ndo cuenda tsi ndo tsihin ra vatya naha ra. Tyin catyí ra naha tyin ndusu yuhu Nyoo cuví ra naha, maa tyin ña nditsa. Tyin vatsí ra naha tumaa mbee nu yucú ndo, jahá ra naha tyin ra vaha cuví ra naha. Maa tyin tumaa quiṭi xaan cuví ra naha.

<sup>16</sup> Nyooho cuví nacoto ndo tsi ra naha tsihin tsa javahá ra naha. Tumaa iin yutun ña vaha ña tsahá tun tsiti vaha, tacan cuví ra naha. Tyin iin tinyata ña cua kuhva tun mangu, tan ndi iñu nduhva ña cuvi kuhva tsi yucu vixi.

<sup>17</sup> Tan tacan tucu tandiḥi yutun vaha. Tsahá tun tsiti vaha. Tan tandiḥi yutun ña vaha, tsahá tun tsiti ña vaha.

<sup>18</sup> Tyin yutun vaha, ña cuví kuhva tun tsiti ña vaha. Tan ndi yutun ña vaha ña cuví kuhva tun tsiti vaha.

<sup>19</sup> Tan tandiḥi yutun tsa ña tsahá tsiti vaha, cah-nya yo tsi tun. Tan cayu tun.

<sup>20</sup> Tan tacan tsihin tsa javahá nyivi, cuví nacoto ndo tsi ñi tatun nyivi vaha o nyivi ña vaha cuví ñi.

*Nu catyí ra Jesús tyin ña tandiḥi nyivi tan cua quihvi ñi nu ndacá ñaha Nyoo*

*(Lc. 13.25-27)*

<sup>21</sup> 'Ña tandiḥi nyivi tsa catyí tsihin yu: "Jutu Mañi yu, Jutu Mañi yu", cua quihvi ñi nu ndacá ñaha Nyoo nda gloria. Maa tyin nyivi tsa javahá tsa catyí maa Nyoo Jutu yu, juvin ñi can cua quihvi nu ndacá ñaha ra.

<sup>22</sup> Quivi tatsi tuñi Nyoo tsi nyivi, cuaha xaan ñi cua catyi ñi tsihin yu tyehen: "Jutu Mañi yu, nyuhu caḥan ndi tuhun cun tsihin nyivi. Tan tsihin sivi un tava ndi tatyí ña vaha tsa yihí tsi ñi. Tan cuaha

xaan tsa iyo javahá ndi tsihin sivi un”, cua catyi ñi tsihin yu.

<sup>23</sup> Tacan tan yuhu cua catyi yu tsihin ñi: “Ña nacotó yu tsi nyooho. Cãtsiyo nyaha ndo nu nyaá yu tandihi nyooho tsa javahá maa maa ñi tsa ña vaha”, cua catyi yu tsihin ñi.

*Nu caahán ra Jesús nácaa cua cacu nyivi tsa tyaá yahvi tuhun caahán ra, tan nyivi tsa ña tyaá yahvi tsa caahán ra, ña cua cacu ñi  
(Lc. 6.47-49; Mr. 1.22)*

<sup>24</sup> Tacan catyí yu tsihin ndo, tyin nyivi tsa tsiñí tsa caahán yu tan javahá ñi cuhva cuñi yu, cuví ñi tumaa iin ra tsiñi tuñi tsa janduvita tyihyo tsaha vehe ra tsata cava.

<sup>25</sup> Tan quitsahá cuún ñihi savi. Tan cuaha xaan ndutya ñuhu yahá tsata vehe can. Tan ñihi xaan quitsahá yihí tatyí. Maa tyin ña cuví janduva tsi vehe can, tyin vaha sama tyihyo tsaha tsi tsata cava.

<sup>26</sup> Maa tyin nyivi tsa tsiñí tuhun caahán yu, tan ña javahá ñi cuhva cuñi yu; cuví ñi tumaa iin ra soho, ra tsa javahá vehe nu nyiti.

<sup>27</sup> Tan quitsahá cuún ñihi savi. Tan cuaha xaan ndutya ñuhu yahá nu nyaá vehe ra. Tan ñihi xaan yihí tatyí. Tan vehe can iin yaha cuii ñi nduva tsi tan cunaa tsi —catyí ra Jesús tsihin ñi tsa nycún tsi ra.

<sup>28</sup> Cuhva tsa ndihí cahan ra Jesús tsihin ñi, iyo xaan cuñi ñi tsihin tsa caahán ra,

<sup>29</sup> tyin caahán ra tumaa caahán iin ra ndacá ñaha. Tan ña caahán ra tumaa caahán ra maestro cuenda ley vehe ñuhu naha ra.

## 8

*Nu janduvaha ra Jesús tsi iin ra ndohó cuehe tyaahyú*

*(Mr. 1.40-45; Lc. 5.12-16)*

<sup>1</sup> Cuhva tsa nuu ra Jesús yucu can, cuaha xaan nyivi nyicún tsi ra.

<sup>2</sup> Tan tsaá iin ra ndohó cuehe tyaahyú, tan tsicuiñi tsiti ra nuu ra Jesús, tan catyí ra tsihin ra:

—Jutu Mañi yu, tatun yooho tan cuñi un, cuví janduvaha un tsi yu —catyí ra tsihin ra.

<sup>3</sup> Tacan tan tyiso ndaha ra Jesús jiñi ra cuuhví can, tan catyí ra tsihin ra:

—Cuñi yu janduvaha yu tsi un. Cua nduvaha un vityin —catyí ra.

Tan iin yaha ñi nduvaha ra.

<sup>4</sup> Tacan tan catyí ra Jesús tsihin ra:

—Jihna, coto ñahñi catyi tuhun un tsihin nyivi. Maa tyin cuaahan nu nyaá ra cuví jutu, tan janaha un tsi un tsi ra. Tan cuhva un tsa taahán tsi jamañi un nuu Nyoo tumaa catyí ley Nyoo tsa tyaá ra Moisés. Tan cua cuvi tsi iin tsa ndaa tsi ra jutu can tan tsi nyivi tyin tsa nduvaha un.

*Nu janduvahá ra Jesús tsi musu iin ra cuví capitán*

*(Lc. 7.1-10)*

<sup>5</sup> Quivi tsa tsaá ra Jesús ñuu Capernaum, iin ra cuví capitán, ra ñuu Roma, tsaá ra nu nyii ra Jesús tan caahán ndaahvi ra tsihin ra,

<sup>6</sup> tan catyí ra:

—Jutu Mañi yu, musu yu ñihi xaan cuuhví ra, canyíi ra nu cama. Ña cuví nduvita ra tyin nduxii ra, tan yaha xaan cuhva cuñi ra.

<sup>7</sup> Tan catyí ra Jesús tsihin ra:

—Cuhun maa yu tan cujanduvaha yu tsi ra  
—catyí ra tsihin ra.

<sup>8</sup> Nacahan ra capitán can tan catyí ra:

—Jutu Mañi yu, ña cahnu cuví yu tan cuhun un yuvehe yu; tsihin tuhun çahan ñi un tan musu yu cua nduvaha ra.

<sup>9</sup> Tyin juvin ñi iyó ra yihí ndaha tsi yu. Tan iyó andaru tsa yihí ndaha tucu maa yu. Tan tatun cua tava tyiñu yu tsi iin ra can, cua cuhun ra. Tan tatun cana yu tsi inga ra, cua quitsi ra. Tan tatun tava tyiñu yu tsi musu yu, cua javaha ra cuhva cuñi yu.

<sup>10</sup> Tan tsa tsiñi ra Jesús tsa çahan ra can, tan iyo xaan cuñi ra. Tan catyí ra tsihin nyivi tsa nyicún tsi ra:

—Tsa nditsa catyí yu tsihin ndo, tyin ñaha ca nañihi yu iin ra Israel tsa tsinú xaan iñi tumaa tsinú iñi ra ihya.

<sup>11</sup> Tan catyí yu tsihin ndo tyin cuaha nyivi inga ñuu cua quitsi ityi nu caná ñicanyii, tan ityi nu tyisó ñicanyii, tan cua cunyecua ñi catsi ñi tsihin ra Abraham, ra Isaac tan ra Jacob nu ndacá ñaha Nyoo.

<sup>12</sup> Tan nyivi tsa taahán tsi cuhun glória, ña cua cuhun ñi, tyin cua cuhun ñi nu naa. Tan cua vacu tsa ñi tan catsan ña cua cuvi nuhu ñi tsa cuenda tsa xaan cuñi ñi tyin nyehe ñi tundoho —catyí ra Jesús tsihin nyivi nyicún tsi ra.

<sup>13</sup> Tacan tan catyí ra tsihin ra capitán can:

—Cuaahan, tan na nduvaha musu un tsa cuenda tyin tsinú iñi un tsi yu —catyí ra Jesús tsihin ra capitán.

Tan juvin ñi cuhva can nduvaha musu ra.

*Nu janduvahā ra Jesús tsi tyiso ra Pedro  
(Mr. 1.29-31; Lc. 4.38-39)*

<sup>14</sup> Tsa yahā can, tan cuahán ra Jesús yuvehe ra Pedro. Tan nyehe ra tsi ña tyiso ra, canyí ña nu tsito tyin yihí cahñi tsi ña.

<sup>15</sup> Tan tñin ra ndaha ña, tan iin yaha ñi quita cahñi tsi ña. Tan nduvita ña, tan quitsaha nanducú ña tsa catsi ra naha.

*Nu cuaha xaan nyivi cuuhví janduvahā ra Jesús  
(Mr. 1.32-34; Lc. 4.40-41)*

<sup>16</sup> Tan tsa cunaaha, cuaha xaan nyivi yihí tatyí ña vaha tsindacā nyivi tsi ra Jesús. Tan tsihin intuhun ñi tuhun cahān ra Jesús tan quita tatyí ña vaha tsi ñi. Tan tandihí ñi cuuhví iin yaha ñi nduvahā ñi.

<sup>17</sup> Tacan cuví tyin tacan tan cundaā tsa cahān Jutu Mañi yo tsihin yuhu ra Isaías, ra cuví ndusu yuhu ra tahān tsanaha. Tan catyí ra tyehen: “Maa ra quihñin ra cuehe tsa yihí tsi yo, tan quihñin nyaa ra tsa uhvi tsi yo.”

*Nyivi tsa cuñí quihvi cuenda ra Jesús  
(Lc. 9.57-62)*

<sup>18</sup> Tan tsa nyehe ra Jesús tyin cuaha xaan nyivi tsinū nduvi nu nyíí ra, catyí ra tsihin ra tsicá tsihin ra tyin cua yaha ra naha inga tsiyo miñi.

<sup>19</sup> Tacan tan tsaā iin ra maestro cuenda ley vehe ñuhu tan catyí ra tsihin ra:

—Maestro, cuñi yu cunicun yu tsi un tandihí ñi ityi nu cuahán un —catyí ra.

<sup>20</sup> Tan ra Jesús catyí ra tsihin ra:



—Ñacuii iyó vehe ti. Tan saa iyó taca ti. Maa tyin yuhu Ray# tsa quee\_nda gloria, nduve nu maa cunyanaa luxu jiñi yu iyó —catyí ra.

<sup>21</sup> Inga ra tsa tsicá tsihin ra nacahan ra tsihin ra:

—Taa, cuhva na cahun jihna yu cucutsi yu tsi jutu yu, —catyí ra.

<sup>22</sup> Tan catyí ra Jesús tsihin ra:

—Naha yooho quitsi nyicun un tsi yu. Tan nyivi ña iyó Nyoo ñima na cucutsi tahan maa ñi tsi ñi tsitsi ñuhu tun tsihi ñi —catyí ra.

*Nu jacutaxín ra Jesús tatyí xaan nu miñi*

*(Mr. 4.35-41; Lc. 8.22-25)*

<sup>23</sup> Tacan tan quihvi ra tsitsi yutun ndoo tan ra tsicá tsihin ra cuahan ra naha tsihin ra.

<sup>24</sup> Tan ñihi xaan quitsaha yihí tatyí nu miñi can, tan cuaha xaan ndutya quihvi tsitsi yutun ndoo ra naha. Maa tyin ra Jesús quixí ra.

<sup>25</sup> Tan ra tsicá tsihin ra jandoto\_ ra naha tsi ra, tan catyí ra naha:

—¡Jutu Mañi yu, jacacu tsi yo, tyin cuñí cunaa yo!

<sup>26</sup> Tan catyí ra Jesús tsihin ra naha:

—¿Nacuenda yuuhví xaan ndo? ¡Nyoooho tsa luxu xaan tsinú iñi tsi yu! —catyí ra Jesús.

Tacan tan nduvita\_ ra tan cahan ra tsihin tatyí tan tsihin ndutya, tan cutaxín tsi.

<sup>27</sup> Tan iyo xaan cuñí ra naha tan catyí ra naha:

—¿Yóo ra cuví ra ihya? Tyin nda cuanda tatyí tan nda cuanda ndutya tan tyaá yahvi tsi ra —catyí ra naha.

*Nu nduvaha\_ uvi ra ñuu Gadara ra yihí tatyí ña vaha naha ra*

*(Mr. 5.1-20; Lc. 8.26-39)*

<sup>28</sup> Tacan tan tsaá ra naha inga tsiyo miñi nda nu ñuhu Gadara. Tan tsaá uvi taahan ra yihí tatyí ña vaha. Tan quitá ra naha nu ñaña cumí sandu. Xaan xaan ra naha, tan yoñi maa cuví yaha ityi can.

<sup>29</sup> Tan caná tsaá ra naha, tan catyí ra naha:

—¿Náa cuñí un tsihin ndi, yooho Jesús Sehe Nyoo? ¿A vatsí un vatsí janyehe un tundoho tsi ndi tsa ndi cumañi ca tsaá quivi? —catyí ra naha jahá tatyí ña vaha can.

<sup>30</sup> Tan yatyin ñi can yucú cuaha quini tsatsí ti naha ti.

<sup>31</sup> Tan catyí nu tatyí ña vaha can tsihin ra Jesús:

—Tatun cua tava un tsi ndi, cūhva tsa quihvi ndi tsitsi quini can naha ti —catyí nu tatyí ña vaha can nahnu.

<sup>32</sup> —Vaha. Quihvi ndo —catyí ra Jesús.

Tan quitá nu tatyí ña vaha can nahnu, tan quihvi nahnu tsitsi tandihí quini tsa nyecú can. Tan tandihí quini can tsinu ti naha ti tan cucoyo ti naha ti iin xahva yuhu miñi can, tan tsihi ti naha ti tsihin ndutya can.

<sup>33</sup> Tan ra jahá cuenda tsi quini can, tsinú xaan ra naha cuahán ra naha tsitsi ñuu, tan nacatyí tuhun ra naha tandihí tsa cuví tsi ra tsa yihí tatyí ña vaha can naha ra.

<sup>34</sup> Tacan tan tandihí nyivi ñuu can, tsahan ñi tsinyehé ñi tsi ra Jesús, tan cahán ndaahvi ñi tsihin ra na quita ra ñuu can.

## 9

*Nu janduvaha ra Jesús tsi iin ra xii  
(Mr. 2.1-12; Lc. 5.17-26)*

<sup>1</sup> Tacan tan quihv̄i ra Jesús tsitsi iin yutun ndoo tan yaha ra miñi, tan tsaḡ ra nda ñuu nu iyó ra.

<sup>2</sup> Nu nyíi ra ican, tsindacḡ nyiv̄i tsi iin ra cuuhví tsa ña cuví nacanda tyin nduxiḡ ra, tan canyíi ra nu tsito. Tan tsa nyeheḡ ra Jesús tyin tsinú xaan iñi ñi tsi ra, quitsaha caahán ra tsihin ra cuuhví can:

—Jandu iin iñi un, sehe yu, tyin tsa tsicoḡ tuc-ahnu iñi cuatyí un —catyí ra Jesús tsihin ra.

<sup>3</sup> Tacan tan quitsaha tsicá iñi juhva ra maestro cuenda ley vehe ñuhu tsa yucú ican naha ra: “Ra ihya tsicoḡ cuatyí ra nu Nyoo tsihin tuhun caahán ra”, cuñí ra naha tsicá iñi ra naha.

<sup>4</sup> Maa tyin ra Jesús tsitó ra náa tsicá iñi ra naha, tan catyí ra tsihin ra naha:

—¿Nacuenda tsicá iñi ndo tsa ña vaha?

<sup>5</sup> Tyin ¿ndáa tsa yḡ ca catyí yo: a yḡ ca catyí yo: “Cuatyí un tsa yaha ndatsi”, o yḡ ca catyí yo: “Nduvita tan caḡa un”?

<sup>6</sup> Vityin cua janaha yu tsi ndo tyin yuhu Rayḡ tsa quee nda gloria, iyó ndatu tsi yu nu ñuhu ñayiv̄i ihya tyin jaha yu tucahnu iñi cuatyí ndo —catyí ra Jesús.

Tacan tan catyí ra tsihin ra cuuhví can:

—Nduvita, naquihin tsito un tan cuanuhu nda yuvehe un —catyí ra.

<sup>7</sup> Tacan tan nduvitaḡ ra tan cuanuhuḡ ra nda yuvehe ra.

<sup>8</sup> Tan nyiv̄i tsa nyeheḡ tsa cuv̄i, nayuhv̄i xaan ñi. Tan quitsahaḡ jacahnú ñi tsi Nyoo tyin tsaḡa ra tunyee iñi tsi nyiv̄i.

*Nu canḡ ra Jesús tsi ra Mateo  
(Mr. 2.13-17; Lc. 5.27-32)*

<sup>9</sup> Yaha can tan quita ra Jesús ican. Tan nyehe ra tsi iin ra tsa nañi Mateo, nyaá ra naquihín ra xuhun tsa tyahví nyivi Israel tsi ra ndacá ñaha. Tan catyí ra tsihin ra:

—Cohon tsihin yu.

Tacan tan nduvita ra Mateo tan cuahán ra tsihin ra Jesús.

<sup>10</sup> Tacan tan cuvi tsi iin tsaha, ra Jesús cuahán ra nda vehe ra Mateo, cua catsi ra ixta. Tan cuaha xaan ra tavá xuhun cuenda ra ndaca ñaha tsaá, tan tsihin inga ca ra iyó cuatyí naha ra. Tan tsinyecu ra naha iin ñi nu mesa tsihin ra Jesús tan tsihin ra tsicá tsihin ra.

<sup>11</sup> Tan tsa nyehe ra fariseo naha ra tyin nyaá ra Jesús tsihin ra iyó cuatyí naha ra, tan tsica tuhun ra naha tsi ra tsicá tsihin ra, tan catyí ra naha tsihin ra naha:

—¿Nacuenda tyin tsatsí ra maestro ndo tsihin ra tavá xuhun naha ra tan ra iyó cuatyí naha ra? —catyí ra naha.

<sup>12</sup> Tsa tsiñi ra Jesús tsa caahán ra naha, tan catyí ra tsihin ra naha:

—Ña tsiñi ñuhu doctor tsi nyivi iyó vaha, ñi ña cuuhví. Maa tyin nyivi cuuhví tsiñi ñuhu doctor tsi ñi.

<sup>13</sup> Cuaahan ndo tan cutuhva ndo cuhva catyí nu tutu Nyoo, nu catyí tsi tyehen: “Yuhu cuñi yu tsa cundaahvi iñi ndo tsi nyivi, tyin yacan cuví tsa ñiñi xaan ca tan ñavin ca tsa cahñi ndo quití tan cuhva cuenda ndo tsi yu.” Yuhu ña vatsí yu jatyyinee yu tsi nyivi tsa tsicá iñi tyin vaha ñi, vatsí yu jatyyinee yu tsi nyivi tsitó tyin iyó cuatyí ñi, na ndu uvi iñi ñi cuatyí ñi.

*Nu tsicā tuhun nyiví tsi ra Jesús tatun taahán tsi tsa coo nyitya ñi*

*(Mr. 2.18-20; Lc. 5.33-35)*

<sup>14</sup>Tacan tan ra nyicún tsi ra Juan, ra jacoondutya tsi nyiví, natuhvá ra naha nu nyaá ra Jesús tan tsicā tuhun ra naha tsi ra tan catyí ra naha:

—¿Nacuvi tyin nyuhu tan ra cuví fariseo naha ra, tuhvá ndi tsicoó nyitya tan ra tsicá tsihin yooho ña tuhvá ra naha coo nyitya?

<sup>15</sup>Tan nacahān ra Jesús tan catyí ra:

—¿A cuví cunyecu cuiihya nyiví yucú vico tindaha tun nyíí ra cua tindaha tsihin ñi? Maa tyin coo quiví cua quita ra tindaha ican nu yucú ñi. Tacan tan cua coo ñi tucuihya iñi tan cua coo nyitya ñi.

*Nu caahán ra Jesús tyin ña nacatsí tahan tuhun tsahnu tsa iyó nyiví tsihin tuhun tsa tsa jacuahá ra tsi ñi*

*(Mr. 2.21-22; Lc. 5.36-39)*

<sup>16</sup>Ña tuhvá nyiví naquicú iin jahma tuuhu tsihin iin jahma tsa, tyin cua nandiyí nu naquicu ñi tsihin tsa tsa can, tan cua tyahnya tsi inga tsaha.

<sup>17</sup>Tan tacan tucu, ña cuví tyihí nyiví vinu tsa tsitsi ñi tsaahnu tyin tatun tacan javaha ñi, cua tyahnya ñi can, tan cua tiví vinu can tan cua tiví ndihi tucu ñi can. Yacan cuenda taahán tsi tyihi yo vinu tsa tsitsi ñi tsa. Tyin tacan tan ña tyahnya ñi can tan ndi vinu can ña tiví tsi.

*Nu nduvahā ñaha sehe ra Jairo tan ñaha tsa tñin jahma ra Jesús*

*(Mr. 5.21-43; Lc. 8.40-56)*

18 Tsitsi tsa caahán ra Jesús tuhun ihya, tsaá iin ra cumí tyiñu cuenda vehe ñuhu nyivi Judea tan tsicuiñi tsiti ra nuu ra Jesús, tan catyí ra:

—Ndi tsihi cuii ñi sehe yu, maa tyin tatun yooho tan cuhun un tan tyiso ndaha un jiñi ña, cua nandoto ña —catyí ra tsihin ra Jesús.

19 Nduvita ra Jesús tsihin ra tsicá tsihin ra tan cuahán ra naha tsihin ra.

20 Tacan tan iin ñaha cuuhvi natuhva ña tsata ra Jesús. Tan ñaha can tsa iyó utsi uvi cuiya ndohó ña cuehe tsa cuún niñi ña. Tan tyanaa ña ndaha ña jahma ra,

21 tan cuñi ña tsicá iñi ña: “Tun nañi ndaha yu jahma ra cua nduvaha yu”, cuñi ña.

22 Maa tyin ra Jesús nanyico coo ra tan nyehę ra tsi ña, tan catyí ra tsihin ña:

—Jandun#i iñi un, xihí, tsa nduvaha un tyin tsinú iñi un —catyí ra.

Tan juvin ñi cuhva can tan tsicuiñi tsa cuún ñiñi ña.

23 Yaha can tan tsaá ra Jesús vehe ra cumí tyiñu can, tan nyehę ra tyin ra música ndatú ra naha tsa cucutsi ra naha tsi ndiyi can. Tan nyivi tsa yucú can iyo xaan tsacú ñi.

24 Tan catyí ra Jesús tsihin ñi:

—Quita ndo ihya. Ñaha luhlu ihya, ña tsihi ña. Quixí ña —catyí ra.

Tan tsa cahan ra tacan quitsaha tsacú naaha ñi.

25 Tan ra Jesús tava ra tsi ñi ityi tsata vehe. Tacan tan quihvi ra tsitsi vehe nu canyiñi ñaha can, tan tin ra ndaha ñaha luhlu can, tan nduvita ña.

26 Tan tandihí nyivi iyó ityi ñuu can tsito ñi tsa nandoto ñaha luhlu can.

*Nu janduvaha ra Jesús tsi uvi taahan ra cuaa*

<sup>27</sup> Tsa quitã ra Jesús ican, tan uvi taahan ra cuaa nyicún tsi ra, caná tsaa ra naha tan catyí ra naha:  
—¿Cundahvi iñi tsi ndi, yooho ra cuví tata ra David! —catyí ra naha.

<sup>28</sup> Tan tsa yaha quihvi ra Jesús tsitsi vehe, ra cuaa can, natuhva ra naha nu nyaá ra, tan maa ra Jesús quitsaha tsicá tuhun ra tsi ra naha tan catyí ra:  
—¿A tsinú iñi ndo tyin cuví janduvaha yu tsi ndo?

Tan nacahan ra cuaa can naha ra tan catyí ra naha:  
—Tsinú iñi ndi tsi un, Jutu Mañi yu —catyí ra naha.

<sup>29</sup> Tacan tan tyanaa ra Jesús ndaha ra tinuu ra naha tan catyí ra tsihin ra naha:  
—Na cuví maa tumaa cuhva tsinú iñi ndo —catyí ra.

<sup>30</sup> Tan nduvaha tinuu ra naha. Tan catyí ra Jesús tsihin ra naha:  
—Coto ñahñi catyi tuhun ndo tsihin ndi intuhun nyivi.

<sup>31</sup> Maa tyin cuahán ra naha tan quitsaha catyí tuhun ra naha tsa javaha ra Jesús tsihin ra naha tsihin tandihí nyivi iyó ityi ñuu can.

*Nu janduvaha ra Jesús tsi iin ra ñihí*

<sup>32</sup> Tsa cuahán ra naha, juhva nyivi tsindaca ñi tsi iin ra ñihí tsa yihí tatyí ña vaha nu nyí ra Jesús.

<sup>33</sup> Tan tsa tava ra Jesús tatyí ña vaha can, tacan tan nacahan ra can. Tan iyo xaan cuñí nyivi, tan catyí ñi:

—Ñaha ca maa nyehe yo ñuu Israel ihya ndi intuhun ra tava tatyí ña vaha tsi nyivi —catyí ñi.

<sup>34</sup> Maa tyin ra cuví fariseo naha ra, catyí ra naha:  
—Ra ihya tavá ra tatyí ña vaha tshin tunyee iñi  
nu ña vaha tsa cuví ityí nuu tshin nahnu —catyí  
ra naha.

*Nu caahán ra Jesús tyin ña cuaha maa nyivi jahá  
tyiñu cuenda Nyoo iyó*

<sup>35</sup> Ra Jesús tsahan ra tandihí ñuu jacuahá ra  
tsi nyivi tsitsi vehe ñuhu intuhun intuhun ñuu.  
Caahán ra tuhun Nyoo nácaa ndacá ñaha ra tsi  
nyivi. Tan janduvahá ra tandihí nuu cuehe tsa  
ndohó ñi.

<sup>36</sup> Tan tsa nyehé ra tsi nyivi, cundaahví xaan  
iñi ra nyehe ra tsi ñi, tyin nyehé ñi tundoho tan  
iyó ñi tucuihya iñi, tumaa mbee ticatyí tsa nduve  
tsitoho iyó.

<sup>37</sup> Tacan tan catyí ra tshin ra tsicá tshin ra:  
—Tsa nditsa, cuaha xaan tyiñu iyó, maa tyin ra  
jahá tyiñu, ña cuaha ra naha.

<sup>38</sup> Yacan cuenda, ndacan ndo tsi Ra Jatsii tyiñu  
ihya, na jaquitsi ca ra musu naquihin vaha  
cosecha ra.

## 10

*Nu nacatsi ra Jesús tsa utsi uvi ra cua caca tyiñu  
ra*

*(Mr. 3.13-19; Lc. 6.12-16)*

<sup>1</sup> Tacan tan cana ra Jesús tsi tsa utsi uvi ra tsicá  
tshin ra tan tsaha ra ndatu tsi ra naha na tava  
ra naha tatyí ña vaha tsa yihí añima nyivi, tan na  
janduvaha ra naha tsi nyivi cuuhví náa ndihí ca nu  
cuehe tan tsa uhvi.

<sup>2</sup> Ihya nyaá sivi tsa utsi uvi ra tsicá tyiñu ra: jihna  
ca, ra Simón, tsa nañi tucu Pedro, tan ra yañi ra,



ra Andrés; ra Jacobo tan ra Juan yañi ra, sehe ra Zebedeo cuví tsi ra naha;

<sup>3</sup> tan ra Felipe; ra Bartolomé; ra Tomás; tan ra Mateo ra tava xuhun cuenda ra ndacá ñaha; ra Jacobo sehe ra Alfeo; ra Lebeo tsa nañi tucu Tadeo;

<sup>4</sup> tan ra Simón ra nyii cuenda partido tsa cuñi cuhun cuatyí siqui ñuu Roma tsa ndacá ñaha tsi ñi; tan ra Judas Iscariote, ra tsa xico tsi ra Jesús.

*Nu tava tyiñu ra Jesús tsi tsa utsi uvi ra tsicá tsihin ra tyin cahan ra naha tuhun Nyoo*

*(Mr. 6.7-13; Lc. 9.1-6)*

<sup>5</sup> Tan tava tyiñu ra Jesús tsi tsa utsi uvi ra can naha ra, tan catyi ra tsihin ra naha:

—Ña cuhun ndo nu iyó nyivi tsa ñavin nyivi Israel cuví, tan ndi ña quihvi ndo ñuu tsa cayucú Samaria.

<sup>6</sup> Cuaahan ndo nu yucú mbee tsa tsinaa tsa cuví nyivi Israel.

<sup>7</sup> Cuaahan ndo cua cahan ndo tyin tsa tsa quivi tsa cua cundaca ñaha Nyoo tsi nyivi.

<sup>8</sup> Janduvaha ndo tsi nyivi cuuhví, nyivi ndohó cuehe tyaahyú, tan nyivi yihí inga cuehe tsi. Janandoto ndo ndiyi. Tava ndo tatyí ña vaha yihí tsi nyivi. Tyin nyooho naquihín ndo tunyee iñi ihya tsa cuatu ñi, janduvaha ndo nyivi tsihin tsi, tan ña ndacan ndo xuhun tsi ñi.

<sup>9</sup> Ña cuiso ndo xuhun; ndi xuhun cuaan, ndi xuhun cuitsin, ndi xuhun cuaaha.

<sup>10</sup> Tan ña cuiso ndo ndi yunu tsa cuenda tsa caca ityi ndo. Intuhun ñi camisa tsa nditsín ndo cuhun tsihin ndo. Tan ña cuiso ndo inga pari nditsan.

Tan ndi ña cundaha ndo yutun. Tyin ra jahá tyiñu, iyó ndatu tsi ra tsa coo yahvi ra.

<sup>11</sup> Tatun tsa ndo iin ñuu cahnu o iin ñuu luhlu, nducu ndo iin nyivi vaha iñi, tan ndoo ndo yuvehe ñi nda cuanda quita ndo ñuu can.

<sup>12</sup> Tatun cua quihvi ndo iin vehe, cuhva ndo nacumi tsi nyivi iyó yuvehe can. Tan catyi ndo tsihin ñi: “Na coo tsa vaha Nyoo aña ndo”.

<sup>13</sup> Tan tatun nyivi iyó yuvehe can tan nacotó ñi tyin tsiñi ñuhu tsa vaha can tsi ñi, cua ndoo can tsihin ñi. Maa tyin tatun ña tsitó ñi tyin tsiñi ñuhu tsa vaha can tsi ñi, naquihin nyico ndo can.

<sup>14</sup> Tan tatun ña cuñi nyivi quihin cuenda ñi tsi ndo, tan ndi ña cuñi ñi tyaa soho ñi tsa caahán ndo, tacan tan quita ndo yuvehe ñi, ñuu can, tan naquisi ndo nyaca ñuhu tsaha ndo tyin ndoo maa cuatyí ñi siqui ñi.

<sup>15</sup> Tsa nditsa catyí yu tsihin ndo tyin quivi cua tatsi tuñi Nyoo tsi nyivi, ñihi ca cua tatsi tuñi ra tsi ñi can tan ñavin ca nyivi ñuu Sodoma tan ñuu Gomorra.

*Nu catyí tuhun tsi náa ndihi tundoho cua nyehe nyivi tsicá tyiñu Nyoo*

<sup>16</sup> ¡Nyehe ndo! Tumaa mbee ticatyí cuví ndo, tan jacuhún yu tsi ndo nu yucú quití xaan. Nyityi jaha ndo tsi ndo, tumaa coo. Maa tyin janduvita ndo iñi ndo tumaa paloma, ña xaan ti.

<sup>17</sup> Jaha ndo cuenda tsi ndo tsihin nyivi tyin cua cuhva cuenda ñi tsi ndo tsi ra cumí tyiñu naha ra. Tan cua cañi ñi tsi ndo tsitsi vehe ñuhu.

<sup>18</sup> Tan tsa cuenda yuhu, cua cundaca ñi tsi ndo nuu ra ndacá ñaha tan nuu rey. Tacan tan cuví

cahan ndo tuhun yu nuu ra naha tan nuu nyivi tsa ñavin nyivi Israel cuví.

19 Maa tyin tatun nacuhva cuenda ñi tsi ndo tsi ra cumí tyiñu naha ra, ña caca iñi ndo nácaa cua cahan ndo, tyin tatun tsa cuhva tsa cua cahan ndo, Nyoo cua cuhva ra tuhun cahan ndo.

20 Tyin ñavin maa ndo cua cahan, tyin maa Tatyí Ii Jutu yo Nyoo tsa iyó aña ndo cua cuhva ra tsa cahan ndo.

21 Yihí rayi cua xico ra naha juvin ñi tsi ra yañi ra naha na cahñi ra naha tsi ra. Tan yihí ra cua xico ra sehe ra. Tan yihí nyivi cua cuxaan ñi tsi jutu ñi tan sihi ñi, tan cua cuhva cuenda ñi jutu ñi tan sihi ñi tsi nyivi na cahñi nyivi can tsi ñi.

22 Tandihí nyivi, ndasi cua cuñi ñi nyehe ñi tsi ndo tsa cuenda yuhu. Maa tyin tatun ña jandihí ndo tsa tsinú iñi ndo tsi yu, tacan tan cua cacu ndo.

23 Tatun nyaa ndaha ñi tsi ndo iin ñuu, cūhun ndo inga ñuu. Tyin tsa nditsa catyí yu tsihin ndo tyin tsa ndi cumañi ca cūhun ndo tandihí ñuu nu iyó nyivi Israel tan cua quitsi nyico yuhu, Rayi tsa quee nda gloria.

24 'Iin ra luhlu tsa tsicá escuela, ña cahnu cuví ra tan ñavin ca ra jacuahá tsi ra. Tan iin musu, ña cahnu ca cuví ra tan ñavin ca tsitoho ra.

25 Ra tsicá escuela, ña cuví coto cuaha ca ra tan ñavin ca ra jacuahá tsi ra. Tan iin musu ña cuví cuu ra iin ra cahnu ca tan ñavin ca tsitoho ra. Yacan cuenda tatun maa yu, ra jatsii vehe, tan catyí nyivi tyin cuví yu Beelzebú, nu cuví ityi nuu tsihin nu ña vaha, tacan tucu cua catyí ñi tsihin nyivi cuenda yu.

*¿Yóo tsi taahán tsi nayuhvi yo, a tsi nyivi o tsi Nyoo?*

*(Lc. 12.2-7)*

<sup>26</sup> Yacan cuenda ña nayuhvi ndo tsi nyivi, tyin nduve tsa nyii xeehe tsa ña cua quituvi. Tan nduve tsa xeehe tsa ña cua coto nyivi.

<sup>27</sup> Tandihí tsa caahán yu tsihin ndo tsacuaa, cahan ndo can tsinu cahñi. Tan tandihí tsa caahán xeehe yu tsihin ndo, ndaa ndo jiñi vehe cana tsaa ndo can, na coto tandihí nyivi.

<sup>28</sup> Ña nayuhvi ndo tsi nyivi tsahñí cuñu ñuhu yo, tyin ña cuví cahñi ñi aña yo. Vaha ca nayuhvi ndo tsi maa Nyoo, ra cuví janaa cuñu ñuhu ndo tan aña ndo tsitsi anyaya.

<sup>29</sup> Saa ña yahvi nyaá ti. Cuví jata yo uvi taahan ti tsihin intuhun xuhun luhlu. Maa tyin ndi intuhun ti ña canacava ti nu ñuhu tatun ña cuhva maa Nyoo Jutu yo.

<sup>30</sup> Tyin nda cuanda ixi jiñi ndo tan tsitó Nyoo najava taahan tsi iyó, tyin tsa naca hví ra intuhun intuhun tsi.

<sup>31</sup> Yacan cuenda ña nayuhvi ndo. Nyoo ho, nyaá yahvi ca ndo nu Nyoo tan ñavin ca tsa cuaha saa.

*Ña cua nayuhvi yo cahan yo tuhun ra Jesucristo tsihin nyivi*

*(Lc. 12.8-9)*

<sup>32</sup> Tandihí nyivi tsa caahán catsi tsihin nyivi yóo ra cuví yu, tacan tucu yuhu cua cahan catsi yu tsihin Jutu yu ra nyaá gloria tyin nacotó yu tsi ñi.

<sup>33</sup> Maa tyin nyivi cua tyihi xeehe tsi yu nuu inga nyivi, tacan tucu yuhu cua tyihi xeehe yu tsi ñi nuu Jutu yu ra nyaá gloria.

*Nu caahán ra Jesús tyin tsa cuenda ra tan cua cañi tahan nyiví tsihin tahan ñi*

*(Lc. 12.51-53; 14.26-27)*

<sup>34</sup> Ña cuñi ndo tyin yuhu vatsí cuhva yu tsa coo taxin nyiví nu ñuhu ñayiví ihya. Yuhu vatsí yu vatsí cahan yu tuhun Nyoo tsihin ñi, tan cua natahvi ñi tsa cuenda yacan.

<sup>35</sup> Tyin yíhi ñi cua tsinu iñi ñi tsi yu, maa tyin inga ñi ña cua tsinu iñi ñi. Tan yacan cuenda, iin ra cua cañi tahan ra tsihin jutu ra. Tan iin ñaha cua cañi tahan ña tsihin síhi ña. Tan inga ña cua cañi tahan ña tsihin tyiso ña.

<sup>36</sup> Tan yacan cuenda juvin ñi maa nyiví vehe ndo cua cuxaan iñi tsi ndo.

<sup>37</sup> Nyiví tsa cuñí ca tsi jutu ñi a tsi síhi ñi tan ñavin ca tsi yuhu, ña cuví cuví ñi nyiví cuenda yu. Tan nyiví cuñí ca tsi sehe yí ñi a sehe síhi ñi, tan ñavin ca tsi yuhu, ña cuví cuví ñi nyiví cuenda yu.

<sup>38</sup> Tan nyiví tsa ña cuñí nyehe tundoho tan ndi ña cuñí ñi cuhva ñi ñayiví iyó ñi tsa cuenda yu, ña taahán tsi cuví ñi nyiví cuenda yu.

<sup>39</sup> Tyin nyiví cuñí xaan ca ñayiví iyó ñi, cua cunaa ñi. Maa tyin nyiví cua cuhva ñayiví iyó ñi tsa cuenda yu, cua ñihi ñi ñayiví nyito coo ñi.

*Nu caahán ra Jesús nácaa cua ñihi yo tsa vaha Nyoo*

*(Mr. 9.41)*

<sup>40</sup> Nyiví tsa naquihín cuenda tsi nyooho, tsi yuhu naquihín cuenda ñi, tan ñi naquihín cuenda tsi yuhu, quihín cuenda ñi tsi ra tsa jaquitsí tsi yu.

<sup>41</sup> Nyiví naquihín cuenda tsi iin ra cuví ndusu yuhu Nyoo tyin Nyoo jaquitsí tsi ra, cua ñihi ndihi

ñi tsa vaha tsa cua ñihi ra cuví ndusu yuhu Nyoo can. Tan nyivi naquihín cuenda tsi iin ra vaha tsa cuenda tyin ra vaha cuví ra, juvin ñi tsa vaha tsa cua ñihi ra vaha can cua ñihi ñi.

<sup>42</sup> Tan yóo nyivi tsa cuhva intuhun vasu ndutya vitsin coho nyivi tsa nyicún tsi yu, cua ñihi ndihí ñi tsa cua cuhva Nyoo tsi ñi tsa nyicún tsi yu —catyí ra Jesús.

## 11

*Nu jacuhun ra Juan tsi ra tsicá tsihin ra nu nyii ra Jesús*

*(Lc. 7.18-35)*

<sup>1</sup> Tsa ndihí cahan ra Jesús tsihin tsa utsi uvi ra tsicá tsihin ra, tacan tan quita ra ican, tyin cua cahan ra tuhun Nyoo tsihin nyivi tsa iyó ñuu tsa cayucú ityi can.

<sup>2</sup> Tan ra Juan nyii ra vehe caa quivi can, tan ñihí tuhun ra tsa javahá ra Cristo. Tacan tan jacuhun ra tsi uvi taahan ra tsicá tsihin ra, na ndaca tuhun ra naha tsi ra Jesús. Tan cuahan ra naha nu nyii ra.

<sup>3</sup> Tan catyí ra naha tsihin ra:

—¿A juvin yoocho cuví ra Cristo tsa nyaa tsa cua quitsi jacacu tsi ndi? O tatun ñavin un cuví, cuatu ndi tsi inga ra —catyí ra naha tsihin ra Jesús.

<sup>4</sup> Nacahan ra Jesús tan catyí ra:

—Cuaahan ndo tan catyi tuhun ndo tsihin ra Juan tandihí tsa nyehé ndo, tan tsa tsiñí ndo.

<sup>5</sup> Tan catyi ndo tsihin ra: nyivi cuaa nanyehé ñi, nyivi coxo nacacá ñi, nyivi ndohó cuehe tyaahyú nduvahá ñi, nyivi soho nacuñí ñi, tan nandotó nyivi tsa tsa tsihi, tan nyivi ndaahvi tsiñí ñi tuhun Nyoo nácaa cua cacu ñi.

<sup>6</sup> 'Tan catyi ndo tsihin ra tyin s̄i xaan cua cuvi tsi nyivi tsa nyicún tsi yu tun ña ndu uvi ñi ñi —catyí ra Jesús tsihin ra naha.

<sup>7</sup> Tsa cuahán ra naha, tan quitsaha caahán ra Jesús tuhun ra Juan tsihin nyivi, tan catyí ra:

—Quivi tsa tsahan ndo tsinyehe ndo nu tsiqui, ¿náa cua nyehe ndo cuñí maa ndo? ¿A nyehe ndo iin ndoo tsa janduvə tatyí?

<sup>8</sup> ¿O náa cuví tsa tsinyehe ndo? ¿A iin ra nditsí jahma vaha cua nyehe ndo? Ñavin. Tyin tsitó ndo tyin ra nditsí jahma vaha, iyó ra vehe ra cuví rey.

<sup>9</sup> ¿A ña tsahan ndo tsinyehe ndo tsi iin ra cuví ndusu yuhu Nyoo? Juvín. Tyin ra ican cahnu ca cuví ra tan ñavin ca tandihi ra cuví ndusu yuhu Nyoo.

<sup>10</sup> Juvín ñi tuhun ra Juan cuví tsa nyaá nuu tutu Nyoo. Tan catyí tsi tyehen:

Yuhu cua jacuhun yu iin ra cahan tuhun yu tsa ndi cumañi ca cuhun yu.

Tyin natyiso vaha ra ityi nu cua cuhun un.

<sup>11</sup> 'Tsa nditsa catyí yu tsihin ndo, tyin tsitsi tsa tandihi nyivi tsa tsicoo tan nyivi iyó vityin, tan ña cahnu ca cuví ñi tan ñavin ca ra Juan, ra jacoondutyá tsi nyivi. Maa tyin ra tsa ndaca ñaha Nyoo añima, vasu ra lihli ñi cuví ra, cahnu ca ra cuví ra tan ñavin ca ra Juan.

<sup>12</sup> 'Nda cuanda quivi tsa tsaə ra Juan tan nda vityin, nyivi ñihi ñi, nducú xaan ñi cuhva ñihi ñi tsa cundaca ñaha Nyoo tsi ñi.

<sup>13</sup> Ra Moisés cahan ra tuhun nácaa cua cundaca ñaha Nyoo tsi nyivi, tan tacan tucu tandihi ra cuví ndusu yuhu Nyoo. Tacan tan quitsi ra Juan jacoto

ra tsi nyivi tyin tsa tsaá quivi tsa cua cundaca ñaha Nyoo.

<sup>14</sup> Tan ra Juan cuví ra Elías ra tsa nyaá tsa cua quitsi, tun nyooho tan cuñi ndo tsinu iñi ndo tsa caahán yu.

<sup>15</sup> Nyooho tsa iyó soho, tyaa soho ndo tsa caahán yu.

<sup>16</sup> ¿Náa tsihin jandu inducu yu tsi nyooho, nyivi tsa iyó quivi ihya? Tumaa ra nyihi cuví nyooho. Tyin ra nyihi jasiqui nuyahvi. Caná tsa tahan ra naha tan catyí ra naha:

<sup>17</sup> “Tivi ndi tiyoo tan ña tsañi ndo yaa. Tan tsita ndi yaa cuihya, tan ña tsacu ndo”, catyí ra nyihi. [Tan tacan cuví nyooho tyin ndi intuhun cuhva ña taahán iñi ndo.]

<sup>18</sup> Tyin ra Juan, ra jacoondutyá, quitsi ra tan ña tsatsi vaha ra, tan ña tsihi ra vinu. Tan nyooho catyí ndo tyin tatyí ña vaha yihí tsi ra.

<sup>19</sup> Yahá can tan tsaá tucu yuhu Rayi tsa quee nda gloria. Tan tsatsí yu tan tsihí yu. Tan catyí ndo tyin tsatsí xaan yu tan tsihí xaan yu vinu, catyí ndo. Tan ña taahán iñi ndo tsa cutahán yu tsihin ra iyó cuatyí naha ra tan tsihin ra tavá xuhun cuenda ra ndacá ñaha naha ra. Tan vasu ña naquihín cuenda ndo tuhun caahán ndi, maa tyin Nyoo tsahá ra tsa tsiñi tuñi ra tsi nyivi naquihín tuhun caahán yu tan tuhun cahan ra Juan, tan ñi ican cua janaha ñi tsi ndo tyin vaha tsa tsiñi tuñi Nyoo —catyí ra Jesús.

*Nyivi ña cuñi naquihin cuenda tuhun caahán ra Jesús cua nyehe ñi tundoho  
(Lc. 10.13-15)*



<sup>20</sup> Tacan tan quitsahā caahán ra Jesús tsihin nyívi tandíhi ñuu nu javahā ra cuaha tsa iyo, tyin ña nasamañi ñi cuhva iyó ñi, tan catyí ra:

<sup>21</sup> —¡Ndahvi nyooho, nyívi ñuu Corazin! ¡Ndahvi nyooho nyívi ñuu Betsaida! Tyin nyehé ndo tsa iyo tsa javahá yu tan ña nasamañi ndo cuhva iyó ndo. Tan ñuu Tiro tan ñuu Sidón nduve tsa nyehe ñi. Maa tyin tun tsatyin nyehe ñi tsa nyehé nyooho vityin, numi xaan cua cunditsi ñi jahma tucuihya iñi tan cua coso ñi nyaa nuu ñi: tyin ndu uvi iñi ñi cuatyí ñi.

<sup>22</sup> Maa tyin catyí yu tsihin ndo tyin ñihi ca cua tatsi tuñi Nyoo tsi ndo tan ñavin ca ñi ñuu Tiro tan ñi ñuu Sidón.

<sup>23</sup> Tan nyooho nyívi ñuu Capernaum, cuñí maa ndo tyin cundaa ndo nda gloriá, maa tyin cua nuu ndo nda cuanda nu yucú nyívi tsihi anyaya. Tun tsatyin tsicoo tsa iyo nyehe ñi ñuu Sodoma tumaa tsa nyehé ndo ihya, ñuu can ña tsinaa tsi tan iyó tsi nda cuanda vityin.

<sup>24</sup> Maa tyin catyí yu tsihin ndo tyin quívi cua tatsi tuñi Nyoo tsi nyívi, ñihi ca cua tatsi tuñi ra tsi nyooho tan ñavin ca nyívi ñuu Sodoma.

*“Cuhva ndo tsi ndo tsi yu, tan cuhva yu tsa quitatu ndo”, catyí ra Jesucristo  
(Lc. 10.21-22)*

<sup>25</sup> Quívi can catyí ra Jesús tsihin Nyoo:

—Jacahnú yu tsi un, Jutu yu, ra ndacá ñaha gloriá tan ñuhu ñayívi. Tyin tyihí xeehe un tuhun ihya nuu ra tsitó xaan tan ra nyityi xaan naha ra. Tan jandunditsí un tuhun ihya nuu ra nyihi.

<sup>26</sup> Tacan Tyaa, tyin tacan cuñí maa un —catyí ra Jesús.

<sup>27</sup> Tacan tan catyí tucu ra tsihin nyivi:

—Jutu yu nacuhva cuenda ra tandihí tsa iyó tsi ra tsi yu. Yoñi maa nacotó tsi yu tsa nditsa, intuhun ñi maa Jutu yu nacotó vaha tsi yu. Tan Jutu yu yoñi nacotó tsi ra tsa nditsa. Intuhun ñi maa yu, tsa cuví Sehe ra tsi yu, tsitó yu tsi ra. Tan nyivi tsa cuñí yu tsa nacoto tsi Jutu yu, cua janaha yu tsi ra tsi ñi.

<sup>28</sup> Tandihí nyooho tsa tatú tyin jahá tyiñu ndo, tan tsihin tundoho tsa iyó ndo, ñaha ndo nu nyaá yu, tan yuhu cua kuhva yu tsa quitatu ndo.

<sup>29</sup> Cuhva ndo tsa cundaca ñaha yu tsi ndo tan cutuhva ndo kuhva iyó yu. Tyin yuhu ña xaan yu tan ña cahnu jahá yu tsi yu. Tacan tan cua quitatu añima ndo.

<sup>30</sup> Ña yí tsa kuhva ndo tsi ndo tsa cundaca ñaha yu. Tyin tsa tsahá yu cuiso ndo, yama tsi.

## 12

*Quivi quitatú nyivi cuví tsi tan ra tsicá tsihin ra Jesús tuhún ra naha yoco itya trigu*

*(Mr. 2.23-28; Lc. 6.1-5)*

<sup>1</sup> Iin quivi quitatú nyivi, yaha ra Jesús mahñu nu iyó tsa tatsi nyivi. Tan tsaá soco tsi ra tsicá tsihin ra. Tan quitsaha tuhún ra naha yoco trigu can tan tsatsí ra naha.

<sup>2</sup> Tan tsa nyehe ra fariseo naha ra yacan, catyí ra naha tsihin ra Jesús:

—Jihna, ra tsicá tsihin un javahá ra naha iin tyiñu tsa ña taahán tsi javahá yo quivi quitatú yo —catyí ra naha tsihin ra.

<sup>3</sup> Tan ra Jesús catyí ra tsihin ra naha:

—¿A ñaha ca cahvi ndo tsa javaha ra David tsihin ra cutahan tsihin ra qui<sub>v</sub>i tsa tsa<sub>a</sub> soco tsi ra naha?

<sup>4</sup> Quih<sub>v</sub>i ra tsitsi vehe Nyoo, qui<sub>h</sub>i<sub>n</sub> ra paan ii, tan tsats<sub>i</sub> ra naha. Tan ña taahán tsi catsi ra naha, ndi maa ra, tan ndi ra tsicá tsihin ra, tyin maa ñi maa ra cuv<sub>i</sub> jutu naha ra taahán tsi catsi paan can.

<sup>5</sup> ¿O ñaha ca cahvi ndo nu ley nu catyí tsi tyin ra cuv<sub>i</sub> jutu naha ra, jahá tyiñu ra naha tsitsi vehe ñuhu qui<sub>v</sub>i quitatú yo? Tan ñavin cuatyí cuv<sub>i</sub> can.

<sup>6</sup> Tan catyí yu tsihin ndo, tyin ihya nyaá ra tsa cahnu ca cuv<sub>i</sub> tan ñavin ca vehe ñuhu.

<sup>7</sup> Nyooho, ñaha ca cutuñi iñi ndo nu catyí tsi nu tuhun Nyoo tyehen: “Tsa cuñí ca yu javaha ndo cuv<sub>i</sub> tsa cundaahvi iñi ndo nyehe ndo tsi ny<sub>v</sub>i tahan ndo, tan ñavin ca tsa cahñi ndo qui<sub>t</sub>i tan jamañi ndo nuu yu.” Tun tsatyin cutuñi iñi ndo tuhun ihya, ña cua tyaa ndo cuatyí tsata ny<sub>v</sub>i tsa nduve cuatyí.

<sup>8</sup> Yuhu, Rayi tsa quee<sub>e</sub> nda gloria, iyó ndatu tsi yu tsa cahan yu tsihin intuhun intuhun ndo náa taahán tsi javaha ndo qui<sub>v</sub>i quitatú yo —catyí ra Jesús.

*Nu janduvaha ra Jesús tsi iin ra na ityi ndaha  
(Mr. 3.1-6; Lc. 6.6-11)*

<sup>9</sup> Tacan tan qui<sub>t</sub>a ra Jesús ican, tan cuahán ra vehe ñuhu.

<sup>10</sup> Tan ican nyií iin ra tsa na ityi ndaha. Tan yucú tucu juhva ra nducú cuhva náca tan tyaa ra naha cuatyí tsi ra Jesús. Yacan cuenda tsicá tuhun ra naha tsi ra tan catyí ra naha:

—¿A catyí ley tyin vaha janduvaha yo tsi nyivi cuuhví quivi quitatú yo? —catyí ra naha tsihin ra Jesús.

<sup>11</sup> Tan nacahan ra Jesús tan catyí ra:

—¿Ndáa nyooho, tatun canacava iin mbee jana ndo tsitsi iin yavi quivi quitatú yo, a ña cua cuhun ndo tan tava ndo tsi ti?

<sup>12</sup> Tan ¿a ña nyaá yahvi ca iin nyivi tan ñavin ca mbee? Yacan cuenda taahan tsi javaha yo tsa vaha quivi quitatú yo —catyí ra.

<sup>13</sup> Tacan tan catyí ra Jesús tsihin ra tsa na ityi ndaha can:

—Janacaa ndaha un —catyí ra.

Tan cuhva tsa janacaa ra ndaha ra, iin yaha ñi nduvaha tsi tumaa inga tsiyo.

<sup>14</sup> Tacan tan quitá ra fariseo naha ra cua natuhun tahan ra naha nácaa cua cahñi ra naha tsi ra Jesús.

*Tsa cahan ra Isaías, ra cuvi ndusu yuhu Nyoo, tsa cuenda ra Jesús tahan tsanaha*

<sup>15</sup> Tsa tsito ra Jesús tyin nducú ra naha tsi ra, quitá ra ican. Tan cuaha nyivi tsinyicun tsi ra. Tan maa ra janduvaha ra tsi tandihí ñi cuuhví.

<sup>16</sup> Tan catyí ra tsihin ñi tyin na ña catyi tuhun ñi yóo ra cuví ra.

<sup>17</sup> Tacan cuvi tyin tacan cahan ra Isaías, ra cuvi ndusu yuhu Nyoo tahan tsanaha. Tan tyehen tyaa ra tuhun Nyoo:

<sup>18</sup> Ra ihya cuví musu yu, ra tsa nacatsi vaha yu.

Cuñi xaan yu tsi ra, tan si xaan cuñi yu tsihin ra.

Cua cuhva yu Tatyí li yu tsi ra.

Tan cua jacoto ra tsi nyivi tsa ñavin nyivi Israel cuví, nácaa cua janduvaha yu tsi ñi nuu yu.

19 Tan ña cua cahan yuhu ra tan ndi ña cua cana tsaa ra, tan ña cua cahan ñihi ra ityi cahnu.

20 Tan ndi intuhun ndoo yacua, tan ña cua cahnu ndihi ra.

Tan ndi ña cua ndahva ndihi ra tiñuhu lihli nu caná luxu yuhma.

Nda cuanda coto tandihi nyivi tyin maa ra cuví ra ndacá ñaha tsi ñi.

21 Tan tandihi nyivi, tan cua cuita iñi ñi tsi ra.

*Nu xaan iñi tsi ra Jesús catyí nahnu tyin tsihin tunyee iñi nu ña vaha javahá ra tsa iyo (Mr. 3.20-30; Lc. 11.14-23; 12.10)*

22 Tacan tan tsindacá nyivi tsi iin ra yihí tatyí ña vaha nu nyíí ra Jesús, cuaa ra tan ñihi ra. Tan ra Jesús janduvahá ra tsi ra. Tacan tan nacahan ra, tan nanyehe ra.

23 Iyo xaan cuñí tandihi nyivi, tan catyí ñi:

—¿A ñavin ra ihya cuví tata ra rey David? —catyí ñi.

24 Tan cuhva tsa tsiñi ra fariseo naha ra tsa caahán ñi, catyí ra naha:

—Tsihin tunyee iñi nu Beelzebú, nu cuví ityi nuu tsihin nu ña vaha nahnu, tavá ra ihya tatyí ña vaha —catyí ra naha.

25 Maa tyin ra Jesús tsitó ra tsa tsicá iñi ra naha, yacan cuenda catyí ra tsihin ra naha:

—Tatun ra ndacá ñaha naha ra tan cua natahvi ra naha, tan cua cañi tahan ra naha, tacan tan cundihí tyiñu tsa ndacá ñaha ra naha. Tan tatun iin ñuu o tandihi nyivi iin vehe tan cusin ñi, tacan tan cua tivi nu yucú ñi.

26 Tan tacan tucu tatun nu ña vaha tan tava nu juvin ñi tahan maa nu, cuñí tsi catyí tyin ña iin

ñi cuví nahnu, tan cundihi tunyee iñi tsa iyó tsi nahnu.

<sup>27</sup> Tan nyooho catyí ndo tyin tsihin tunyee iñi nu Beelzebú tavá yu tsi nu tatyí ña vaha nahnu. Tun tsatyin tavá yu tsi nahnu tumaa cuhva catyí ndo, yóo tsahá tunyee iñi tsi ra nyicun tsi ndo tan tavá ra naha tsi nahnu. Maa ra naha cua cahan tsa nditsa tsihin ndo, tyin nyooho soho xaan tsicá iñi ndo.

<sup>28</sup> Yacan cuenda catyí yu tsihin ndo, tyin yuhu tavá yu tatyí ña vaha tsihin tunyee iñi Tatyí Ii Nyoo. Tan cuñí tsi catyí yacan tyin nditsa tyin tsa tsaꞥ cuhva ndacá ñaha Nyoo nu yucú ndo.

<sup>29</sup> 'Tan ¿yóo cuví quihvi tsitsi vehe iin ra xaan, tan quihin nyaa ra ndaha tyiñu ra? Yoñi. Maa tyin tatun cuhñi jihna ra tsi ra can, tacan tan cuví quihin nyaa ra tandihi tsa iyó tsi ra.

<sup>30</sup> Nyivi tsa ña nyaá tumañi iñi tsihin yu, ñi xaan iñi tsi yu cuví ñi. Ñi tsa ña jatyinyeé tsi yu tsa caahán yu tuhun Nyoo tsihin nyivi, cuñí tsi catyí tyin ña tsahá ñi tsa coto nyivi tuhun caahán yu.

<sup>31</sup> 'Yacan cuenda catyí yu tsihin ndo tyin Nyoo jahá ra tucahnu iñi cuatyí nyivi, tan tsihin náa tsa ña vaha caahán ñi, maa tyin tatun cua cahan ñi ndavaha ñi siqui Tatyí Ii Nyoo, yacan nditsa, ña cua jaha Nyoo tucahnu iñi tsi ñi.

<sup>32</sup> Tan yóo nyivi tsa caahán tsa ndavaha ñi siqui yuhu Rayii tsa quee nda gloria, Nyoo cua jaha ra tucahnu iñi tsi ñi tsa cuenda can. Maa tyin nyivi tsa caahán tsa ndavaha ñi siqui Tatyí Ii Nyoo, ña cua coo tucahnu iñi tsi ñi tsa cuenda cuatyí can, ndi ñuu ñayivi ihya, tan ndi inga ñuu ñayivi tsa cua coo.

*Tsihin tsa javahá nyivi tan nacoto yo tsi ñi taton vaha ñi a ña vaha ñi*  
(Lc. 6.43-45)

<sup>33</sup> 'Iin yutun vaha tsahá tun tsiti vaha. Tan iin yutun ña vaha tsahá tun tsiti ña vaha. Nacotó yo taton yutun vaha cuví tun tsa cuenda tsiti tun.

<sup>34</sup> ¡Nyooho, nyivi caquiñi tumaa tata coo xaan cuví ndo! ¿Nacaa cuví quitá tsa vaha yuhu ndo, tan nyivi caquiñi cuví ndo? Tyin tsa quitá tsitsi añima yo, yacan caahán yo.

<sup>35</sup> Nyivi vaha, vaha caahán ñi tyin yihí tsa vaha añima ñi. Tan nyivi caquiñi, tsa caquiñi caahán ñi, tyin tsa caquiñi yihí tsitsi añima ñi.

<sup>36</sup> Tan yuhu catyí yu tsihin ndo tyin quivi cua tatsi tuñi Nyoo tsi tandihí nyivi, cua cuhva cuenda ñi tandihí tuhun tsa ña vaha cahan ñi.

<sup>37</sup> Tyin tsa cuenda tsa caahán ndo, tan cua catyi Nyoo tun vaha ndo o ña vaha ndo.

*Nyivi ña vaha, tsa iyo ñi cuñí ñi nyehe ñi*  
(Mr. 8.12; Lc. 11.29-32)

<sup>38</sup> Tacan tan juhva ra fariseo tan ra maestro cuenda ley vehe ñuhu catyí ra naha tsihin ra Jesús:

—Maestro, cuñí ndi tyin javaha un iin tsa iyo tyin tacan tan coto ndi tun Sehe Nyoo cuví tsi un.

<sup>39</sup> Tan nacaḥan ra Jesús tan catyí ra:

—Nyivi ña vaha tan nyivi tsa nycún inga nyoo cuñí ñi nyehe ñi tsa iyo. Maa tyin ña cua nyehe ñi tsa iyo, intuhun ñi tsa cua nyehe ñi, tumaa tsa javahá Nyoo tsihin ra Jonás ra cuvi ndusu yuhu ra taḥan tsanaha.

<sup>40</sup> Tyin tumaa tsinyii ra Jonás tsitsi tyaca cahnu uñi quivi tan uñi tsacuaa, tacan cua cunyi yuhu

Rayi tsa quee nda gloria tsitsi ñuhu uñi quivi tan uñi tsacuaa.

<sup>41</sup> Tan quivi cua tatsi tuñi Nyoo tsi tandihí nyivi, cua nduvita nyivi tsicoo ñuu Nínive taħan tsanaha tan cua catyi ñi na tatsi tuñi Nyoo tsi nyooho nyivi tsa iyó vityin. Tan cua catyi ñi tyin cua cunaa ndo, tyin maa ñi tsa cuví ñi ñuu Nínive, nasama ñi cuhva iyó ñi quivi caħan ra Jonás tuhun Nyoo tsihin ñi. Tan ihya nyii ra cahnu ca cuví tan ñavin ca ra Jonás. [Tan ña cuñi ndo tyaa soho ndo tsa caahán yu.]

<sup>42</sup> Tan tacan tucu ñaha tsa tsindaca ñaha ityi Sur, cua nduvita ña quivi cua cutuñi nyivi tan cua catyi ña tyin cua cunaa nyooho nyivi iyó vityin, tyin maa ña, vasu cañi ñuu ña maa tyin quitsi ña, quitsi tyaa soho ña tsa nyityi tsa caħan ra Salomón. Tan vityin cahnu ca ra caahán tsihin ndo tan ñavin ca ra Salomón.

*Nu caahán ra Jesús tsihin yo nácaa quihvi nu tatyí ña vaha ańima yo inga tsaha tatun naa ińi yo tsi Nyoo (Lc. 11.24-26)*

<sup>43</sup> "Tatun iin nu tatyí ña vaha quita nu tsitsi ańima iin nyivi, tsicá nuu nu ñuhu ityi, nanducú nu iin nu quitatu nu. Tan ña nańihi maa nu nu quitatu nu. Tacan tan tsicá ińi nu:

<sup>44</sup> "Cunuhu yu nda vehe yu nu quee yu." Tacan tan cuahán nyico nu ańima nu quee nu. Tan nyehe nu tyin ndi xaan, tan yońi iyó, tan si xaan caá.

<sup>45</sup> Tacan tan cua quihin nu utsa taahan ca tatyí ña vaha, tsa yaha ca caquińi tan ñavin ca maa nu. Tacan tan iin caa ñi quihvi tandihí tatyí ña vaha can ańima ñi can. Yacan cuenda, yaha ca ndasi cua coo ñi tan ñavin ca tsa ndi cumańi ca quita nu. Tan tacan cua cuví tsi nyivi quińi iyó —catyí ra Jesús.



*Nu tsaḡa cuenda ra Jesús tyin tumaa cuví yañi ra, tan tumaa cuví sihi ra, cuví tsi nyivi tsa javahá cuhva cuñi Nyoo*

*(Mr. 3.31-35; Lc. 8.19-21)*

<sup>46</sup> Ndi caahán ca ra Jesús tsihin nyivi, tan tsaḡ sihi ra tan yañi ra, tan nyecú ñi ityi tsata vehe, tan cuñi ñi cahan ñi tsihin ra.

<sup>47</sup> Tacan tan jacoto iin ra tsi ra Jesús, tan catyí ra: —Sihi un tsihin ra yañi un naha ra nyecú ñi tsata vehe. Tan cuñi ñi cahan ñi tsihin un.

<sup>48</sup> Tan nacaḡan ra Jesús tan catyí ra tsihin ra can: —¿Yóo cuví sihi yu tan yóo cuví yañi yu? —catyí ra.

<sup>49</sup> Tacan tan janahá ndaha ra nu nyecú ra tsicá tsihin ra, tan catyí ra:

—Ra ihya naha ra cuví sihi yu tan yañi yu.

<sup>50</sup> Tyin tandihi nyivi tsa javahá cuhva cuñi Jutu yu, ra nyaá gloriá, juvin ñi can cuví yañi yu, tan cuhva yu, tan sihi yu —catyí ra Jesús.

## 13

*Nu caahán ra Jesús tyin tumaa iin ra tatsí, tacan cuví ra caahán tuhun Nyoo*

*(Mr. 4.1-9; Lc. 8.4-8)*

<sup>1</sup> Quivi can quita ra Jesús vehe nu nyii ra tan cuahán ra, tsicunyaḡ ra yuhu miñi.

<sup>2</sup> Tan cuaha xaan nyivi ndu iin nu nyaá ra, yacan cuenda quihvi ra tsitsi iin yutun ndoo tan tsinyaḡ ra. Tan tandihi nyivi ndoo ñi yuhu ndutya.

<sup>3</sup> Tacan tan quitsahá jacuahá ra tsi ñi tan caahán ra tsihin ñi tsihin iin cuhva, tan catyí ra:

—Quita iin ra vehe ra. Cuahán ra nu iyó tyiñu jahá ra, cuatatsí ra tsiti trigu ra.

<sup>4</sup> Tan cuhva tsa qui<sup>t</sup>i ra tsit<sup>i</sup> can, cucoyo<sup>o</sup> juhva tsi yuhu ityi. Tan quits<sup>i</sup> saa tan tsats<sup>i</sup> ti tsit<sup>i</sup> can.

<sup>5</sup> Tan juhva ca tsit<sup>i</sup> can cucoyo<sup>o</sup> tyañu yuu nu ña cuaha nyahyu yihí. Tan ican cana<sup>a</sup> tsit<sup>i</sup> can tsa numi ñi tyin ña cuaha nyahyu yihí tyañu yuu can.

<sup>6</sup> Maa tyin cuhva tsa cana<sup>a</sup> ñicanyii, numi ñi na ity<sup>i</sup> tsi, tyin ña cunu yihí yoho tsaha tsi.

<sup>7</sup> Juhva ca tsit<sup>i</sup> can cucoyo<sup>o</sup> tyañu iñu. Tan qui<sup>v</sup>i cana<sup>a</sup> trigu can tsahn<sup>u</sup> tsi iin caa ñi tsihin iñu can, tan iñu can numi xaan ca tsahn<sup>u</sup> tsi tan tsahñ<sup>i</sup> tsi trigu can.

<sup>8</sup> Maa tyin juhva ca tsit<sup>i</sup> can cucoyo<sup>o</sup> nu ñuhu vaha. Tan qui<sup>v</sup>i tsahn<sup>u</sup> tsi, vaha xaan tsaha<sup>a</sup> tsi tsit<sup>i</sup>. Tyin tsa iin tsit<sup>i</sup> can, cientu tsit<sup>i</sup> quita<sup>a</sup> tsihin tsi. Tan inga tsit<sup>i</sup> can, uñi xico, tan inga tsi oco utsi tsit<sup>i</sup> tsaha<sup>a</sup> tsi.

<sup>9</sup> ¡Tatun nyaá soho ndo, tyaa soho ndo tuhun caahán yu! —catyí ra Jesús.

*Nu catyí tuhun ra Jesús nacuenda jacuahá ra tsi ny<sup>i</sup>vi tan ña catyí tuhun catsi ra tsihin ñi*

*(Mr. 4.10-12; Lc. 8.9-10)*

<sup>10</sup> Tacan tan natuhva<sup>a</sup> ra tsicá tsihin ra Jesús, tan tsica<sup>a</sup> tuhun ra naha tsi ra, tan catyí ra naha:

—¿Nacuenda tyin tsihin cuhva ñi jacuahá un tsi ny<sup>i</sup>vi, tan ña catyí tuhun catsi un tsihin ñi? —catyí ra naha.

<sup>11</sup> Tan nacañan ra Jesús tan catyí ra:

—Tsi nyooho jacotó Nyoo tuhun xeehe, cuhva ndacá ñaha ra, maa tyin ny<sup>i</sup>vi ihya ña cuví coto ñi tsa tsaha<sup>a</sup> Nyoo tsi nyooho.

<sup>12</sup> Tyin tandih<sup>i</sup> ny<sup>i</sup>vi tsa cutuñí iñi tsa caahán yu tan javahá ñi, cuaha ca cua cutuñi iñi ñi. Tan

nyivi tsa ña cutuñí iñi, tan ña cuñí ñi javaha ñi, cua quihin nyaa ndihi yu tsa luxu ñi tsa tsitó ñi.

<sup>13</sup> Yacan cuenda caahán yu tsihin ñi tsihin cuhva, tyin nyehé ñi tan cuví tsi tumaa tsa ña nyehé ñi. Tsiñí ñi maa tyin ña cutuñí iñi ñi, tumaa tsa ña tsiñí ñi cuví can.

<sup>14</sup> Tyin tacan tan cundaa tsa cahán ra Isaías ra cuví ndusu yuhu Nyoo tahán tsanaha, tan catyí ra: Tsa nditsa tyin nyooho tsiñí ndo tuhun yu, maa tyin ña cutuñí iñi ndo.

Cua nyehe ndo tsa javahá yu, tan ña cua cutuñi iñi ndo.

<sup>15</sup> Tyin tsa ndundava xaan añima nyivi ihya, tan ña catsi vaha tsiñí ñi.

tan ndasí tinuu ñi,

na ña cua nyehe ñi tsihin tinuu ñi,

tan ña cua cuñi ñi tsihin soho ñi.

Tan ndi ña cua cutuñi iñi ñi tsihin añima ñi.

Tan ndi ña cua nanducu ñi tsi yu, na janduvaha yu tsi ñi.

<sup>16</sup> Maa tyin sii xaan cuví tsi nyooho, tyin nyehé ndo tsihin tinuu ndo, tan tsiñí ndo tsihin soho ndo.

<sup>17</sup> Tsa nditsa catyí yu tsihin ndo, tyin cuaha xaan ra cuví ndusu yuhu Nyoo tan cuaha xaan nyivi vaha, cuñi ñi nyehe ñi tsa nyehé nyooho tsa javahá yu, maa tyin ña nyehe ñi. Tan cuñi ñi tyaa soho ñi tandihi tsa tsiñí nyooho vityin, maa tyin ña tsiñi ñi.

*Nu catyí tuhun ra Jesús tsa cuñí tsi catyí cuhva tsa cahán ra tsihin nyivi tsa cuenda ra tatsi can*

*(Mr. 4.13-20; Lc. 8.11-15)*

<sup>18</sup> Tyaa soho ndo tsa cuñí tsi catyi cuhva tsa cahán yu tsa cuenda ra tsa tatsí tsiti trigu can:

19 Nyiví tsa tsiñí tuhun nácaa cuñí Nyoo cundaca ñaha ra añima ñi, tan ña cutuñí iñi ñi, cuví ñi tumaa nu cucoyo tsiti trigu yuhu ityi. Tan quítsi nu ña vaha tan quihín nyaa nu tuhun Nyoo tsa iyó añima ñi.

20 Tan tumaa nu cucoyo tsiti can tyañu yuu, juven ñi nyiví tsa tsiñí tuhun Nyoo cuví can. Tan sii xaan naquihín vaha ñi itsi juhva ñi quivi.

21 Tyin nduve ñuhu cunu ican, yacan cuenda cana tsiti can, maa tyin ña cuví cahun yoho tsi. Tan tacan cuví nyiví can. Juhva ñi quivi tsinú iñi ñi. Maa tyin quivi tsa quítsahá nyehe ñi tundoho, tan caahán ndasi nyiví tsata ñi tsa cuenda tuhun Nyoo, tacan tan jandihí ñi tsa tsinú iñi ñi.

22 Tan tumaa nu cucoyo tsiti can tsitsi iñu, juven ñi nyiví tsa tsiñí tuhun Nyoo cuví can. Tsiñí ñi, maa tyin ña cuñí ñi javaha ñi tumaa tsiñí ñi. Tyin tyaá xaan ca iñi ñi tundoho ñayiví tan ñavin ca tuhun Nyoo. Tan nyiyo ca iñi ñi tsa cuca. Tan tandihí tuhun can jatyañú tsi tsi ñi, tan cuví ñi tumaa yutun tsa ña tsahá tsiti.

23 Tan ñuhu vaha nu cucoyo tsiti can, yacan cuví inga nyiví tsa tsiñí tuhun Nyoo, tan cutuñí iñi ñi, tan javahá ñi tandihí tuhun caahán ra. Yihí ñi cuví ñi tumaa tsiti tsa cana tan tsaha tsi iin cientu tsiti, tan inga ñi cuví ñi tumaa tsiti tsa tsahá uñi xico, o tumaa tsiti tsa tsahá oco utsi tsiti intuhun intuhun.

*Nu caahán ra Jesús nácaa cuahán tuhun trigu tan cuhu ña vaha*

24 Tan cahan tucu ra Jesús inga cuhva ihya tsihin ñi; tan catyí ra:

—Tsa ndacá ñaha Nyoo tsi nyiví cuví tsi tumaa iin ra tsa tatsi tsiti trigu nu ñuhu ra.

<sup>25</sup> Tan cuhva tsa quixí tandihí ra jahá tyiñu naha ra, quihví iin ra xaan iñi tsi ra jatsii can, tan quiti ra tsiti cuhu ña vaha, tan cuahán ra.

<sup>26</sup> Tan quiví caná tsiti trigu can, tan caná yoco tsi, caná ndihí tucu cuhu ña vaha can.

<sup>27</sup> Tacan tan ra cuví musu can naha ra, tsahan ra naha tsicatyí tuhun ra naha tsihin tsitoho ra naha: “Tata, maa ñi tsiti trigu tatsi ndi, ¿tan nacuenda tyin caná cuhu ña vaha can?” catyí ra naha.

<sup>28</sup> Tan nacahan ra can tan catyí ra: “Iyó iin ra xaan iñi tsi yu javaha tsehe, tun cuvi.” Tacan tan musu can, catyí ra naha tsihin tsitoho ra: “¿A cuñí un tyin cuhun ndi tan tuhun ndi cuhu ña vaha can?”

<sup>29</sup> Tan tsitoho ra naha catyí ra: “Ña tuhun ndo, tyin coto tuhun ndihí ndo trigu can.

<sup>30</sup> Jaña ndo, na cuahnu maa tsi iin caa ñi tsihin trigu can, tatun tsa tsitsa tsi, tacan tan cua tava tyiñu yu na tuhun jihna ra naha cuhu ña vaha can, tan cuhñi ra naha cuenda jucun, tan cahmi ra naha. Tan yaha can tan natyihi vaha ra naha tsa vaha can tsitsi yaca yu.”

*Nu caahán ra Jesús tyin tumaa tsiti mostaza cuví tsa ndacá ñaha Nyoo tsi yo*

*(Mr. 4.30-32; Lc. 13.18-19)*

<sup>31</sup> Tacan tan cahan ra Jesús inga cuhva ihya tsihin ñi tan catyí ra:

—Tsa ndacá ñaha Nyoo tsi nyiví cuví tsi tumaa iin tsiti mostaza tsa tatsi iin ra nu ñuhu ra.

<sup>32</sup> Tyin tsiti can lihli ñi tsi tan ñavin ca tandihí ca tsiti. Maa tyin quiví tsahnū tsi cuví tsi iin yutun.

Tan quitsi saa, tan javahá ti taca ti soco tun —catyí ra Jesús.

*Nu caahán ra Jesús tyin tumaa yutsan iya tacan cuví tsa ndacá ñaha Nyoo tsi yo*

*(Lc. 13.20-21)*

<sup>33</sup> Tan cahan ra Jesús inga cuhva ihya tsihin ñi tan catyí ra:

—Tsa ndacá ñaha Nyoo tsi nyivi cuví tsi tumaa yutsan iya tsa nasaca nuu iin ñaha tsihin uñi jahma yutyi paan. Tyin tumaa ndaá tandihi yutsan paan can jahá tsa luxu ñi yutsan iya can, tacan cuví tsa ndacá ñaha Nyoo tsi yo —catyí ra.

*Nu catyi tuhun ra Jesús nacuenta jacuahá ra tsi nyivi tsihin cuhva*

*(Mr. 4.33-34)*

<sup>34</sup> Tandihí tuhun can cahan ra Jesús tsihin nyivi tsihin cuhva. Tan tandihí tsa cahan ra tsihin ñi ña cahan catsi maa ra, maa ñi maa tsihin cuhva cahan ra.

<sup>35</sup> Tacan cuvi tyin tacan tan cundaa tsa cahan Jutu Mañi yo tsihin yuhu ra cuvi ndusu yuhu ra tahan tsanaha tan tyaa ra tyehen:

Tsihin cuhva cua cahan yu tsihin nyivi.

Cua cahan yu tsihin ñi tuhun tsa yihí xeehe nda cuanda tsa javaha Nyoo ñuhu ñayivi.

*Nu caahán ra Jesús náa cuñí tsi catyí cuhu ña vaha tsa caná tsihin tsiti trigu can*

<sup>36</sup> Tacan tan jacunuhu ra Jesús tsi nyivi, tan quihvi ra tsitsi vehe nu nyii ra. Tan natuhva ra tsicá tsihin ra nu nyaá ra, tan catyí ra naha tsihin ra:

—Catyi tuhun tsihin ndi náa cuñí tsi catyi tsa cahān un tsihin nyívi tsa cuenda cuhu ña vaha tan trigu can.

<sup>37</sup> Tacan tan quitsaha catyí ra Jesús tsihin ra naha:

—Ra tsa tatsi tsiti trigu can cuví yuhu Rayi tsa quee nda gloria.

<sup>38</sup> Tan ñuhu can cuví nyívi iyó nu ñuhu ñayívi. Tan tsiti trigu can cuví nyívi tsa ndacá ñaha Nyoo. Tan cuhu ña vaha can cuví nyívi tsa nyicún tsi nu ña vaha.

<sup>39</sup> Tan nu tsa tatsi cuhu ña vaha can, nu ican cuví nu ña vaha juvin ñi nu tsa xaan iñi tsi yu. Tan quívi cua naquihin yu tyiñu jahá yu, yacan cuñí tsi catyí quívi cua cundihi ñuhu ñayívi. Tan ra tsa cua naquihin tsiti can, cuví ra ángel naha ra.

<sup>40</sup> Tumaa jataca ra naha cuhu ña vaha can tyin cayu tsi, tacan cua cuvi quívi cua cundihi ñayívi.

<sup>41</sup> Yuhu Rayi tsa quee nda gloria cua jaquitsi yu ángel tan jataca ra naha tsi nyívi natyuhu tsi inga nyívi na javaha ñi tsa ña vaha tan inga nyívi tsa iyó cuatyí.

<sup>42</sup> Tan cua tyihi ra naha tsi ñi tsitsi ono nu cayú ñuhu. Tan ican cua vacu tsa ñi tan cahyu ña cua cuvi nuhu ñi.

<sup>43</sup> Nyooho tan nyívi javahá cuhva cuñí Nyoo cua quituvi ndo nuu Jutu yo. Tan cua cuvi ndo tumaa tsa nditsin ñuhu ñicanyii, nu ndacá ñaha Jutu yo. Tatun iyó soho ndo, tyaa soho ndo tsa caahán yu.

### *Xuhun cuaan tsa yihí xeehe*

<sup>44</sup> Tsa ndacá ñaha Nyoo tsi nyívi cuví tsi tumaa xuhun cuaan tsa yihí xeehe tsitsi ñuhu. Tan iin ra

nañihí ra xuhun cuaan can, tan tyihí xeehe nyico ra inga tsaha, tan sii xaan cuñí ra cuanuhu ra tan xico ra tandihí tsa iyó tsi ra. Tacan tan jata ra ñuhu nu yihí xeehe xuhun cuaan can.

*In cuhva tsa cahān ra Jesús cuenda iin yuu xiñu tsa yahvi xaan nyaá*

<sup>45</sup> Tan tsa ndacá ñaha Nyoo tsi nyivi, cuví tucu tsi tumaa iin ra najatá yuu xiñu tan naxicó nyico ra,

<sup>46</sup> tan tsa ñihí ra iin tsa yahví xaan nyaá, xico ra tandihí maa tsa cumí ra, tan jata ra yuu xiñu vaha can.

*Nu caahán ra Jesús iin cuhva cuenda traya*

<sup>47</sup> Tan juvin ñi cuví tucu tsa ndacá ñaha Nyoo tsi nyivi tumaa iin traya tsa cañí ra naha nu ndutya ñuhu, tan ñihí ra naha tandihí nuu tyaca.

<sup>48</sup> Tan tsa tsitu traya can tsihin tyaca, tavá ra naha traya can nu ityi. Tan ican nacatsí ra naha tsi ti, naquihín vaha ra naha quití vaha tsitsi iin tyica, tan javitá ra naha quití ña vaha can.

<sup>49</sup> Tan tacan cua cuvi quivi naa ñayivi, cua quitsi ángel, quitsi tava sin ra naha tsi nyivi vaha tan nyivi ña vaha.

<sup>50</sup> Tan cua tyihí ra naha tsi nyivi ña vaha can anyaya nu cayú ñuhu, nu cua vacu tsaa ñi tan cahyu ña cua cuvi nuhu ñi.

*Nu caahán ra Jesús tyin vaha tuhun tsahnu Nyoo tan tuhun tsaa Nyoo*

<sup>51</sup> Tacan tan ra Jesús tsica tuhun ra tsi ra tsicá tsihin ra, tan catyí ra tsihin ra naha:

—¿A cutuñj iñi ndo tandihí tsa cahān yu?

Tan nacahān ra naha tan catyí ra naha:



—Cutuñi iñi ndi, Jutu Mañi yu.

<sup>52</sup> Tacan tan catyí ra Jesús tsihin ra naha:

—Iin ra cuví maestro cuenda ley tsa tsitó maa ra tuhun tsahnu tan tatun cua coto ndihi ra nácaa ndacá ñaha Nyoo tsihin tandihi tuhun tsa tsa caahán yu, cua cuvi ra tumaa iin ra jatsii vehe tan cua jacuaha ra nduvi taahan tuhun vaha can tsi nyivi —catyí ra Jesús.

*Nu tsinuhu ra Jesús ñuu Nazaret nu tsahnu ra  
(Mr. 6.1-6; Lc. 4.16-30)*

<sup>53</sup> Tsa ndihi cahan ra Jesús cuhva ihya tan quita ra cuahán ra.

<sup>54</sup> Tan tsa nyico ra ñuu ra. Tan quitsaha jacuahá ra tsitsi vehe ñuhu ñuu can. Tan iyo cuñi nyivi tan catyí ñi:

—¿Nu maa tahan cutuhva ra ihya tsa tsitó xaan ra? ¿Tan nácaa cuví javaha ra tsa iyo?

<sup>55</sup> Tyin sehe ra tahví yutun can cuví tsi ra. Tan ña María cuví sihi ra. Tan yañi ra cuví tsi ra Jacobo, ra José, ra Simón tan ra Judas.

<sup>56</sup> Tan cuhva ra iyó tucu ñi ityi nu iyó yo. Tun tacan, ¿nu maa tahan cutuhva ra tandihi tsa tsitó ra? —catyí ñi.

<sup>57</sup> Tan yacan cuenda ña cuñi ñi tyaa yahvi ñi tsi ra. Maa tyin ra Jesús catyí ra tsihin ñi:

—Tandihí nyivi tandihí ñi ityi jahá ñi tsa ñayivi tsi ra ndusu yuhu Nyoo, maa tyin nyivi ñuu ra ña tyaá yahvi ñi tsi ra tan ndi nyivi vehe ra —catyí ra Jesús.

<sup>58</sup> Tan ña cuaha tsa iyo javaha ra ñuu ra tsa cuenda tyin ña tsinú iñi ñi tsi ra.

# 14

*Nu catyí tsi nácaa tsihi ra Juan, ra jacoondutyá tsi nyivi*

*(Mr. 6.14-29; Lc. 9.7-9)*

<sup>1</sup> Qui<sup>i</sup>vi can ra Herodes, ra ndacá ñaha ñicahnu nu cuví Galilea, ñih<sup>i</sup> tuhun ra tsa javahá ra Jesús.

<sup>2</sup> Tan catyí ra tsihin ra yucú tsihin ra:

—Ra ican cuví ra Juan, ra jacoondutyá tsi nyivi, ra tsa tsihi tan vityin nandoto nyico ra. Yacan cuenda iyó tunyee ñi tsi ra tsa javahá ra tsa iyo.

<sup>3-4</sup> Tacan catyí ra tyin juvin ñi maa ra tava tyiñu tyin tiin ra naha tsi ra Juan. Tan cuhñi ra naha tsi ra tsihin cadena, tan tyihi ra naha tsi ra vehe caa. Tacan javahá ra Herodes tyin xaan cuñí ra tyin catyí ra Juan tyin ña vaha tsa cumí ra tsi ña Herodías tyin ña ican cuví ñasihi ra Felipe, yañi ra.

<sup>5</sup> Yacan cuenda ra Herodes cuñi ra cahñi ra tsi ra Juan, maa tyin yuuhví ra tsi nyivi, tyin tandihi ñi tsinú ñi ñi tyin ra Juan, ndusu yuhu Nyoo cuví ra.

<sup>6</sup> Tan iin qui<sup>i</sup>vi iyó vico ra Herodes, tan sehe ña Herodías quitsahá tsañí ña yaa nu yucú ñi vico can. Tan tahañ xaan ñi ra Herodes.

<sup>7</sup> Tan catyí ra:

—Naha Nyoo tyin cua cuhva yu náa cua ndacan ñaha tyuvaa ihya tsi yu —catyí ra Herodes.

<sup>8</sup> Tacan tan natyuhú sihi ña tsi ña, na cahan ña tsihin ra Herodes. Tacan tan catyí ña tyehen tsihin ra:

—Cuhva jiñi ra Juan, ra jacoondutyá tsi nyivi, tsi yu nu iin coho —catyí ña.

<sup>9</sup> Tsa tsiñi ra rey Herodes tsa cahan ña, nducui-ihya cuñí ra. Maa tyin tsa cuenda tsa cahan ra

tyin tandihí tsa cua ndacan ña tan cua cuhva ra, yacan cuenda ña cuvi jandaví ñaha ra tyin tandihí nyívi yucú vico can tan tsiñi ñi tsa cahan ra. Yacan cuenda tava tyiñu ra na cuhva ra naha jiñi ra Juan tsi ña nu iin coho.

<sup>10</sup> Tan tava tyiñu ra na cucahnya ra naha jucun ra Juan nu nyii ra vehe caa.

<sup>11</sup> Tacan tan tsindaca ra naha jiñi ra Juan tsi ña, nyii tsi nu iin coho. Tan tsaha ra naha tsi ñaha tyuvaa can. Tan maa ña nacuhva cuenda ña tsi sihi ña.

<sup>12</sup> Tacan tan tsaq ra nyicun tsi ra Juan naha ra tan naquihin ra naha cuñu ñuhu ra, tan tyihí ra naha tsitsi ñuhu. Yaha can tan tsahan ra naha tsjacoto ra naha tsi ra Jesús.

*Nu jacatsi ra Jesús tsi uhun mil rayi  
(Mr. 6.30-44; Lc. 9.10-17; Jn. 6.1-14)*

<sup>13</sup> Tsa tsito ra Jesús tsa tahan ra Juan, quihin ra iin yutun ndoo, tan cuahan intuhun ñi maa ra nu taxin caa. Tan tsa tsito nyívi, quita ñi ñuu ñi, tan cuahan tshin tsaha ñi nu nyii ra.

<sup>14</sup> Tsa quita ra Jesús tsitsi yutun ndoo can, tan nyehe ra tyin cuaha xaan nyívi nyicun tsi ra. Tan cundaahvi ñi ra nyehe ra tsi ñi. Tan janduvaha ra tsi nyívi cuuhvi tsa tsaq tshin ñi.

<sup>15</sup> Tan tsa cuñi cuaa, tacan tan natuhva ra tsicá tshin ra Jesús nu nyaá ra, tan catyí ra naha tshin ra:

—Tsa cueñi xaan, tan yoñi nyívi iyó yatyin ñi ihya. Yacan cuenda vaha ca cahan un tshin nyívi ihya na cunuhu ñi nda ñuu cujata ñi tsa catsi ñi —catyí ra naha tshin ra Jesús.

<sup>16</sup> Tan ra Jesús catyí ra:

—Nduve náa nducu ñi cuhun ñi. Cuhva nyooho tsa catsi ñi.

<sup>17</sup> Tan nacahan ra naha tan catyí ra naha:

—Nduve maa náa iyó ihya. Uhun taahan ñi paan, tan uvi taahan ñi tyaca iyó.

<sup>18</sup> Tan catyí ra Jesús:

—Ndaca ndo can tsi yu.

<sup>19</sup> Tacan tan catyí ra tsihin nyivi tyin na cunyecu ñi nu cuhu can. Yaha tsa tsinyecu ñi tan quihin ra uhun taahan paan can, tan nduvi tyaca can. Tan nanyehe ndaa ra ityi siqui, tan nacuhva ra tyahvi nyoo tsi Nyoo tan tsahnū cuatyí ra paan can. Tan tsaha ra tsi ra tsicá tsihin ra, na tsatsa ra naha tsi nyivi can.

<sup>20</sup> Tan tandihi nyivi tsatsi ñi tan ndaha vaha iñi ñi. Yaha can tan ndoo ca tsa ñahñu, tan jacutu ra naha utsi uvi tyica tsihin tsa ñahñu ican.

<sup>21</sup> Tan tsa tandihi ñi tsa tsatsi can, quita maa tumaa uhun mil tsa maa ñi maa rayi. Tan siin maa ñiñaha tan tsa nyihi.

*Nu tsicá ra Jesús nu ndutya  
(Mr. 6.45-52; Jn. 6.16-21)*

<sup>22</sup> Tsa yaha can tan catyí ra Jesús tsihin ra tsicá tsihin ra, na quihvi ra naha tsitsi yutun ndoo, tan na yaha sava ra naha nu miñi can tan cuhun ra naha inga tsiyo. Tan tsitsi tsa cuahán ra can naha ra, ra Jesús ndoo ra tan catyí ra tsihin nyivi tyin na cuhun ñi.

<sup>23</sup> Tsa yaha tsa jacunuhu ra tsi ñi, tan ndaa ra yucu can cua ndacan tahvi intuhun ñi maa ra tsi Nyoo. Maa tyin tsitsi tsa nyii ra can tan cuaa.

<sup>24</sup> Tan tsitsi tsa tsicán tahvi ra tsi Nyoo, yutun ndoo can tsa cuahán cuii tsi nda mahñu miñi. Tan

ndutya miñi can cañí tsi tsi yutun ndoo can tsa cuenda tyin ñihi xaan yihí tatyí nu cuahán ra naha.

<sup>25</sup> Tan tsa cua tuvi cuahán ndihi ra Jesús nu cuahán ra naha tsihin yutun ndoo can, tan tsicá tsihin tsaha ra cuahán ra nu ndutya.

<sup>26</sup> Tan cuhva tsa nyehe ra naha tsi ra, tsicá ra nu ndutya can, nayuhvi xaan ra naha. Tan caná tsaa ra naha, tan catyí ra naha:

—¡Jihna ndo xin. Tatyí vatsí can!

<sup>27</sup> Maa tyin nacahan ra Jesús tsihin ra naha, tan catyí ra:

—¡Ña nayuhvi ndo tyin maa yu cuví! —catyí ra.

<sup>28</sup> Tacan tan nacahan ra Pedro tan catyí ra:

—Jutu Mañi yu, tatun maa un vatsí juvin, cuhva tsa quitsi ndihi yu nu vatsí un.

<sup>29</sup> Tan ra Jesús catyí ra tsihin ra:

—Naha jiin.

Tacan tan quitá ra Pedro tsitsi yutun ndoo can, tan quitsahá tsicá ra nu ndutya tan cuahán ra nda nu vatsí ra Jesús.

<sup>30</sup> Maa tyin cuhva tsa tuvi iñi ra tyin ñihi xaan quitsahá yihí tatyí, nayuhvi xaan ra, tacan tan quitsahá cuñí nyee ra, tan quitsahá caná tsaa ra tan catyí ra:

—¡Jacacu tsi yu, Jutu Mañi yu!

<sup>31</sup> Tan iin yaha ñi tñin ra Jesús ndaha ra, tan catyí ra tsihin ra:

—¿Nacuenda tsa nayuhvi un, yoocho tsa luxu xaan tsinú iñi tsi yu? —catyí ra Jesús tsihin ra.

<sup>32</sup> Tan cuhva tsa quihvi ra naha tsitsi yutun ndoo can, cutaxin tatyí can.

<sup>33</sup> Tacan tan ra yucú tsitsi yutun ndoo can tsicuiñi tsiti ra naha nuu ra Jesús, tan catyí ra naha tsihin ra:

—Nditsa nditsa tyin Sehe Nyoo cuví tsi yooho —catyí ra naha.

*Nu janduvaha ra Jesús tsi nyivi cuuhví tsa iyó Genesaret*

*(Mr. 6.53-56)*

<sup>34</sup> Tsa yaha sava ra naha miñi can, tsaá ra naha ñuhu Genesaret.

<sup>35</sup> Tan cuhva tsa nacoto nyivi iyó ican tsi ra Jesús tyin juvin ra cuví, jacoto ñi tsi tandihí nyivi iyó tanií cahnu can. Tan tsindaca ñi tandihí nyivi cuuhví nu nyii ra.

<sup>36</sup> Tan caahán ndaahvi ñi tsihin ra, na cuhva ra tsa tiin ñi vasu luxu jahma ra. Tan tandihí ñi tsa tiin jahma ra, nduvaha ñi.

## 15

*Tsa jativí tsi nyivi nuu Nyoo*

*(Mr. 7.1-23)*

<sup>1</sup> Tacan tan juhva ra cuví fariseo tan ra cuví maestro cuenda ley vehe ñuhu quee ra naha ñuu Jerusalén. Tan tsahan ra naha nu nyii ra Jesús tan tsica tuhun ra naha tsi ra, tan catyí ra naha:

<sup>2</sup> —¿Nacuenda ña javahá ra tsicá tsihin un naha ra cuhva nacoo tsii tsaahnu yo?, tyin catyi ra ican naha ra tyin iyó iin cuhva ndoo ndaha yo tsa ndi cumañi ca catsi yo, maa tyin ra tsicá tsihin un ña tyaá yahvi ra naha tuhun tsahnu can —catyi ra naha.

<sup>3</sup> Tan tsica tuhun ra Jesús tsi ra naha, tan catyí ra:

—¿Nacuenda tyaá yahvi xaan ca ndo tuhun tsahnu tsa iyó ndo tan ña cuñí ndo tyaa yahvi ndo tsa caahán Nyoo?

<sup>4</sup> Tyin Nyoo catyí ra: “Tyaa yahvi ndo tsi jutu ndo tan tsi sihi ndo, tyin tandihi nyivi tsa caahán ndavaha ñi siqui jutu ñi o sihi ñi, cua cúu ñi”, catyí Nyoo.

<sup>5</sup> Maa tyin nyoocho catyí ndo tyin cuví catyí ndo tsihin jutu ndo o tsihin sihi ndo tyehen: “Ña cuví jatyinyee yu tsi un tyin tsa tsaha yu tandihi tsa iyó tsi yu tsi Nyoo.”

<sup>6</sup> Tatun tsa catyí ndo yacan, ña cuñí tsi tsa jatyinyee ndo tsi jutu ndo o tsi sihi ndo, catyí ndo. Tan yacan cuví tsa javahá ndo vityin, tyaá tsiyo ndo tsa caahán Nyoo tan tyaá yahvi xaan ca ndo tuhun tsahnu tsa iyó ndo.

<sup>7</sup> ¡Nyoocho cuñí ndo tyin vaha xaan ndo, maa tyin ña nditsa ndo! Nditsa tsa cahan ra Isaías, ra cuví ndusu yuhu Nyoo, siqui ndo jahá Nyoo. Tan catyí ra tyehen:

<sup>8</sup> Nyivi ihya, jacahnú ñi tsi yu tsihin yuhu ñi.

Maa tyin ñavin tsihin tsa ñi ñi ñi.

<sup>9</sup> Yacan cuenda nduve yahvi nyaá jacahnú ñi tsi yu.

Tyin maa ñi tuhun caahán jacuahá ñi, tan ñavin tuhun yu jacuahá ñi.

Catyí ra Isaías tuhun ndo jahá Nyoo, catyí ra Jesús tsihin ra ican naha ra.

<sup>10</sup> Tacan tan cana ra Jesús tsi nyivi tan catyí ra tsihin ñi:

—Tyaa soho ndo tsa caahán yu, tan nducu ndo cuhva cutuñi ñi ndo.

11 Tyin nyivi tsa tiví nuu Nyoo, ñavin tsa quihví yuhu ñi jatí tsi ñi. Tyin tiví ñi jahá tsa quitá yuhu ñi.

12 Tacan tan natuhv̄a ra tsa tsicá tsihin ra Jesús tan catyí ra naha tsihin ra:

—¿A tsitó un? Ra fariseo naha ra ndasi xaan cuñí ra naha tsa tsiñi ra naha tsa cah̄an un.

13 Tan maa ra Jesús nacah̄an ra tan catyí ra:

—Tandih̄i yutun tsa ña tatsi Jutu yu, ra nyaá gloria, cua tuhun ra nda cuando yoho tun.

14 Jaña ndo tsi ra fariseo naha ra tyin ra cuaa cuví ra naha, tan janahá ra naha ityi tsi inga ra cuaa. Tan tatun iin ra cuaa tan janahá ra ityi tsi inga ra cuaa, nduvi taahan ra naha cua nacava ra naha tsitsi yavi —catyí ra Jesús.

15 Tacan tan quitsah̄a catyí ra Pedro tsihin ra Jesús:

—Catyi tuhun tsihin ndi náa cuñí tsi catyi tsa cah̄an un nañi.

16 Tacan tan ra Jesús catyí ra tsihin ra naha:

—Ndi nyooho tan ña cutuñí ndih̄i iñi ndo.

17 ¿A ña cutuñí iñi ndo tyin tsa tsatsí yo, tsitsi yo cuahán tsi? Yah̄a can tan cua quita nyico tsi.

18 Maa tyin tuhun tsa quitá yuhu yo, tsitsi añima yo queé can tan nyivi tiví ñi nuu Nyoo jahá tsa caahán ñi.

19 Tyin tsa caquiñi tsicá iñi ñi tsitsi añima ñi quitá can, tan cuñí ñi cah̄ni ñi nyivi. Cuñi ñi suhu ñi. Yihí nyivi caahán ñi cuendu, o jacuñí nyaa ñi tsi inga ca nyivi. Yihí ra cuñí ra coo inga ñaha ra, o ñiñaha iyó yñi tsicá nuu ñi tsihin inga rayñi. Yihí ra tsicoó ra tsihin ñaha tan ña tindaha ra tsihin ña.



Tan yihí rayi quixí ra tsihin juvin ñi maa rayi. Tan ñiñaha yihí ñi quixí ñi tsihin juvin ñi maa ñaha. Tan tandihí ca maa tsa caquiñi tsa javahá ñi tsihin cuñu ñuhu ñi.

<sup>20</sup> Yacan cuví tsa jativí tsi nyivi nuu Nyoo. Tyin tsa ña nacatyá ñi ndaha ñi tsa ndi cumañi ca catsi ñi, ña jativí can tsi ñi —catyí ra Jesús.

*Nu tsinu iñi iin ñaha inga ñuu tsi ra Jesús  
(Mr. 7.24-30)*

<sup>21</sup> Quita ra Jesús ñuu can tan cuahán ra ityi ñuu Tiro tan Sidón.

<sup>22</sup> Tan ityi can iyó iin ñaha Canaán. Tan tsa nyehe ña tsi ra Jesús natuhva ña nu nyaá ra tan caná tsa ña tan catyí ña:

—Jutu Mañi yu, tata ra David, cundaahvi iñi tsi yu, tyin sehe yu yihí tatyí ña vaha tsi ña, tan nyehé xaan ña tundoho jahá nu —catyí ña tsihin ra Jesús.

<sup>23</sup> Maa tyin tumaa tsa ña tsiñi ñi ra Jesús jahá ra tsi ra tan ña nacahan ra tsa iin yaha ñi. Tacan tan natuhva ra tsicá tsihin ra tan catyí ra naha tsihin ra:

—Cahan tsihin ña na cunuhu ña tyin utsan xaan yo tsa caná tsa ña tsata yo.

<sup>24</sup> Tacan tan catyí ra Jesús tsihin ra naha:

—Vatsí yu jahá Nyoo ñuu Israel tyin naquihin ndaahvi yu nyivi ñuu can tsa cuví ñi tumaa mbee tsa cuanaá. Tan tsa cuenda nyivi can vatsí yu.

<sup>25</sup> Tan ñaha can natuhva ña nu nyaá ra tan tsicuiñi tsi ña nuu ra, tan catyí ña tsihin ra:

—Jutu Mañi yu, jatyinyee tsi yu!

<sup>26</sup> Tan ra Jesús catyí ra tsihin ña:

—Ña vaha tsa quihin nyaa yo paan yuhu sehe yo, tan cuhva yo catsi ina —catyí ra tsihin ña.

<sup>27</sup> Maa tyin ña ndasi cuñí ña tsa cahān ra, tan catyí ña tsihin ra:

—Nditsa, Jutu Mañi yu. Maa tyin nda cuanda ina tan tsatsí ti titsehe tsa cucoyo xuu mesa tsitoho ti —catyí ña.

<sup>28</sup> Tacan tan catyí ra Jesús tsihin ña:

—Yooho ñaha, tsinú xaan iñi un tsi yu. Na cuvi maa cuhva tsicá iñi un.

Tan juvin ñi cuhva can tan nduvahā sehe ña.

*Nu cuaha xaan nyivi cuuhví janduvahā ra Jesús*

<sup>29</sup> Tsa yaha yacan tan ra Jesús cuahán ra ityi yuhu miñi Galilea, tan ndaā ra iin jiñi yucu tan ícan tsinyaa ra.

<sup>30</sup> Tan cuaha xaan nyivi cuahán ñi nu nyaá ra cuandacá ñi nyivi cuuhví tyin janduvaha ra tsi ñi. Yihí ñi coxo ñi, cuaa ñi, ñiñhi ñi, lundu ñi. Tan yihí ñi yihí inga ca nu cuehe tsi ñi. Tan tsaquín nyecu ñi tsi tandihí ñi cuuhví can nu nyaá ra Jesús. Tan janduvahā ra tsi ñi.

<sup>31</sup> Tan iyo xaan cuñí nyivi can nyehé ñi tyin nacahān ñi ñiñhi tan nduvahā ñi lundu, tan nacacá ñi coxo, tan nanyehé ñi cuaa. Tan quitsahā jacahnu xaan ñi tsi Nyoo ñi, tsa cuví ñi nyivi Israel.

*Nu tsahá ra Jesús tsa catsi cumi mil rayñi*

*(Mr. 8.1-10)*

<sup>32</sup> Tacan tan canā ra Jesús tsi ra tsicá tsihin ra, tan catyí ra tsihin ra naha:

—Ndaahvi xaan cuñí yu nyehé yu tsi nyivi ihya, tyin tsa uñi quivi yucú ñi ihya tsihin yo, tan nduve náa catsi ñi. Tan ña cuñí yu jacunuhu yu tsi ñi

yuvehe ñi tyin ñaha ca catsi ñi, tan coto cúu naaha ñi ityi cuanuhú ñi —catyí ra Jesús.

<sup>33</sup> Tacan tan ra tsicá tsihin ra catyí ra naha tsihin ra:

—¿Tan numaa cua ñihi yo tsa catsi nyivi cuaha ihya, tyin ihya nduve nyivi iyó?

<sup>34</sup> Tacan tan ra Jesús tsicá tuhun ra tsi ra naha tan catyí ra:

—¿Najava taahan paan ndahá ndo?

Tan catyí ra naha:

—Utsa taahan ñi, tan uvi taahan ñi tyaca nyihi.

<sup>35</sup> Tan catyí ra tsihin nyivi na cunyecu ñi nu ñuhu.

<sup>36</sup> Tacan tan quihin ra tsa utsa paan can tan tyaca can, tan nacuhva ra tyahvi nyoo tsi Nyoo. Tan quitsaha tsahnú cuatyí ra paan tsihin tyaca, tan tsaha ra tsi ra tsicá tsihin ra tyin na tsatsa ra naha tsi nyivi.

<sup>37</sup> Tandihí ñi tsatsí ñi, tan ndahá vaha iñi ñi. Tan tsa ndihí tsatsí ñi tan naquihin ra naha tsa ñahñu tsa ndoo can tan quitá utsa tyica cuví tsi.

<sup>38</sup> Tan ra tsa tsatsí can naha ra quitá maa cumi mil ra naha tan sñn maa ñiñaha tan tsa nyihi.

<sup>39</sup> Yahá can tan jacunuhu ra tsi ñi, tan quihvi ra tsitsi yutun ndoo, tan cuahán ra ityi Magdala.

## 16

*Ra cuví fariseo naha ra tan ra cuví saduceo naha ra tsicán ra naha tsi ra Jesús na javaha ra iin tsa iyo (Mr. 8.11-13; Lc. 12.54-56)*

<sup>1</sup> Tacan tan ra fariseo naha ra tan ra saduceo naha ra tsahan ra naha nu nyíí ra Jesús, tyin cuñí ra naha nducu cuhva ra naha tsi ra. Tan catyí

ra naha na javaha ra iin tsa iyo tsihin tunyee iñi Nyoo.

<sup>2</sup> Maa tyin nacahan ra Jesús tan catyí ra tsihin ra naha:

—Tsa cueñi, tuhvá ndo catyí: “Sii xaan caa ityaan cua cuvi tyin cuaaha xaan nu vico”.

<sup>3</sup> Tan tsa tuvi catyí tucu ndo tyin ña sii maa caa cua cuvi, tyin iñi naaha xaan tan cuaaha xaan vico, catyíndo. ¿Nacuenda tyin tsitó tucu ndo yacan tan tsa cuví vityin ña cuví nacoto ndo, nyooho ra jandaví ñaha?

<sup>4</sup> Nyivi tsa iyó vityin, quiñi xaan iyó ñi tan ña tsinú iñi ñi tsi Nyoo. Maa ñi tsa iyo cuñí ñi nyehe ñi. Maa tyin yuhu ña cua javaha yu tsa iyo nyehe ñi, tyin tumaa tsa cuví tsi ra Jonás, yacan ña cua nyehe ñi —catyí ra Jesús tsihin ra naha; tsahan cuahán ra.

*Tuhun caahán ra fariseo naha ra cuví tsi tumaa yutsan iya*

*(Mr. 8.14-21)*

<sup>5</sup> Cuhva tsa yahá ra tsicá tsihin ra Jesús inga tsiyo miñi can, nducuhún iñi ra naha tyin nduve paan tsa catsi ra naha ndahá ra naha.

<sup>6</sup> Tacan tan catyí ra Jesús tsihin ra naha:

—Jaha ndo cuenda tsi ndo tsihin yutsan iya ra fariseo tan ra saduceo naha ra —catyí ra tsihin ra naha.

<sup>7</sup> Tacan tan quitsahá natuhún tahan ra naha tan catyí ra naha:

—¿A ñavin tyin nduve paan ndahá yo catsi yo, yacan cuenda caahán ra tyehen tsihin yo? —catyí ra naha.

<sup>8</sup> Tan tsa tuvi iñi ra Jesús tsa tsicá iñi ra naha, catyí ra tsihin ra naha:

—Nyooho tsa luxu ñi tsinú iñi tsi yu, ¿nacuenda tyin tsicá xaan iñi ndo tyin nduve tsa catsi ndo ndahá ndo?

<sup>9</sup> ¿A ñaha ca cutuñi iñi ndo? ¿A ña nducuhún iñi ndo qui<sub>v</sub>i tsa jacatsi yu tsi uhun mil rayii tsihin uhun taahan ñi paan, tan najava taahan tyica jacutu<sub>u</sub> ndo tsihin tsa ñahñu tsa ndoo can?

<sup>10</sup> ¿A tsa naá ndihi tucu iñi ndo qui<sub>v</sub>i tsa jacatsi yu cumi mil rayii, tan najava taahan tyica jacutu<sub>u</sub> ndo tsihin tsa ndoo tsa utsa taahan ñi paan?

<sup>11</sup> ¿Nacuenda ña tuví iñi ndo tyin ñavin tuhun paan caahán yu tsa caty<sub>i</sub> yu tyin na jaha ndo cuenda tsi ndo tsihin yutsan iya ra fariseo tan ra saduceo naha ra? —catyí ra Jesús tsihin ra naha.

<sup>12</sup> Tacan tan cutuñi iñi ra naha tyin ñavin tsa cuenda yutsan iya paan can caahán ra, maa tyin na jaha ra naha cuenda tsi ra naha tsihin tsa jacuahá ra fariseo tan ra saduceo naha ra.

*Nu catyí ra Pedro tyin ra Jesús cuví ra Cristo, ra jacacú tsi yo*

*(Mr. 8.27-30; Lc. 9.18-21)*

<sup>13</sup> Cuhva tsa tsaá ra Jesús ityi ñuu Cesarea Filipo, tsicá tuhun ra tsi ra tsicá tsihin ra tan catyí ra:

—¿Náa catyí nyivi? ¿Yoo ra cuví yu, Rayii tsa quee nda gloria? —catyí ra.

<sup>14</sup> Tan nacañan ra naha tan catyí ra naha:

—Yihí nyivi catyí ñi tyin ra Juan ra jacoondutya tsi nyivi cuví un. Tan inga nyivi catyí ñi tyin ra Elías cuví un, tan yihí tucu ñi catyí ñi tyin ra Jeremías, o inga ra cuví ndusu yuhu Nyoo tañan tsanaha cuví un.

<sup>15</sup> Tacan tan catyí ra tsihin ra naha:

—Tan nyooho, ¿yóo ra cuví yu, catyí ndo?

<sup>16</sup> Tacan tan nacahan ra Simón Pedro tan catyí ra:

—Yooho cuví ra Cristo, Sehe Nyoo nyitó —catyí ra.

<sup>17</sup> Tan nacahan ra Jesús tan catyí ra:

—Sií xaan cuví tsi yooho, Simón, sehe ra Jonás, tyin ñavin nyívi janahā tuhun ihya tsi un, tyin maa Jutu yu, ra nyaá gloria janahā tsi un.

<sup>18</sup> Tan yuhu catyí yu tsihin un tyin yooho cuví ra Pedro. Tan siqui cava ihya, cua javaha yu vehe ñuhu yu. Tan ña cua tani tsi jaha tuhun tsihi.

<sup>19</sup> Yuhu cua cuhva yu ndaha tucu tsa cuenda nu ndacá ñaha Nyoo tsi un. Tan tandihi tsa cuhñi un ihya nu ñuhu ñayívi, tsa nuuhñi jahā Nyoo nda gloria. Tan tandihi tsa ndatsi un ihya nu ñuhu ñayívi, tsa ndatsi maa Nyoo nda gloria.

<sup>20</sup> Tacan tan catyí ra Jesús tsihin ra tsicá tsihin ra tyin ña cahan ra naha tsihin nyívi tun juvin ra cuví ra Cristo ra tsa quee nu nyaá Nyoo.

*Nu caahán ra Jesús tyin cua cahñi nyívi tsi ra  
(Mr. 8.31—9.1; Lc. 9.22-27)*

<sup>21</sup> Nda quívi can quitsahā catyí ra Jesús tsihin ra tsicá tsihin ra, tyin cuñí tsi tsa cahun ra ñuu Jerusalén. Tan ra cuví mandoñi naha ra, tan ra jutu tsa cuví ityi nuu naha ra, tan ra maestro cuenda ley vehe ñuhu naha ra, tan cua janyehe xaan ra naha tundoho tsi ra. Tan catyí ra tyin cua cahñi ra naha tsi ra, maa tyin tsa tsinu uñi quívi cua nandoto ra inga tsaha.

<sup>22</sup> Tacan tan quihin ra Pedro tsi ra tan quitā siin ra tsihin ra tan quitsahā caahán ra tsihin ra Jesús tyin ña vaha tsa caahán ra tan catyí ra:

—Na ña cuhva Nyoo tsa tahan un tacan, Jutu Mañi yu —catyí ra.

<sup>23</sup> Tan nanyico coo ra Jesús, tan quitsaha caahán ra tsihin ra Pedro:

—¡Jatsiyo nyaha tsi un, cuihna! Tyin cuñí un casi un tsi yu. Tyin yooho ña tsicá iñi un cuhva cuñí Nyoo, tyin cuhva cuñí nyivi tsicá iñi un —catyí ra.

<sup>24</sup> Tacan tan ra Jesús catyi ra tsihin ra tsicá tsihin ra:

—Tatun ndáa nyoocho cuñí cunyicun tsi yu, cahnya iñi ndo tsa cuñí maa ndo javaha ndo, tacan tan cuvi javaha ndo tsa cuñí Nyoo. Tan ña cua ndu uvi iñi ndo tsa yihí ndo cuenda yu, vasu tandihi quivi nyehé ndo tundoho. Tyin yacan cuví cruu tsa taahán tsi cuiso ndo tatun cua cunyicun ndo tsi yu.

<sup>25</sup> Tan nyoocho tsa ña cuñí nyehe tundoho, tan ña cuñí ndo cuhva ndo ñayivi iyó ndo tsa cuenda yu, cua nyehe ndo tundoho anyaya. Maa tyin nyoocho tsa cua cuhva ñayivi ndo tsa cuenda yu, cua cacu ndo.

<sup>26</sup> Tyin nduve yahvi nyaá tsa cua ñihi ndo tandihi tsa iyó nu ñuhu ñayivi tun añima ndo tan ña cua cacu tsi. Tyin nduve maa náa tsihin tan cuvi tyahvi ndo tan ña cua cunaa añima ndo.

<sup>27</sup> Tyin yuhu, Rayi tsa quee nda gloria, cua quitsi nyico yu inga tsaha, maa tyin tsihin tsa cahnu cuví Jutu yu, tan cua quitsi ángel tsihin yu. Tacan tan cua tyahvi yu tsi intuhun intuhun ndo tsa cuenda tsa javaha ndo.

<sup>28</sup> Tan tsa nditsa catyí yu tsihin ndo, tyin yihí nyoocho tsa yucú ihya vityin, cua nyehe ndo nu

vatsí yu tsa cua cundaca ñaha yu, tsa ndi cumañi ca cúu ndo —catyí ra Jesús.

## 17

*Nu nyehe uñi taahán ra tsicá tsihin ra Jesús nácaa tsa sii caá xiñu ra Jesús nu ndacá ñaha ra nda gloria (Mr. 9.2-13; Lc. 9.28-36)*

<sup>1</sup> Tan tsa yahá iñu qui<sup>v</sup>i, tan qui<sup>h</sup>in ra Jesús tsi ra Pedro tan ra Jacobo, tan ra Juan yañi ra Jacobo. Tan cuahán ra iin yucu sucun xaan tsihin ra naha.

<sup>2</sup> Tan ican nasamā cuhva caá ra Jesús nuu ra yucú tsihin ra. Tan xiñu xaan nuu ra cuv<sup>i</sup> tumaa xiñu ñicanyii. Tan jahma ra cuitsin xaan tsi cuv<sup>i</sup> tumaa cuitsin ñuhu.

<sup>3</sup> Tacan tan nyehe ra naha tsi ra Moisés tan ra Elías, natuhún ra naha tsihin ra Jesús.

<sup>4</sup> Tan quitsahá caahán ra Pedro tsihin ra Jesús, tan catyí ra:

—Jutu Mañi yu, vaha xaan tyin yucú ndi ihya. Tatun cuñi un, javaha ndi uñi taahan tyahva, iin tsi tsi maa un, tan inga tsi tsi ra Moisés, tan iin tsi tsi ra Elías —catyí ra Pedro tsihin ra Jesús.

<sup>5</sup> Tsitsi tsa caahán ra Pedro, quitsi iin vico tsa xiñu xaan siqu<sup>i</sup> ra naha. Tan tyas<sup>i</sup> tsi tsi ra naha. Tan tsiñ<sup>i</sup> ra naha iin ndusu tsa caahán tsitsi vico can tan catyí tsi tyehen:

—Ra ihya cuv<sup>i</sup> Sehe yu, tan cuñi xaan yu tsi ra. Tan s<sup>i</sup> xaan cuñi yu tsihin ra. Tyaa yahvi ndo tsa caahán ra —catyí ndusu can.

<sup>6</sup> Tsa tsiñ<sup>i</sup> ra tsicá tsihin ra Jesús tuhun ihya, tsicava tsihin nuu ra naha nda nu ñuhu, tyin nayuhvi xaan ra naha.



<sup>7</sup> Tacan tan natuhva ra Jesús nu cayucú ra naha, tan tñin ra tsi ra naha, tan catyí ra:

—Ndúvita ndo, tan ña nayuhvi ndo.

<sup>8</sup> Tan cuhva tsa nanyehē ra naha, intuhun ña ra Jesús nyaá, tan nduve inga uvi ca ra naha.

<sup>9</sup> Tan cuhva tsa vatsí nuu ra naha yucu can, catyí ra Jesús tsihin ra naha:

—Ña cahan ndo tsa nyehē ndo ihya tsihin nyivi. Tsa yaha tsa cúu Rayii tsa quee nda gloria tan nandoto ra, tacan tan cua cahan ndo can —catyí ra.

<sup>10</sup> Tacan tan tsicā tuhun ra tsicá tsihin ra tsi ra, tan catyí ra naha:

—¿Nacuenda tyin ra maestro cuenda ley vehe ñuhu naha ra caahán ra naha tyin jihna ca ra Elías taahán tsi quitsi?

<sup>11</sup> Tan nacañan ra Jesús tan catyí ra:

—Tsa nditsa tyin jihna ca ra Elías cua quitsi tan cua janduvaha ra tandihi.

<sup>12</sup> Maa tyin yuhu catyí yu tsihin ndo tyin tsa yaha quitsi ra Elías, tan ña nacoto nyivi tsi ra, tan javaha ñi tsihin ra tandihi cuhva cuñi maa ñi. Tan tacan tucu yuhu, Rayii tsa quee nda gloria, cua janyehē ñi tundoho tsi yu —catyí ra tsihin ra naha.

<sup>13</sup> Tacan tan cutuñi iñi ra naha tyin tuhun ra Juan, ra jacoondutya, caahán ra Jesús.

*Nu janduvaha ra Jesús tsi iin ra luhlu tsa tsihi naaha jahá tatyí ña vaha*

*(Mr. 9.14-29; Lc. 9.37-43)*

<sup>14</sup> Cuhva tsa tsaq ra naha nu yucú nyivi, natuhva iin ra tan tsicuiñi tsi ra nuu ra Jesús, tan catyí ra tsihin ra:

15 —Tata, cundaahvi iñi tsi sehe yu, tyin yihí cuehe tsihií naaha tsi ra, tan tuhvá ra nduva ndasava, tan cuaha xaan tundoho nyehé ra jahá cuehe can. Tan yihí tsaha nduvá ra nu ñuh̄ tan cayú ra, tan nduvá tucu ra nu yihí ndutya.

16 Tan tsindac̄a yu tsi ra tsi ra tsicá tsihin un, maa tyin ña cuv̄i janduvah̄a ra naha tsi ra —catyí ra.

17 Tan nacaḥan ra Jesús tan catyí ra:

—¡Nyooho, nyiv̄i tsa ña tsinú iñi cuv̄i ndo! ¡Tan caquiñi ndo! ¿Ndáa nda quiv̄i cua cunyii yu tsihin ndo? ¿Tan ndáa nda quiv̄i cua cunyeé iñi yu tsihin ndo, tyin nyooho ña tsinú vaha maa iñi ndo tsi yu? T̄indaca ndo tsi ra luhlu tsi yu —catyí ra.

18 Tacan tan tava ra Jesús tsi nu tatyí ña vaha can, tan quita nu tsi ra luhlu can. Tan juvin ñi cuhva can nduvah̄a ra.

19 Tsa yah̄a can tan tsic̄a tuhun siin ra tsicá tsihin ra Jesús tsi ra tan catyí ra naha:

—¿Nacuenda tyin nyuhu ña cuv̄i tava ndi tatyí ña vaha can?

20 Tan ra Jesús nacaḥan ra tan catyí ra:

—Tyin luxu cuii ñi tsinú iñi ndo tsi yu. Tsa nditsa catyí yu tsihin ndo tyin tun tsinú iñi ndo tsi yu, tumaa iin tsiti mostaza, cuv̄i catyí ndo tsihin yucu ihya na catsiyo tsi tan cuhun tsi inga ityi, tan yucu ihya cuhun tsi inga ityi. Tan nduve tsa ña cua cuv̄i javaha ndo tatun nditsa tsa tsinú iñi ndo tsi yu.

21 Maa tyin tahan tatyí ña vaha can, quita nu maa ñi tsihin tsa coonyitya yo tan ndacan tahvi yo tsi Nyoo —catyí ra Jesús tsihin ra naha.

*Inga tsaha cah̄an ra Jesús tsa cua cah̄ni nyivi tsi ra*

*(Mr. 9.30-32; Lc. 9.43-45)*

<sup>22</sup> Yucú ra naha Galilea can, tan ra Jesús catyí ra tsihin ra naha:

—Yuhu, Rayi tsa quee nda gloria, iin ra cua nacuhva cuenda ra tsi yu tsi ra xaan iñi tsi yu naha ra.

<sup>23</sup> Tan cua cah̄ni ra naha tsi yu. Maa tyin tsa tsinu uñi quivi tan cua nandoto yu —catyí ra.

Tsa tsiñi ra naha tuhun ihya, cuihya xaan cuñi ra naha cuvi.

*Nu tyahvi ra naha cuenda tsa nduvaha vehe ñuhu cahnu*

<sup>24</sup> Cuhva tsa tsā ra Jesús tan ra tsicá tsihin ra ñuu Capernaum, ra tavá xuhun cuenda vehe ñuhu naha ra, tsah̄an ra naha tsinyehe ra naha nu nyii ra Pedro tan tsic̄a tuhun ra naha tsi ra tan catyí ra naha:

—¿A ña tuhvá ra jacuahá tsi ndo tyahvi xuhun tsa cuenda vehe ñuhu cahnu? —catyí ra naha tsihin ra Pedro.

<sup>25</sup> Tan nacah̄an ra Pedro tan catyí ra:

—Tuhvá ra.

Tan tsa quihvi ra Pedro tsitsi vehe nu iyó ra naha, jihna ca ra Jesús nacah̄an tan catyí ra:

—¿Nacaa cuñi yooho, Simón? ¿Yóo tsi quihín ra cuví rey tsa iyó nu ñuhu ñayivi ihya yahvi? ¿A tsi nyivi ñuu maa ra o tsi inga nyivi?

<sup>26</sup> Nacah̄an ra Pedro tan catyí ra:

—Tsi inga nyivi.

Tan catyí ra Jesús tsihin ra:

—Tun tacan, nyivi ñuu maa ra ña taahán tsi tyahvi ñi.

<sup>27</sup> Maa tyin ña cuñí yo tsa cahan ra naha siqui yo, yacan cuenda vaha ca tsa cuhun un yuhu miñi can, tan jacuhun un yiqui tucu un tsitsi ndutya. Tan tyaca tsa cua ñihi un tsa jihna ñi, tsitsi yuhu ti cua ñihi un xuhun. Tan tsihin yacan ñi cua tyahvi un tsa cuenda yo —catyí ra Jesús tsihin ra Pedro.

## 18

*Nu janahq̄ ra Jesús yóo ra cahnu ca cuví nuu tandihí nyiví tsa ndacá ñaha Nyoo*

*(Mr. 9.33-37; Lc. 9.46-48)*

<sup>1</sup> Quiví can natuhva ra tsicá tsihin ra Jesús nu nyaá ra, tan tsicá tuhun ra naha tsi ra tan catyí ra naha:

—¿Yóo ra cahnu ca cuví nu ndacá ñaha Nyoo?

<sup>2</sup> Tacan tan ra Jesús cana ra tsi iin ra luhlu, tan tyaa ra tsi ra mahñu ra naha.

<sup>3</sup> Tan catyí ra:

—Tsa nditsa catyí yu tsihin ndo, tyin tatun nyooho tan ña cua nasama ndo cuhva iyó ndo tan ña janduluhlu ndo tsi ndo tumaa ra nyihi, ña cua cuvi quihvi ndo nu ndacá ñaha Nyoo.

<sup>4</sup> Tyin ra tsa cahnu ca cuví nuu Nyoo, juvin ra cuví ra tsa janduluhlu tsi, tumaa ra luhlu ihya.

<sup>5</sup> Nyiví tsa naquihín tsi iin nyiví tumaa ra luhlu ihya, tyin tsinú ñi ñi tsi yu, yuhu naquihín cuenda ñi.

*Nu caahán ra Jesús tsihin yo nácaa jaha cuenda yo tsi yo coto javaha yo tsa ña vaha*

*(Mt. 5.29-30; Mr. 9.42-48; Lc. 17.1-2)*

<sup>6</sup> Tatun yóo nyiví natyuhú tsi iin nyiví tsa ñaha ca tsinú vaha ñi tsi yu, na javaha ñi tsa caquiñi, vaha

ca na cunuhñi iin yuu yoso vee jucun ñi natyuhu can, tan cujanehñi nyivi tsi ñi nu cunu ndutyá ñuhu.

<sup>7</sup> ¡Ndahvi nyivi ñuu ñayivi, tyin tacan iyó tsa jativí tsi ñi! ¡Tan ndahvi tucu ra ndaahvi tsa jativí tsi ñi!

<sup>8</sup> 'Yacan cuenda tatun ndaha un o tsaha un javahá tsa ña vaha, cahnya can tan javita un. Tyin vaha ca quihvi un nu coo un tsihin Nyoo tsihin tsa lundu ndaha un o lundu tsaha un, tan ñavin ca tsa nanñi un tan jacuhun Nyoo tsi un nu cayú ñuhu tsa ña cua ndahva maa.

<sup>9</sup> Tun javahá un tsa ña vaha jahá tinuu un, tava can tan javita un. Tyin vaha ca quihvi un nu coo un tsihin Nyoo tsihin intuhun tinuu un, tan ñavin ca tsa jacuhun Nyoo tsi un tsihin nduvi tinuu un nu cayú ñuhu tsitsi anyaya.

*Nu cahan ra Jesús tyin tumaa mbee tsa cunaa, tacan cuvíyo*

*(Lc. 15.3-7)*

<sup>10</sup> 'Ña caca iñi ndo tyin ra nyihi cuenda yu ihya nduve yahvi nyaá ra naha nuu Nyoo, tyin yuhu catyí yu tsihin ndo tyin cahnu ca cuví ra naha tyin ángel jahá cuenda tsi ra naha nduvi tan niñu, nyecú ra naha nuu Jutu yu, ra nyaá gloria.

<sup>11</sup> Tyin yuhu, Rayñi tsa quee nda gloria, vatsí jacacu yu tsi nyivi tsa cuanaa.

<sup>12</sup> ¿Nacaa cuñí nyoocho? Tatun iin ra tan iyó iin cientu mbee jana ra, tan cunaa intuhun ti, ¿a ña nacoo ra tsa cumi xico tsahun cumi ti nu yucú ti, tan cahun ra cunanducu ra tsi quití tsa cuanaa can?

13 Tan tatun nañihi ra tsi ti, tsa nditsa tyin siï ca cua cuñi ra tsihin quiiti can, tan ñavin ca tsihin tsa cumi xico tsahun cumi quiiti tsa ña tsinaa.

14 Tan tacan tucu, Jutu yo ra nyaá gloria, ña cuñi ra tsa cunaa ndi intuhun nyivi tsa cuví tumaa ra nyihi ihya.

*Nacaa taahán tsi jahá tahan yo tucahnu iñi tsi yo (Lc. 17.3)*

15 Tatun ra yañi un tan javaha ra tsa ña vaha tsi un, cahan tsihin intuhun ñi maa ra tan catyi un tsihin ra tyin ña vaha cuhva javaha ra. Tan tatun tyaa yahvi ra tuhun caahán un, tsa jahá canaa un tsi ra inga tsaha cuenda Nyoo cuví can.

16 Maa tyin tatun ña tyaa yahvi ra tsi un, tacan tan cana un tsi iin o uvi ra tyin cuvi ra naha tsa ndaa tsa cuenda tsa cua cahan un tsihin ra can.

17 Tatun ña tyaa yahvi ra ndi maa tsi ra tsa tsahan tsihin un naha ra, tacan tan cahan tsihin tandihi nyivi yucú vehe ñuhu. Tan tatun ña tyaa yahvi ra tsi ñi vehe ñuhu, tacan tan jahá ndo tumaa tsa ñavin ra yihí tuhun Nyoo cuví ra tan cuví ra tumaa ra caquiñi tsa tavá xuhun cuenda ra ndacá ñaha nda ñuu Roma.

18 Tsa nditsa catyí yu tsihin ndo, tyin tandihi tsa cuhni ndo ihya nu ñuhu ñayivi, tsa nuuhni tsi jahá maa Nyoo nda gloria. Tan tandihi tsa ndatsi ndo ihya nu ñuhu ñayivi, tsa ndatsi maa Nyoo nda gloria.

19 Tan juvin ñi catyí tucu yu tsihin ndo, tatun uvi ndo ihya nu ñuhu ñayivi, tan tsa natuhun tahan ndo tan tsicán ndo tsi Jutu yu, ra nyaá gloria, cua cuhva ra yacan tsi ndo.

<sup>20</sup> Tyin nu yucú uvi o uñi nyiví tan jacahnú ñi tsi yu, ican nyaá yu mahñu ñi —catyí ra Jesús.

<sup>21</sup> Tacan tan tsahan ra Pedro tsindacá tuhun ra tsi ra Jesús tan catyí ra:

—Jutu Mañi yu, tatun ra yañi yu tan javahá ra tsa ña vaha tsihin yu, ¿najava taahan tsaha taahán tsi jaha yu tucahnu iñi tsi ra? ¿A utsa taahan tsaha?

<sup>22</sup> Tan nacahan ra Jesús tan catyí ra:

—Catyí yu tsihin un tyin ñavin utsa taahan ñi tsaha; nda cumi cientu cumi xico utsi tsaha taahán tsi jaha un tucahnu iñi.

*Nu cahan ra Jesús iin cuhva cuenda iin ra tsa ña cuñi jaha tucahnu iñi*

<sup>23</sup> Yacan cuenda tsa ndacá ñaha Nyoo tsi nyiví cuví tsi tumaá iin rey tsa nacana tsi tandihí musu ra tyin cua nyehe ra nácaa nyaá cuenda ra naha tsi ra.

<sup>24</sup> Tan cuhva tsa quitsaha natavá ra cuenda, tan tsindacá ra tsi iin musu tsa cuaha millón pesu nyaá cuenda tsi ra.

<sup>25</sup> Tan musu can nduve náa tsihin tyahvi ra tsi tsitoho ra, yacan cuenda tsitoho ra catyí: “Xico ndo tsi ra iin cahnu ñi tsihin ñasihí ra, tan tsihin sehe ra tan tandihí tsa iyó tsi ra tan tsihin xuhun quita can cua tyahvi ra tsa nyaá cuenda ra tsi yu.”

<sup>26</sup> Tacan tan musu can tsicuiñi tsi ti ra nuu tsitoho ra, tan cahan ndaahvi ra tsihin ra, tan catyí ra: “Tata, jaha tumañi iñi, cuatu un luxu, tan tyahvi yu tandihí tsa nyaá cuenda yu tsi un nda ñihi yu xuhun”, catyí ra.

<sup>27</sup> Tan cundahvi iñi tsitoho ra tsi ra, tan jahá ra tucahnu iñi tsi ra, tan janaa ra tandihí tsa nyaá cuenda ra, tan jandoq nuña ra tsi ra.

28 Maa tyin cuhva tsa quita musu can, nañih<sub>i</sub> ra tsi iin ra vaha iñi tsi ra tsa cuv<sub>i</sub> musu tumaa maa ra. Tan ra vaha iñi can nyaá cuenda ra luxu ñi tsi ra. Tan tiin ra tsi ra can, tan quitsaha tin ra jucun ra, tan caty<sub>i</sub> ra tsihin ra: “Tyahvi tsa nyaá cuenda un tsi yu.”

29 Tacan tan tsicuiñi tsi<sub>i</sub> ra can nuu ra, tan cahan ndaahvi ra tsihin ra tan caty<sub>i</sub> ra: “Cuatu luxu tan nda ñihi yu xuhun tan cua tyahvi yu tandih<sub>i</sub> tsa nyaá cuenda yu tsi un”, caty<sub>i</sub> ra.

30 Maa tyin maa ra ña cuñi ra cuatu ra, tan tsahan ra tsityih<sub>i</sub> ra tsi ra can vehe caa nda cuanda tsa tyahvi ra tsa nyaá cuenda ra tsi ra.

31 Tsa nyehe inga ca musu tsa javaha ra, cuiihya xaan cuñi ra naha, tan tsahan ra naha tsinacaty<sub>i</sub> tuhun ra naha tsihin tsitoho ra naha tsa ña vaha tsa javaha ra can.

32 Tacan tan tsitoho ra can tava tyiñu ra na quitsi ra can. Tan tsa tsa<sub>a</sub> ra, tan caty<sub>i</sub> ra tsihin ra: “Musu ña vaha cuv<sub>i</sub> un. Yuhu jaha yu tucahnu iñi tandih<sub>i</sub> tsa nyaá cuenda un tsi yu, tyin cahan ndaahvi un tsihin yu.

33 Tacan cuñi tsi tsa cundaahvi iñi un tsi ra vaha iñi tsi un tumaa tsa cundaahvi iñi maa yu nyehe yu tsi un”, caty<sub>i</sub> ra tsihin ra.

34 Tan cuxaan xaan tsitoho ra, tan tava tyiñu ra na tatsi tuñi ra naha tsi ra nda cuanda tsa tyahvi ra tandih<sub>i</sub> tsa nyaá cuenda ra.

35 Tan nu ndih<sub>i</sub> cahan ra Jesús, tan caty<sub>i</sub> ra tyehen:

—Tacan cua javaha tucu Jutu yu, ra nyaá gloria, tsihin nyooho tatun ña jaha ndo tucahnu iñi tsi nyivi ndo tsihin tsa ni iñi aña ndo.



# 19

*Nu caahán ra Jesús tyin ña vaha tsa nacoo ihñi rayi tsi ñasihi ra*

*(Mr. 10.1-12; Lc. 16.18)*

<sup>1</sup> Tsa yahá tsa cahán ra Jesús tuhun ihya, tan quitá ra cuenda Galilea can, tan cuahán ra cuenda Judea inga tsiyo yutya cahnu Jordán, ityi nu caná ñicanyii.

<sup>2</sup> Cuaha xaan nyivi tsinyicun tsi ra, tan janduvahá ra tsi nyivi cuuhví.

<sup>3</sup> Tacan tan juhva ra fariseo naha ra natuhvá ra naha nu nyaá ra Jesús, tyin cuñi ra naha nducu cuhva ra naha tsi ra tyin tacan tan cuvi tyaa ra naha cuatyí siqui ra. Tan tsicá tuhun ra naha tsi ra tan catyí ra naha:

—¿A vaha tsa nacoo rayi tsi ñasihi ra tsa cuenda náa ñi tsihi tsahá ña tsi ra?

<sup>4</sup> Tan nacahan ra tan catyí ra:

—¿A ña tuhvá ndo cahví nu tutu Nyoo nu catyí tsi tyin ra tsa javahá tsi ndo nda quivi jihna ñi, javahá ra rayi tan ñaha?

<sup>5</sup> Tan catyí tsi tyehen: “Taahán tsi nacoo rayi tsi jutú ra tan sihi ra, tan ndu iin ra tsihin ñasihi ra. Tan tsa nduvi taahan ñi cua cuvi ñi tumaa tsa intuhun ña nyivi.”

<sup>6</sup> Yacan cuenda, ñavin ca uvi taahan ñi, maa tyin nduvi ñi intuhun ña nyivi cuvi ñi. Yacan cuenda, ña taahán tsi tsa nacoo tahan ñi tsi ñi tyin maa Nyoo tsa jandu iin tsi ñi —catyí ra.

<sup>7</sup> Tacan tan tsicá tuhun ra naha tsi ra Jesús tan catyí ra naha:

—¿Nacuenda tsa tyaa ra Moisés tyin cuvi cani iin rayi tutu cuenda ley ra tan nacoo ra ñasihi ra?

<sup>8</sup> Tan ra Jesús catyí ra tsihin ra naha:

—Tsa cuenda tsa ndava añima ndo, yacan cuenda, tsaḥa ra Moisés ndatu tsa nacoo ndo ñasihi ndo. Maa tyin quivi jihna ñi ñavin tacan tsicoo nyivi.

<sup>9</sup> Yuhu catyí yu tsihin ndo tyehen: Ra tsa nacoo ñasihi, tan ñavin tsa cuenda tsa quituvi ña tsihin inga rayi, tan tindaha ra tsihin inga ñaha, tsicoó cuatyí ra nuu Nyoo. Tan ra tsa tindaha tsihin ñaha tsa nacoo rayi can, juvin ñi tsicoó tucu cuatyí ra can —catyí ra.

<sup>10</sup> Tacan tan ra tsicá tsihin ra, catyí ra naha tsihin ra:

—Tatun tacan taahán tsi coo rayi tsihin ñasihi ra, vaha ca ña tindaha yo.

<sup>11</sup> Tan ra Jesús catyí ra tsihin ra naha:

—Ña tandihi nyivi cuví naquihin cuenda tuhun ihya. Maa tyin nyivi tsa tsaḥa Nyoo cuví naquihin cuenda ñi can.

<sup>12</sup> Tsa ña tindaha nyivi, cuaha ñi cuenda cuví tsi. Yihí ñi ña cuñí ñi tindaha ñi tyin iin cuhva caa maa ñi nda cacu ñi. Tan inga ñi ña cuñí ñi tindaha ñi tyin tsa nducapun ñi jahá nyivi. Tan yihí ñi ña tindaha ñi tsa cuenda tsa cuñí ñi javaha ñi maa ñi maa tyiñu Nyoo, na nducuaha ca añima tsa ndacá ñaha Nyoo. Tandihí nyivi tsa cuví javaha yacan na javaha ñi —catyí ra Jesús.

*Nu nasocó ra Jesús tsi tsa nyihi*

*(Mr. 10.13-16; Lc. 18.15-17)*

<sup>13</sup> Tacan tan quitsi ndaca nyivi juhva tsa nyihi tsi ra Jesús tyin na tyiso ndaha ra jiñi tsi naha tsi, tan ndacan tahvi ra tsa cuenda tsi. Maa tyin ra

tsicá tsihin ra quitsaha caahán ra naha tsi nyivi tsa cuahán tsihin tsa nyihi can.

<sup>14</sup> Maa tyin ra Jesús catyí ra:

—Jaña ndo tsi tsa nyihi na quitsi maa tsi naha tsi nu nyaá yu. Tan ña casi ndo. Tyin nyivi ndacá ñaha Nyoo cuví ñi tumaa tsa nyihi ihya —catyí ra.

<sup>15</sup> Tacan tan tyiso ndaha ra jiñi tsi naha tsi. Yaha can tan cuahán ra.

*Nu tsaha ra Jesús cuhva tyin y#i xaan nacuhva cuenda iin ra cuca tsi ra tsi Nyoo  
(Mr. 10.17-31; Lc. 18.18-30)*

<sup>16</sup> Iin ra tyuvaa tsahan ra tsindaca tuhun ra tsi ra Jesús tan catyí ra:

—Maestro, vaha xaan un. ¿Náa taahán tsi javaha yu tan cuvi coo yu ñayivi nyito tsa ña cua naa maa?

<sup>17</sup> Tan ra Jesús catyí ra tsihin ra:

—¿Nacuenta catyí un tyin ra vaha cuví yu? In-tuhun ñi maa Nyoo cuví ra vaha. [Tan tsa catyí un tyin vaha yu, nacotó un tyin Nyoo cuví yu.] Maa tyin tatun cuñi un coo un ñayivi tsa ña cua naa maa, javaha tandihí tuhun tsa tsaha Nyoo tyin javaha yo —catyí ra tsihin ra.

<sup>18</sup> Tan ra tyuvaa can catyí ra:

—¿Ndáa tsa cuví can?

Tan ra Jesús catyí ra tsihin ra:

—Ña cahñi un nyivi. Ña coo inga ñaha tsi un. Ña suhu un tsa tsii nyivi. Ña cahan un cuendu siqui nyivi.

<sup>19</sup> Tyaa yahvi tsi jutu un tan tsi sihi un. Tan cuñi tsi nyivi, tumaa tsa cuñi un tsi maa un.

<sup>20</sup> Tan ra tyuvaa can, catyí ra tsihin ra:

—Tandihí maa yacan tan tyaá yahvi yu nda tahan luhlu yu tan nda cuanda vityin. ¿Náa ca cumañí tsi yu?

<sup>21</sup> Tan ra Jesús catyí ra tsihin ra:

—Tatun cuñí un tsa iin ndaha ñi cuvi un iin ra cuiṭi nuu Nyoo, cūaahan tan xico un tsa iyó tsi un, tan cūhva un tsi nyivi ndaahvi, tan quṭsi nyicun un tsi yu. Tacan tan coo tsa cuca tsi un nda gloria —catyí ra.

<sup>22</sup> Maa tyin cūhva tsa tsiñi ra tyuvaa can tsa caḥan ra Jesús tsihin ra, cuiihya xaan cuñí ra cuvi tan cuanuhū ra tyin cuca xaan ra.

<sup>23</sup> Tacan tan ra Jesús catyí ra tsihin ra tsicá tsihin ra:

—Tsa nditsa catyí yu tsihin ndo tyin yḥi xaan tan cuví nacuhva cuenda nyivi cuca tsi ñi na cundaca ñaha Nyoo tsi ñi.

<sup>24</sup> Catyí yu tsihin ndo inga tsaha, tyin vasu yḥi xaan yaha iin camellu xuu iin yiqui tucu, maa tyin yḥi xaan ca tsa quihvi iin nyivi cuca nu ndacá ñaha Nyoo —catyí ra Jesús.

<sup>25</sup> Tsa tsiñi ra tsicá tsihin ra Jesús tsa caḥan ra, iyo xaan cuñí ra naha, tan quṭsahā tsicá tuhun tahan ra naha, tan catyí ra naha:

—Tun tacan, yoñi cua cuvi cacu

<sup>26</sup> Tacan tan nanyehē ra Jesús nu nyecú ra naha tan catyí ra:

—Nyivi ña cuví javaha ñi yacan, maa tyin Nyoo cuví javaha ra tandihí.

<sup>27</sup> Tacan tan quṭsahā caahán ra Pedro tsihin ra:

—Jutu Mañi yu, nyuhu tandihí maa tsa iyó tsi ndi nacoḡ ndi tan nyicún ndi tsi un. ¿Náa cua ñihi ndi? —catyí ra tsihin ra.

28 Tan nacahan ra Jesús tan catyí ra:

—Tsa nditsa catyí yu tsihin ndo, tyin quivi tsa cua ndutsaa tandihi tsa iyó, yacan cuví quivi cua cunyaa yuhu Rayi tsa quee nda gloria nu tyayu si xaan caá tan cua cundaca ñaha yu. Tan nyooho tsa nyicún tsi yu, cua cunyecu ndihi ndo nu utsi uvi taahan tyayu si caá. Tan cua cundaca ñaha ndo tsi tandihi nyivi cuví tata tsa utsi uvi taahan sehe ra Israel.

29 Tan tandihi nyooho tan tandihi inga nyivi tsa nacoq vehe, o yañi ñi, o cuhva ñi, o jutu ñi, o sihi ñi, o ñasihi ñi, o sehe ñi, o ñuhu ñi, tsa cuenda yuhu, cua ñihi ñi iin cientu ca tsaha siqui can, tan cua ñihi tucu ñi ñayivi nyito tsa ña cua naa maa coo ñi.

30 Cuaha xaan nyivi cuahán ityi nuu vityin, ñi ican cua cuhun nu ndihi ña. Tan cuaha xaan nyivi cuahán nu ndihi vityin, ñi ican cua cuhun ityi nuu.

## 20

*Nu jacuahá ra Jesús iin cuhva cuenda ra jahá tyiñu*

1 Tsa ndacá ñaha Nyoo tsi nyivi, cuví tsi tumaa iin ra iyó cora uvas. Tan tuvi ñi quitá ra cuahán ra cuanducú ra musu jaha tyiñu nu tyiñu jahá ra.

2 Tan ndoq ra tuhun tsihin musu can tyin cua tyahvi ra yahvi tsa iin quivi. Tan jacuhun ra tsi ra naha cua jaha tyiñu ra naha nu iyó tyiñu jahá ra.

3 Yahá can tan cuahán ra inga tsaha cuhva caa iin tsa tuvi. Tan nyehe ra tsi juhva ca ra yucú taxin nuyahvi can.

4 Tan catyí ra tsihin ra naha: “Cuaahan ndihi tucu nyooho jahá tyiñu ndo nu tyiñu jahá yu, tan

cua tyahvi maa yu tsi ndo nácaa taahán tsi tsi ndo.” Tacan tan cuahán ndihí tucu ra can naha ra.

<sup>5</sup> Tan tsitoho cora can quitā ra inga tsaha tsa ora. Tan juvin ñi musu nducú ra. Tan caa uñi tsa tseñi, quitā ra inga tsaha nducú ra musu.

<sup>6</sup> Yahā can tan quitā nyico ra caa uhun tsa tseñi tan nyehe ra yucú taxin juhva ca ra naha nuyahvi can. Tan catyí ra tsihin ra naha: “¿A nduve tyiñu jahá ndo? tyin nduvi nduvi yucú taxin ndo nuyahvi ihya.”

<sup>7</sup> Tan nacahan ra can naha ra tan catyí ra naha: “Yucú taxin maa ndi tyin nduve tyiñu jahá ndi tan yoñi tavá tyiñu tsi ndi.” Tacan tan catyí ra tsihin ra naha: “Cuaahan ndihí ndo jaha tyiñu ndo nu tyiñu jahá yu. Tan tyahvi maa yu tsi ndo nácaa taahán tsi tsi ndo”, catyí ra.

<sup>8</sup> Tan cuhva tsa cua cuaa, tsitoho tyiñu can catyí ra tsihin ra yihí ndaha musu can: “Na cana un tsi musu, tan tyahvi un tsi ra naha. Quitsaha tyahvi un tsi ra tsa quihvī nu ndihí naha ra, tan nu cua ndihí tan tyahvi un tsi ra tsa quihvī tsa jihna ñi naha ra”, catyí ra.

<sup>9</sup> Tacan tan tsaā ra tsa quihvī caa uhun tsa tseñi can naha ra. Tan intuhun intuhun ra naha quihīn ra naha yahvi nanī iin quivī.

<sup>10</sup> Yahā can, tan cuhva tsa tahañ tsi tsi ra tsa quihvī tsa jihna ñi can naha ra, cuñí maa ra naha tyin cuaha ca cua tyahvi ra tsi ra naha. Maa tyin inducu ñi yahvi iin quivī quihīn ra naha.

<sup>11</sup> Tan cuhva tsa quihīn ra naha, quitsaha caahan ra naha tsi tsitoho tyiñu can.

<sup>12</sup> Tan catyí ra naha: “Ra tsa tsaā nu ndihí ihya naha ra, intuhun ñi hora jaha tyiñu ra naha. Tan

iin ñi yahvi tyahvi un tsi ra naha tsihin tucu nyuhu tan nduvi nduvi jahā tyiñu ndi nu ihñi”, catyí ra naha.

<sup>13</sup> Maa tyin nacahan tsitoho tyiñu can, tan catyí ra tsihin iin ra can: “¡Tsaal, nduve tsa ña vaha javaha yu tsihin un. ¿A ñavin yahvi tsa iin quiivi ndoo yo tuhun tyin cua tyahvi yu tsi un?”

<sup>14</sup> Quihin yahvi un, tan cuanuhu. ¿A nduve ndatu iyó tsi yu tsa tyahvi yu tsi ra tsa quihvi nu ndihi iin ñi cuhva tsa tyahvi yu tsi yooho?

<sup>15</sup> ¿A nduve ndatu iyó tsi yu tsa javaha yu náa cuñi maa yu tsihin xuhun yu? ¿A ndasi cuñi un tyin vaha iñi yu tsihin inga ra can naha ra?” catyí ra.

<sup>16</sup> Tacan nyivi quihvi nu ndihi, cuhun ñi ityi nuu. Tan nyivi cuahan ityi nuu, nda nu ndihi ña cua cuhun ñi. Tyin cuaha xaan nyivi nacaná Nyoo, maa tyin juhva ñi ñi nacatsí ra.

*Inga tsaha jacotó ra Jesús cuhva cua cahñi nyivi tsi ra*

*(Mr. 10.32-34; Lc. 18.31-34)*

<sup>17</sup> Cuhva tsa cuñi cuhun ra Jesús nda ñuu Jerusalén, cana sin ra tsi tsa utsi uvi ra tsicá tsihin ra tan catyí ra tsihin ra naha:

<sup>18</sup> —Nyehe ndo tyin cuahan yo Jerusalén vityin. Tan ndacan cua nacuhva cuenda nyivi tsi yuhu, Rayi tsa quee nda gloria, tsi ra jutu tsa cuví ityi nuu naha ra, tan tsi ra maestro cuenda ley vehe ñuhu naha ra, tan cua catyi ra naha tyin taahan tsi cúu yu.

<sup>19</sup> Tan cua nacuhva cuenda ra naha tsi yu tsi ra ñuu Roma naha ra, tyin vacu nducu ra naha tsi yu. Tan cañi ra naha tsi yu. Tan cahñi ra naha tsi yu

nu cruu. Maa tyin tsa tsinu uñi quiví cua nandoto yu —catyí ra Jesús tsihin ra naha.

*Nu tsicán sihi ra Jacobo tan ra Juan iin tumañi iñi tsi ra Jesús*

*(Mr. 10.35-45)*

<sup>20</sup> Tacan tan ñasihi ra Zebedeo natuhva ña nu nyii ra Jesús tsihin nduvi sehe ña, ra Jacobo tan ra Juan. Tan tsicuiñi tsiti ña nuu ra tyin cua ndacan ña iin tumañi iñi tsi ra.

<sup>21</sup> Tan tsicā tuhun ra Jesús tsi ña tan catyí ra:

—¿Náa cuñí un?

Tan catyí ña:

—Quiví tsa cunyaa un nu ndacá ñaha un nda gloria, cuhva tsa cunyaa nduvi sehe yu xiin un. Na cunyaa iin ra tsiyo cuaha un, tan inga ra tsiyo satyin un.

<sup>22</sup> Maa tyin nacahan ra Jesús tan catyí ra:

—Nyooho ña tsitó ndo tsa tsicán ndo. ¿A cuví nyehe nyooho tundoho tsa cua nyehe yuhu? ¿A cuví cuhun ndo tuhun tsiihí tumaa cua cuhun yuhu? —catyí ra.

Tan nacahan ra naha tan catyí ra naha:

—Cuví maa.

<sup>23</sup> Tan catyí ra Jesús tsihin ra naha:

—Tsa nditsa tyin cua nyehe ndo tundoho, tan cua cuhun ndo tuhun tsiihí tumaa cuhun yuhu tuhun tsiihí. Maa tyin tsa cunyaa ndo tsiyo cuaha yu tan tsiyo satyin yu, ñavin yuhu taahán tsi cuhva yacan tsi ndo, tyin tsa tsitó maa Jutu yu yóo cua cuhva ra can —catyí ra Jesús tsihin ra naha.

<sup>24</sup> Tan tsa tsiñi tsa utsi ca ra tsicá tsihin ra Jesús yacan, cuxaan ra naha tsi nduvi ra can naha ra.



<sup>25</sup> Maa tyin cana ra Jesús tsi ra naha tan catyí ra tsihin ra naha:

—Tsa tsitó maa ndo, tyin ra ndacá ñaha tsi nyivi iyó nu ñuhu ñayivi ihya, ñihi xaan ndacá ñaha ra naha tsi ñi. Tan ra cuví ityi nuu tsihin ra naha nduyaa xaan ra naha.

<sup>26</sup> Maa tyin ñavin tacan taahán tsi javaha nyoooho. Tyin ra tsa cuñi nducahnu ca cuví nu Nyoo, cuñi tsi cuví ra musu tandihí nyoooho.

<sup>27</sup> Tan ndáa nyoooho tsa cuñi ndo cuví ndo ityi nuu, cuñi tsi cuví ndo musu tandihí ca ra naha.

<sup>28</sup> Tumaa yuhu, Rayi tsa quee nda gloria, ña vatsí yu tyin jatyinyee nyivi tsi yu. Maa tyin yuhu vatsí yu vatsí jatyinyee yu tsi maa ñi, tan cua cuhva yu ñayivi yu tsa cuenda ñi. Tyin tsihin yacan cua tyahvi yu cuatyí tandihí ñi.

*Nu janduvaha ra Jesús tsi uvi taahan ra cuaa  
(Mr. 10.46-52; Lc. 18.35-43)*

<sup>29</sup> Cuhva tsa cua quita ra Jesús ñuu Jericó tsihin ra tsicá tsihin ra, cuaha xaan nyivi cuahán cua nyicun tsi ra naha.

<sup>30</sup> Tan yuhu ityi can nyecú uvi taahan ra cuaa. Tan cuhva tsa tsiñi ra naha tyin cua yaha ra Jesús, quitsaha caná tsaa ra naha. Tan catyí ra naha:

—¡Jutu Mañi yu, tata ra David, cundaahvi iñi tsi ndi! —catyí ra naha.

<sup>31</sup> Tan nyivi quitsaha caahán ñi tsihin ra naha na casi ra naha yuhu ra naha. Maa tyin ñihi ca cana tsaa ra naha:

—¡Jutu Mañi yu, tata ra David, cundaahvi iñi tsi ndi!

<sup>32</sup> Tacan tan tsicuiñi ra Jesús tan cana ra tsi nduvi taahan ra cuaa can, tan tsica tuhun ra tsi ra naha tan catyí ra:

—¿Náa cuñí ndo javaha yu tsi ndo?

<sup>33</sup> Tan nacahan ra naha tan catyí ra naha:

—Jutu Mañi yu, jananyehe tsi ndi.

<sup>34</sup> Tacan tan cundaahvi ñni ra Jesús tsi ra naha, tan tñn ra tinuu ra naha. Tan iin yaha ñi nanyehe ra naha, tan cuiti cuanyicún ndihi ra naha tsi ra Jesús.

## 21

*Nu cuahan ra Jesús ñuu Jerusalén*

*(Mr. 11.1-11; Lc. 19.28-40; Jn. 12.12-19)*

<sup>1</sup> Tsa cua tsa ra naha ñuu Jerusalén, tan tsa ra naha ñuu Betfagé, yatyin ñi yucú Olivo nu iyó yutun olivo. Tacan tan tava tyiñu ra Jesús tsi uvi ra tsicá tsihin ra.

<sup>2</sup> Tan catyí ra tsihin ra naha:

—Cuaahan ndo ñuu tsa canyí ityi nuu ihya. Tan ican cua ñihi ndo iin urru sñhi, nuuhñí ti. Tan ndacá ti iin urru luhlu. Ndatsi ndo tsi ti, tan quitsi ndaca ndo tsi ti naha ti tsi yu.

<sup>3</sup> Tan tatun yóo tsicá tuhun tsi ndo: “¿Náa cuú ndo tsi ti naha ti?”, tan catyi ndo tsihin ñi: “Tyin tsiñí ñuhu ti naha ti tsi maa ra ndacá ñaha, maa tyin numi ñi cua quitsi ndaca nyico ndi tsi ti naha ti”, catyi ndo tsihin ñi —catyí ra.

<sup>4</sup> Tacan cuvi tyin cundaa tsa cahan ra cuvi ndusu yuhu Jutu Mañi yo tahan tsanaha nu catyi ra tyehen:

<sup>5</sup> Cahan ndo tsihin nyivi ñuu Sión:

“Nyehe ndo, vatsí rey ndo nu iyó ndo.

Ndaahvi ñi vatsí ra yosó ra iin urru luhlu, sehe iin quiṭi tsa tuhvá nyisó carga”, catyí ra cuví ndusu yuhu Nyoo can.

<sup>6</sup> Tacan tan cuahán ra tsicá tsihin ra Jesús, tan javaha ra naha tumaa tsa cahan ra tsihin ra naha.

<sup>7</sup> Quitsi ndaca ra naha tsi ti tsihin sihi ti. Tan tyiso ra naha jahma ra naha tsata ti, tan ndaa ra Jesús tsi ti.

<sup>8</sup> Tan cuaha xaan nyivi tsaquin ñi jahma ñi nu ñuhu ityi nu cuahán ra, tan inga ñi tsahnya ñi ndaha yutun tsaquin ñi tsitsi ityi.

<sup>9</sup> Tan nyivi tsa cuahán ityi nuu tan ityi tsata, quitsaha caná tsa ñi tan catyí ñi:

—¡Cahnu xaan cuví ra cuví tata ra rey David!  
¡Cahnu xaan cuví ra tsa jaquitsi Jutu Mañi yo Nyoo!  
¡Tan na jacahnu yo tsi Nyoo ra nyaá gloria! —catyí ñi.

<sup>10</sup> Cuhva tsa tsaá ra Jesús ñuu Jerusalén can, tandihi maa nyivi ñuu quitsaha cuvaá jahá ñi, tan cuaha xaan ñi tsicá tuhun tahan ñi tsi ñi, tan catyí ñi:

—¿Yóo ra cuví ra ihya?

<sup>11</sup> Tan catyí ñi:

—Ra Jesús, ra cuví ndusu yuhu Nyoo, ra ñuu Nazaret tsa canyií Galilea cuví ra —catyí ñi.

*Nu tava ra Jesús tsi nyivi xicó tsitsi vehe ñuhu cahnu*

*(Mr. 11.15-19; Lc. 19.45-48; Jn. 2.13-22)*

<sup>12</sup> Yaha can tan quihvi ra Jesús tsitsi vehe ñuhu cahnu Nyoo. Tan tava ra tsi tandihi nyivi jatá tan xicó ican. Tan janduva ra mesa nu nasamá ñi xuhun. Tan janduva ra tyayu nu xicó ñi paloma.

<sup>13</sup> Tan catyí ra tsihin nyivi:

—Nu tutu Nyoo catyí tyin vehe Nyoo, nu tsicán tahvi yo tsi ra cuví tsi, tan tacan cua cunañi tsi. Tan nyooho jananduví ndo vehe ihya, vehe ñasuhu —catyí ra tsihin ñi.

<sup>14</sup> Tan tsa tsito juhva ra cuaa tan ra coxo naha ra tyin nyíí ra Jesús tsitsi vehe ñuhu cahnu, quihví ra naha tan janduvahá ra Jesús tsi ra naha.

<sup>15</sup> Tan nyehé ra jutu tsa cuví ityi nuu naha ra tan ra maestro cuenda ley vehe ñuhu cahnu naha ra tyin javahá ra Jesús tsa iyo. Tan tsiñi ra naha tyin caná tsa tsa nyihi tsitsi vehe ñuhu, tan catyí tsa nyihi can:

—¡Cahnu xaan cuví ra cuví tata ra rey David!  
—catyí tsi naha tsi.

Tacan tan cuxaān ra naha tsa tsiñi ra naha tsa caahán tsa nyihi can.

<sup>16</sup> Tan catyí ra naha tsihin ra Jesús:

—¿A tsiñi un tsa caahán tsa nyihi can?

Tan nacahān ra Jesús tan catyí ra:

—Tsiñi yu. Maa tyin ¿a ñaha ca cahvi nyooho nu tutu Nyoo nu catyí tsi tyehen?

Jutu Mañi yu, tsa nyihi tan lee tsa ndi tyaxín sii xaan tsitá tsi naha tsi jahá un.

Tan vaha xaan jacahnú tsi tsi un, catyí tsi, —catyí ra Jesús.

<sup>17</sup> Tacan tan nacoō ra tsi ra naha, tan quita ra ñuu can cuahán ra ñuu Betania. Tan ican ndoō ra tsacuaa can.

*Nu cahān ra Jesús tsi yutun higo tsa ña tsahá tsiti (Mr. 11.12-14, 20-26)*

<sup>18</sup> Tan tsa tuvi cuii ñi inga quivi can, vatsí nyico ra Jesús nda ñuu Jerusalén, tan tsaā soco tsi ra.

19 Tan nyehe ra nyaá iin yutun higo yatyin ñi yuhu ityi can. Tan natuhva ra nu nyaá tun, maa tyin nduve maa náa nañihí ra nuu tun. Maa ñi ndaha tun iñi. Tacan tan catyí ra tsihin tun:

—¡Ndi inga tsaha ña cua cuhva ca un tsiti!

Tan juvin ñi cuhva can na ityi tun.

20 Tan tsa nyehe ra tsicá tsihin ra tsa javaha ra tsi tun, iyo xaan cuñí ra naha, tan tsicá tuhun ra naha tsi ra tan catyí ra naha:

—¿Nacuenda tsa numi xaan na ityi yutun higo can?

21 Tan nacahan ra Jesús tan catyí ra:

—Tsa nditsa catyí yu tsihin ndo, tyin tatun tsinú iñi ndo tan ña ndu uvi iñi ndo, ñavin tsa javaha yu tsihin yutun higo ihya ñi cuví javaha tucu nyooho, tyin cuví ndihí tucu catyi ndo tsihin yucu ihya: “Cuatsiyo ihya tan cuhun un nda tsitsi ndutya ñuhu.” Tan cua cuhun tsi.

22 Tan tandihí tsa cua ndacan ndo nu cua ndacan tahvi ndo tsi Nyoo, tatun tsinú iñi ndo tyin cua cuhva ra, cua ñihi ndo —catyí ra Jesús.

*Nu tsicá tuhun ra cumí tyiñu vehe ñuhu naha ra tsi ra Jesús yoo tava tyiñu tsi ra tyin cahan ra tsihin nyivi*

*(Mr. 11.27-33; Lc. 20.1-8)*

23 Yahá can tan quihvi ra Jesús tsitsi vehe ñuhu cahnu, tan tsitsi tsa jacuahá ra ican, natuhva ra jutu tsa cuví ityi nuu naha ra nu nyaá ra, tan ra cuví mandoñi ñuu Israel naha ra. Tan tsicá tuhun ra naha tsi ra tan catyí ra naha:

—¿Yóo tava tyiñu tsi un tsa javahá un tyehen?  
—catyí ra naha.

24-25 Tan nacahan ra Jesús tan catyí ra:

—Yuhu tucu cuñí yu ndaca tuhun yu tsi nyooho. ¿Yóo jaquitsi tsi ra Juan tyin jacoondutya ra tsi nyivi? ¿A Nyoo jaquitsi tsi ra, o nyivi? Tatun catyi tuhun ndo tsihin yu, cua catyi tuhun tucu yuhu tsihin ndo yóo tava tyiñu tsi yu tsa javahá yu tyehen —catyí ra Jesús tsihin ra naha.

Tacan tan ra ican naha ra quitsaha caahán yuhu tahan ra naha, tan catyí ra naha:

—Tatun catyí yo tyin Nyoo jaquitsi tsi ra Juan, cua catyi ra tsihin yo: “Tun tacan, ¿nacuenda ña tsinú iñi ndo tsi ra?”

<sup>26</sup> Tan tatun catyi yo tyin nyivi jaquitsi tsi ra, yuuhví yo coto cuxaan nyivi tsi yo, tyin tandihi ñi tsinú iñi ñi tyin ra Juan, cuenda Nyoo cahan ra —catyí ra naha.

<sup>27</sup> Tacan tan catyí ra naha tsihin ra Jesús:

—Ña tsitó ndi.

Tacan tan ra Jesús catyí ra tsihin ra naha:

—Tan ndi yuhu, tan ña catyi tuhun yu tsihin ndo yóo tava tyiñu tsi yu.

*Nu caahán ra Jesús iin cuhva cuenda uvi taahan sehe iin rayi*

<sup>28</sup> Ra Jesús catyí ra tsihin ra cumi tyiñu vehe ñuhu naha ra:

—¿Nacaa catyí ndo cuenda tsa cua cahan yu ihya? Iin rayi, iyó uvi taahan sehe ra. Tan catyí ra tsihin iin sehe ra: “Cuaahan cua jaha tyiñu nu iyó tyiñu jahá yu.”

<sup>29</sup> Tan nacahan sehe ra tan catyí ra: “¡Ña cahun yu!” Maa tyin yaha can tan nasama cuhva tsicá iñi ra tan tshahā ra tsijahā tyiñu ra.

<sup>30</sup> Yaha can tan jutu ra cahan ra tsihin inga sehe ra. Tan catyí tucu ra tsihin ra na cuhun ra cujaha tyiñu ra. Tan ra ican numi ñi quihin ra tyiñu tan catyí ra: “Vaha, tyaa, cuhun maa yu.” Maa tyin ña tsahan ra.

<sup>31</sup> Tsitsi tsa nduvi taahan ra can naha ra, ¿ndáa ra javaha tsa cahan jutu ra? —catyí ra Jesús.

Tan nacahan ra naha tan catyí ra naha:

—Ra tsa cahan ra tsihin tsa jihna ñi.

Tan catyí ra Jesús tsihin ra naha:

—Tsa nditsa catyí yu tsihin ndo, tyin nyivi caquiñi tumaa ra tsa tava xuhun cuenda ra ndaca ñaha tan ñi si ñi caca nuu, jihna ca ñi cua quihvi nu ndaca ñaha Nyoo tan ñavin ca nyooho.

<sup>32</sup> Tyin ra Juan, ra jacoondutya tsi nyivi, quitsi ra jacuahá ra tsi ndo nácaa taahan tsi coo cuiti ndo, tan nyooho ña tsinu ñi ndo tsi ra. Maa tyin ra tava xuhun naha ra tan ñi si ñi caca nuu tsinu ñi ñi tsi ra. Tan nyooho vasu ndi maa nyehe ndo yacan, maa tyin ña nasama ndo cuhva iyó ndo, tan ña tsinu ñi ndo tsi ra.

*Nu caahan ra Jesús tyin tumaa cuvi juhva nu caquiñi nahnu, tacan cuvi ra tsa cua cahñi tsi ra  
(Mr. 12.1-12; Lc. 20.9-19)*

<sup>33</sup> Tyaa soho ndo inga cuhva ihya: Tsicoo iin rayi, tan iyó ñuhu ra. Tan tatsi ra yoho yucu vixi tsa nañi uvas, tan tyihí ra cora. Tan javaha ra iin nu cua tava ra ndutya uvas can. Tan javaha tucu ra iin vehe sucun tyin cuvi jaha cuenda ra tandihi.

Yaha can tan tsaha nuu ra ñuhu can tsi juhva ra cua jaha tyiñu naha ra, tan cuahan ra inga ñuu.

34 Tan tsa tsaá quiví tsa iyó uvas can, jacuhun ra tsi juhva musu ra, na ndacan ra naha tsi ra jahá tyiñu can naha ra, na cuhva ra naha juhva uvas tsa taahán tsi tsi ra.

35 Maa tyin ra jahá tyiñu can tñin ra naha tsi musu can naha ra, tan cañi ra naha tsi iin ra. Tan inga ra tsahñi ra naha, tan cañi ra naha yuu tsi inga ra.

36 Tacan tan tsa inga tsaha, cuaha ca musu jacuhun tsitoho cora can tan ñavin ca tsa jihna ñi. Maa tyin tumaa tsa javaha ra naha tsihin ra tsa tsahan jihna naha ra, tacan ñi javaha nyico ra naha tsihin ra ihya naha ra.

37 Nu ndihí jacuhun ra tsi maa maa sehe ra, tyin cuñí maa ra tyin cua tyaa yahvi ra naha tsi sehe ra.

38 Maa tyin cuhva tsa nyehe ra jahá tyiñu can naha ra tsi sehe ra, natuhun tahan ra naha tan catyí ra naha: “Ra ihya cua ndoo tsihin tandihí tsa iyó ihya. Na cahñi yo tsi ra tan ndoo maa yo tsihin cora ihya”, catyí ra naha.

39 Tacan tan tñin ra naha tsi ra, tan tava ra naha tsi ra ityi tsata cora can, tan tsahñi ra naha tsi ra —catyí ra Jesús.

40 Tacan tan tsicá tuhun ra Jesús tsi ra naha tan catyí ra:

—Quiví cua quitsi ra jatsii ñuhu can, ¿náa cua javaha ra tsihin ra jahá tyiñu can naha ra?

41 Tan nacahan ra naha tan catyí ra naha:

—Ña cua cuatu ra, tyin cua cahñi ra tsi ra caquiñi can naha ra. Tan cua cuhva nuu ra ñuhu can tsi inga ra jaha tyiñu naha ra, tan quiví coo uvas, cua nacuhva cuenda ra naha juhva tsa taahán tsi tsi ra cuví tsitoho cora can.



<sup>42</sup> Tacan tan catyí ra Jesús tsihin ra naha:  
—¿A ñaha ca cahv̄i nyooho nu tutu Nyoo nu catyí tsi tyehen?

Yuu tsa javit̄a ihñi ra javahá vehe,  
Yacan cuví yuu tsa ñiñi ca.

Jutu yo Nyoo cuví ra tsa javah̄a tandih̄i can.  
Tan iyo xaan cuñí yo nyehé yo, catyí tsi.

<sup>43</sup> Yacan cuenda catyí yu tsihin ndo tyin ña cua cuhva Nyoo cuhun ndo nu ndacá ñaha ra. Tan cua cuhva ra tsi nyiv̄i tsa javahá cuhva cuñí ra tyin nditsa tsahá ñi tsi ñi cundaca ñaha ra.

<sup>44</sup> Tan tsa cuenda yuu can, yóo nyiv̄i tsa nduva siqui tsi, cua tahn̄u cuatyí ñi. Tan tatun yuu can tan canacava tsi siqui yóo nyiv̄i, cua taxin nyihi ñi —catyí ra Jesús.

<sup>45</sup> Cuhva tsa tuv̄i iñi ra jutū tsa cuví ityi nuu can naha ra tan ra fariseo naha ra tyin cuenda maa ra naha cah̄an ra Jesús cuhva ihya,

<sup>46</sup> cuñi ra naha t̄in ra naha tsi ra, maa tyin yuuhví ra naha tsi nyiv̄i tyin tsinú iñi ñi tyin ra Jesús caahán ra cuenda Nyoo.

## 22

*Nu cah̄an ra Jesús iin cuhva cuenda vico tindaha (Lc. 14.15-24)*

<sup>1</sup> Quitsah̄a caahán ra Jesús tsihin nyiv̄i inga tsaha tsihin cuhva, tan catyí ra:

<sup>2</sup> —Tsa ndacá ñaha Nyoo tsi nyiv̄i cuví tsi tumaa iin rey tsa javah̄a iin vico tsa cuenda tsa cua tindaha sehe ra.

<sup>3</sup> Tan jacuh̄un ra tsi musu ra na cucana ra naha tsi nyiv̄i tsa jacot̄o ra tyin cuhun ñi, maa tyin ñi ican, ña cuñi ñi cuhun ñi.

<sup>4</sup> Tan jacuhun nyico ra inga ca musu ra, tan catyí ra tsihin ra naha: “Cahan ndo tsihin ñi na quitsi ñi, tyin tsa iyó vaha tsa cua catsi yo. Tan tsa tsahñi yu indiqui tan inga quiti xaahan. Tan tsa iyó vaha tandihi. Yacan na quitsi ñi”, catyí ra.

<sup>5</sup> Maa tyin ñi ican ña tyaa yahvi ñi tsa cahan ra. Iin ra tsahan ra nu iyó cora ra, inga ra tsahan ra nu jahá tyiñu ra.

<sup>6</sup> Tan inga ra naha tñin ra naha tsi musu rey can naha ra tan cañi xaan ra naha tsi ra naha nda cuando tsahñi ra naha tsi ra naha.

<sup>7</sup> Tacan tan ra rey can cuxaan xaan ra, tan jacuhun ra tsi andaru ra na cucahñi ra naha tsi ra tsa tsahñi tsi musu can naha ra, tan cahmi ra naha ñuu ra naha.

<sup>8</sup> Tacan tan catyí ra rey can tsihin musu ra: “Tandihí tan tsa iyó vaha tsa cuenda vico tindaha, maa tyin ñi cana yu, ña taahán tsi tsa quitsi ñi.

<sup>9</sup> Cuaahan ndo ityi cahnu tan cana ndo tsi tandihí nyivi tsa nañihi ndo na quitsi ñi vico tindaha”, catyí ra rey can.

<sup>10</sup> Musu can cuahán ra naha tandihí ñi ityi, tan jandu iin ra naha tsi tandihí nyivi nañihi ra naha: ñi caquiñi tan ñi vaha iñi. Tacan tan tsitu tsitsi vehe ra tsihin nyivi.

<sup>11</sup> Tacan tan quihvi ra rey can cua nyehe ra tsi tandihí nyivi tsa yucú vico yuvehe ra. Tan nyehe ra tyin nyaá iin ra tsa nduve jahma vico tindaha nditsí.

<sup>12</sup> Tan catyí ra rey tsihin ra: “Tsa, ¿nacuenda nyíi un ihya tan nduve jahma vico tindaha nditsi un?” Tan ña nacahan maa ra can.

<sup>13</sup> Tacan tan catyí ra rey can tsihin ra tyihí mesa

can naha ra: “Cuhñi ndo tsaha ra tan ndaha ra, tan tava ndo tsi ra nu naa ityi tsata vehe. Ican cua vacu ra, tan catsan ña cua cuvi nuhu ra”, catyí ra.

<sup>14</sup> Tyin cuaha xaan nyivi nacana Nyoo, maa tyin juhva ñi ñi nacatsi ra —catyí ra Jesús.

*Nu caahán ra Jesús tsa cuenda tsa tyahví nyivi xuhun tsi ra ndacá ñaha nda ñuu Roma (Mr. 12.13-17; Lc. 20.20-26)*

<sup>15</sup> Tacan tan cuahán ra fariseo naha ra tan ndoo ra naha tyiñu tyin cua jacahan ra naha tsi ra Jesús iin tsa ña vaha, tyin tacan tan cuvi tyaa ra naha cuatyí siqui ra.

<sup>16</sup> Tan jacuhun ra naha tsi juhva ra yihí cuenda ra naha, iin caa ñi tsihin juhva ra yihí cuenda ra Herodes. Tan catyí ra naha tsihin ra Jesús:

—Maestro, tsitó ndi tyin tsa nditsa caahán un. Tan tsihin tsa nditsa janahá un ityi Nyoo. Tan inducu ñi cuñí un nyehe un tsi nyivi cuca tan nyivi ndaahvi.

<sup>17</sup> ¿Nacaa tsicá tucu iñi yooho: A vaha tyahví yo tsa tsicán ra ndacá ñaha nda ñuu Roma, o ña vaha?

<sup>18</sup> Tan ra Jesús tuví iñi ra tyin ña vaha cuhva tsicá iñi ra naha, tan catyí ra tsihin ra naha:

—Nyooho tsa jahá tyin vaha xaan ndo, tan ña nditsa. ¿Nacuvi tyin nducú cuhva ndo tsi yu?

<sup>19</sup> Janaha jihna ndo iin xuhun tsa tuhvá yo tyahví tsi ra ndacá ñaha tsi yu —catyí ra.

Tan tsindacá ra naha iin xuhun tsa nañí denario tsi ra.

<sup>20</sup> Tan tsa nyehe ra Jesús xuhun can, tsicá tuhun ra tsi ra naha tan catyí ra:

—¿Yóo nuu tan yóo sivi nyaá ihya?

<sup>21</sup> Tan nacahan ra naha tan catyí ra naha:

—Nuu ra ndacá ñaha.

Tacan tan catyí ra Jesús tsihin ra naha:

—Tun tacan jiin, cuhva ndo tsa tsii ra ndacá ñaha tsi ra, tan cuhva ndo tsa tsii Nyoo tsi maa ra —catyí ra.

<sup>22</sup> Tsa tsiñi ra naha tsa cahan ra Jesús, iyo xaan cuñi ra naha. Tan cuahán ra naha.

*Nu cuñi ra cuví saduceo naha ra jandavi ñaha ra naha tsi ra Jesús*

*(Mr. 12.18-27; Lc. 20.27-40)*

<sup>23</sup> Juvín ñi quivi can juhva ra cuví saduceo naha ra tsa<sub>h</sub>an ra naha nu nyí ra Jesús. Tan ra cuví saduceo can ña tsinú iñi ra naha tsa cua nandoto ndiyi quivi tsa cua naa ñuu ñayivi. Yacan cuenda tsica<sub>h</sub> tuhun ra naha tsi ra Jesús, tan catyí ra naha:

<sup>24</sup> —Maestro, ra Moisés catyi ra tyin tatun iin ra tindaha<sub>h</sub> tan tsihi ra tan ña tsicoo<sub>o</sub> sehe ra, taahán tsi tsa tindaha yañi ra tsihin ñasihi ra. Tacan tan cua coo<sub>o</sub> sehe ra tsihin ña tsa cuenda ra yañi ra tsa tsihi.

<sup>25</sup> Vaha. Tun iin ra tan iyó utsa sehe yi ra, tan ra tsa jihna ñi tindaha<sub>h</sub> ra. Tan nduve sehe ra tsicoo<sub>o</sub> tsihin ñasihi ra tan tsihi ra. Ndo<sub>o</sub> ñasihi ra tsi yañi ra tsa tsinu uvi.

<sup>26</sup> Tan juvin ñi tsihi ndi<sub>h</sub> ra can. Tan ndoo<sub>o</sub> ñaha can tsihin ra tsa tsinu uñi, maa tyin juvin ñi tacan taha<sub>h</sub> ndi<sub>h</sub> ra. Tan inducu ñi taha<sub>h</sub> tandi<sub>h</sub> tsa utsa ra naha.

<sup>27</sup> Tan nu ndi<sub>h</sub> ña tsihi ndi<sub>h</sub> maa ñaha can.

<sup>28</sup> Tatun nditsa tsa cua nandoto nyivi tsihi, ¿ndáa tsa utsa taahan ra can naha ra cua cuvi yi ña? Tyin tandi<sub>h</sub> maa ra naha tindaha<sub>h</sub> tsihin ña —catyí ra naha.

<sup>29</sup> Tan naca<sub>h</sub>an ra Jesús tsihin ra naha tan catyí ra:

—Nyooho, caahán soho ñi maa ndo, tsa cuenda tyin ña tsitó ndo tsa nyaá nu tutu Nyoo, tan ndi ña tsitó ndo nácaa tsa cahnu cuví tunyee iñi tsa iyó tsi Nyoo.

<sup>30</sup> Tyin quivi cua nandoto nyivi tsihi, ndi ña cua tindaha ñi, tan ndi ña cua cuhva ñi sehe sihi ñi tindaha, tyin cua cuvi ñi tumaa cuví ángel tsa iyó gloria.

<sup>31</sup> Tyin tuhun Nyoo tsahá cuenda tsi nácaa cuví tuhun tsa cua nandoto nyivi tsa tsihi. ¿O ñaha ca cahvi ndo nu tsahá cuenda Nyoo tuhun can tsi ndo? tan catyí tsi tyehen:

<sup>32</sup> “Yuhu cuví Nyoo cuenda ra Abraham, tan ra Isaac tan ra Jacob.”

Ihya nyehé yo tyin nyito aña ra can naha ra, vasu tsanaha tsihi ra naha. Tyin Nyoo ñavin Nyoo cuenda nyivi tsihi cuví ra, tyin Nyoo cuví ra Nyoo cuenda nyivi nyito —catyí ra.

<sup>33</sup> Tan tsa tsiñi nyivi tsa caahán ra Jesús, iyo xaan cuñi ñi.

*Ley tsa ñiñi ca tsa tsaha Nyoo*  
(Mr. 12.28-34)

<sup>34</sup> Tsa tsitó ra fariseo naha ra tyin ra Jesús tyasi ra yuhu ra saduceo naha ra, ndu iin ra naha.

<sup>35</sup> Tan iin ra tsa nyii tsihin ra naha cuví ra maestro cuenda ley vehe ñuhu tan cuñi ra nducu cuhva ra tsi ra Jesús. Tan tsica tuhun ra tsi ra, tan catyí ra:

<sup>36</sup> —Maestro, ¿ndáa ley cuví tsa ñiñi ca?

<sup>37</sup> Tan catyí ra Jesús tsihin ra:

—“Cuñi tsi Jutu Mañi yo Nyoo tsihin tsa n̄i iñi un tan tsihin tsa n̄i iñi añima un, tan tsihin tandihi tsa tsiñi tuñi jiñi un.”

<sup>38</sup> Ley ihya cuví tsa ñiñi ca, tan tsa jihna ñi taahán tsi javaha yo.

<sup>39</sup> Tan tsa tsinu uvi, tsa yatyin inducu ñi caahán tsi tumaa caahán tsa jihna ñi tan catyí tsi tyehen: “Cuñi tsi nyivi tahan un tumaa cuñi un tsi maa un.”

<sup>40</sup> Tatun tyaá yahvi ndo nduvi taahan ley ihya, tsa tyaá yahvi ndihi ndo tandihi ca ley tsa tyaá ra Moisés jahā Nyoo, tan tandihi tuhun tsa jacuahā ra cuví ndusu yuhu Nyoo tahān tsanaha.

*Ra Cristo cuví ra Sehe Nyoo tan juvin ñi cuví ra tata ra David*

*(Mr. 12.35-37; Lc. 20.41-44)*

<sup>41</sup> Tsitsi tsa ndi yucú ra fariseo naha ra nu ndu iin ra naha,

<sup>42</sup> ra Jesús tsicā tuhun ra tsi ra naha, tan catyí ra:

—¿Nacaa tsicá iñi nyooho cuenda ra cuví Cristo? ¿Yóo tata cuví ra, cuñi maa ndo?

Tan nacahān ra naha tan catyí ra naha:

—Tata ra David cuví ra.

<sup>43</sup> Tacan tan ra Jesús catyí ra tsihin ra naha:

—Tun tacan, ¿nacuenta jacahān Tatyí Ii Nyoo tsi ra David tyin ra ndacá ñaha tsi ra cuví ra Cristo tan catyí ra tyehen?:

<sup>44</sup> Nyoo cahān tsihin Jutu Mañi yu, ra Cristo, tan catyí ra tsihin ra:

“Cunya xiin cuaha yu nda cuanda caquin yu tsi ra xaan iñi tsi un naha ra tsaha un”, catyí ra David.

<sup>45</sup> ¿Nacaa cuví cuú tucu ra Cristo tata ra David, tan juvin ñi maa ra David catyí ra tyin ra Cristo Jutu Mañi ra cuví tsi ra? —catyí ra Jesús.

<sup>46</sup> Tan yoñi maa cuví nacahan nu cahān ra ndi intuhun maa tuhun. Tan nda quiví can, yoñi ca maa cuñí nducu tuhun tsi ra.

## 23

*Nu caahán ra Jesús tyin cuaha xaan cuatyí ra maestro cuenda ley vehe ñuhu naha ra tan ra fariseo naha ra*

*(Mr. 12.38-40; Lc. 11.37-54; 20.45-47)*

<sup>1</sup> Tacan tan ra Jesús catyí ra tsihin tandihí nyívi, tan tsihin ra tsicá tsihin ra:

<sup>2</sup> —Ra cuví maestro cuenda ley naha ra tan ra cuví fariseo naha ra taahán tsi tsa jacuahá ra naha cuhva catyí ley tsa tyaá ra Moisés.

<sup>3</sup> Yacan cuenda tyaá yahvi ndo tsa caahán ra naha tan javaha ndo tandihí cuhva caahán ra naha tsihin ndo. Maa tyin ña javaha ndo cuhva javahá ra naha, tyin maa ra naha, sñin tsa jacuahá ra, tan sñin tsa javahá ra naha.

<sup>4</sup> Janducuahá ca ra naha ley tsa tsaha Nyoo tahān tsanaha. Tan cuñí ra naha tsa javaha nyívi tandihí can. Maa tyin ña cunyeē ñi javahá ñi tandihí can, tan ndi maa ra naha tan ña cuñí ra naha javaha ra naha can.

<sup>5</sup> Tyin maa ra naha tyaá ra naha caja ñi nu yihí tuhun Nyoo nutyaan ra naha tan soco ra naha, maa tyin nahnu ca can tan ñavin ca tsa nyecú tsi inga ca nyívi. Tan tsinditsí ra naha jahma nañi ca tan ñavin ca tsa iyó tsi inga ca nyívi. Javahá ra naha

tandihí can tyin na nyehe nyívi tyin vaha xaan ca ra naha.

<sup>6</sup> Tan nu vaha ca, cuñí ra naha cunyecu ra naha nu iyó vico tan catsi ra naha. Tan nu vaha ca cuñí ra naha cunyecu ra naha tsitsi vehe ñuhu.

<sup>7</sup> Tan nu tsicá nuu ra naha cuñí ra naha tyin cuhva nyívi nacumi tsi ra naha tyin jahá ñi tsa ñayívi tsi ra naha. Tan cuñí tucu ra naha tsa catyi ñi “maestro” tsihin ra naha.

<sup>8</sup> Maa tyin nyooho, ña cuhva ndo tsa cahan nyívi “maestro” tsihin ndo. Tyin intuhun ñi maa ra Cristo cuví maestro tsa nyíi tsihin ndo, tan tandihí ca maa ra naha yañi ndo cuví tsi ra naha.

<sup>9</sup> Tan ña cahan ndo Jutu ndo tsihin ndi intuhun rayí ñuu ñayívi ihya, tyin intuhun ñi ra nyaá gloria cuví Jutu ndo.

<sup>10</sup> Tan ña cahan ndo tyin ra cuví ityi nuu cuví ndo, tyin intuhun ñi maa ra Cristo cuví nuu tsihin ndo.

<sup>11</sup> Ra tsa jahá tyiñu tyiñu tandihí ca ra naha, ra ican cuví ra cahnu ca nu yucú ndo.

<sup>12</sup> Tyin ra cahnu jahá tsi ra, cua janduluhlu Nyoo tsi ra. Tan ra ña cahnu jahá tsi ra cua nducahnu ra jaha Nyoo.

<sup>13</sup> ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo tyin jahá ndo tyin vaha xaan ndo, tan ña nditsa! Tyin tyasí ndo yuvehe nu ndacá ñaha Nyoo, tan ña cuvi quihvi nyívi. Tan ndi maa ndo ña quihvi ndo, tan ndi ña tsahá ndo tsa quihvi nyívi tsa cuñí quihvi.

<sup>14</sup> ¡Ndahvi nyooho ra cuví maestro cuenda ley tan nyooho ra cuví fariseo. Jahá ndo tyin vaha xaan ndo, tan ña nditsa! Iyo ña cuahán tucu ndo



cua ndacan tahvi ndo tsi Nyoo nu tuvi nyiví tyin jahá ndo tyin vaha xaan ndo. Maa tyin nduve náa catyí tyin quihín nyaa ndo vehe ñi ndaahvi tsa tsihí yí tyin ña cuví tyahvi ñi xuhun tsa tsicán ndo tsi ñi. Yacan cuenda cahnu ca tundoho cua nyehe ndo jaha Nyoo.

<sup>15</sup> ¡Ndahvi nyooho ra maestro cuenda ley vehe ñuhu tan nyooho ra fariseo! ¡Jahá ndo tyin vaha xaan ndo, tan ña nditsa! Tyin nanducú ndo ñi cahnu nu ñuhu ñayiví tyin cuñí ndo nañihi ndo vasu intuhun nyiví cunyicun tsi ndo. Tatun tsa quihví ñi cuenda ndo, quiñi ca iyó ñi jahá ndo, tan ñavin ca maa ndo. Tan cua cuhun ñi anyaya tsihin ndo.

<sup>16</sup> ¡Ndahvi nyooho ra ndaahvi! Tyin cuñí ndo jaquihin ityi ndo tsi nyiví, ¡maa tyin cuaa ndo! Caahán ndo tyin yóo nyiví cua cahan “Naha Nyoo” tsa cuenda vehe ñuhu, nduve ñi náa cua cuví tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda xuhun cuaan tsa iyó vehe ñuhu, tacan tan taahán tsi javaha ñi tsa cahan ñi, catyí ndo.

<sup>17</sup> ¡Soho xaan ndo tan cuaa ndo! ¿Ndáa tsa cahnu ca cuví? ¿A xuhun cuaan can, a vehe ñuhu tsa jandu í tsi xuhun cuaan can?

<sup>18</sup> Tan juvin ñi catyí tucu ndo tyin yóo nyiví cua cahan “Naha Nyoo” tsa cuenda altar tsa iyó vehe ñuhu, nduve ñi náa cua cuví tsi ñi tun ña tyaa yahvi ñi tsa cahan ñi. Maa tyin tun cua cahan ñi “Naha Nyoo” tsa cuenda tsa jamañí ñi nu altar, tacan tan taahán tsi javaha ñi tsa cahan ñi, catyí ndo.

<sup>19</sup> ¡Soho xaan ndo tan cuaa ndo! ¿Ndáa tsa cahnu ca cuví? ¿A tsa jamañí ndo nu altar can, o maa

altar tsa jandu í tsa jamañí ndo?

<sup>20</sup> Tyin nyívi caahán “Naha Nyoo” tsa cuenda altar can, ñavin cuenda altar ñi caahán ñi tuhun, tyin caahán ndíhi ñi tsa cuenda tandíhi tsa yosó nu altar can.

<sup>21</sup> Tan nyívi caahán “Naha Nyoo” tsa cuenda vehe ñuhu cahnu, ñavin cuenda vehe ñuhu ñi caahán ñi tuhun, tyin nda cuanda cuenda Nyoo caahán ñi tuhun, tyin iyó ra ican.

<sup>22</sup> Tan tacan tucu nyívi tsa caahán “Naha Nyoo” tsa cuenda gloria; nda cuanda tyayu Nyoo tan cuanda maa Nyoo caahán ñi tuhun, tyin maa ra cuví ra nyaá ndacá ñaha ndacan.

<sup>23</sup> ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! Jahá ndo tyin vaha xaan ndo tyin cahví ndo ndaha menta tan tsítí anis tsihin tsítí comino, tacan tan tavá ndo intuhun tsi tsa iin iin utsi, tan tsahá ndo tsi Nyoo. Maa tyin ña tyaá yahvi ndo ley nahnu ca tsa taahán tsi javaha yo: tsa javahá yo tsa vaha tsihin tandíhi nyívi, tsa cundaahvi iñi yo tsi ñi, tsa tsinú iñi yo tsi Nyoo tan ña nacoo yo tsi ra. Cuñí tsi javaha ndo tandíhi can, tan ña cua jandíhi ndo tsa cuhva ndo diezmo can.

<sup>24</sup> Nyooho ra cuaa, cuñí ndo jaquihin ityi ndo tsi nyívi, maa tyin ña cuví, tyin maa ndo ña jahá ndo cuenda cuatyi nahnu tsa javahá ndo, tan numi xaan nyehé ndo cuatyi nyihi ñi. Tan cuví tsi tumaa tsa tavá ndo tyucun luhlu nu tsa tsatsí ndo tan coco ndo iin camellu.

<sup>25</sup> ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! ¡Jahá ndo tyin vaha xaan ndo, tan ña nditsa! Tyin tumaa

nacatyá ndo vasu tan coho, tan ityi tsata ñi tsi nacatyá ndo tan ña nacatyá ndo ityi tsitsi, tyin ityi tsitsi can, nu ña nacatyá ndo, ican cuví añima ndo tan tsitu tsi tsihin tsa caquiñi: tsa suhú ndo tan tsa tsicá iñi ndo tsa coo cuaha ndaha tyiñu ndo.

<sup>26</sup> ¡Nyooho ra fariseo cuaa! Nacatyá jihna ndo ityi tsitsi vasu tan coho, tacan tan cua ndoo ndihí ityi tsata.

<sup>27</sup> ¡Ndahvi nyooho ra cuví maestro cuenda ley vehe ñuhu tan nyooho ra cuví fariseo! ¡Jahá ndo tyin vaha ndo, tan ña nditsa! Tyin cuví ndo tumaa iin ñaña ndiyi tsa nacahyi, tyin ityi tsata tsi sii xaan caá, maa tyin ityi tsitsi tsitu yiqui ndiyi, tan tandihí nuu tsa caquiñi.

<sup>28</sup> Tacan cuví nyooho, tyin cuñí nyivi tyin vaha xaan iñi ndo, maa tyin añima ndo ican quitá tsa jandaví ñaha ndo tan tandihí tsa caquiñi ndo.

<sup>29</sup> ¡Ndahvi nyooho ra cuví maestro cuenda ley vehe ñuhu, tan nyooho ra cuví fariseo! ¡Jahá ndo tyin vaha xaan ndo, tan ña nditsa! Tyin jandutyaquí ndo ñaña ra cuví ndusu yuhu Nyoo, tan nacahyi ndo ñaña nyivi vaha tsicoo tahan tsanaha.

<sup>30</sup> Tacan tan catyí ndo: “Tun tsatyin tsicoo yo quivi tsicoo tsii tsaahnu yo, ña cua jatyinyee yo tsi ra tsahñi tsi ra cuví ndusu yuhu Nyoo”, catyí ndo.

<sup>31</sup> ¡Tsihin yacan ñi tan nacotó ndo tyin cuví ndo tata nyivi tsahñi tsi ra cuví ndusu yuhu Nyoo!

<sup>32</sup> ¡Yacan vityin nyehe maa ndo na jaha ndo, javaha ndihí ndo tsa javaha tsii tsaahnu ndo, tun cuñí ndo!

<sup>33</sup> ¡Nyooho nyivi caquiñi cuví ndo, tan nyivi cuví tata coo! ¿Nacaa cua cacu ndo tan ña cua cahun ndo anyaya? Ña cua cuví.

<sup>34</sup> Yacan cuenda cua jaquitsi yu tsi ra cuví ndusu yuhu Nyoo nu yucú ndo, cua jaquitsi tucu yu tsi ra tsitó xaan naha ra nu yucú ndo, tan ra maestro naha ra cua tsaa ra naha nu yucú ndo. Maa tyin nyooho cua cahñi ndo tsi juhva ra, tan cua tyaa ndo tsi inga ra naha nu cruu. Tan inga ra naha cua cañi ndo tsi ra naha tsitsi vehe ñuhu. Tan cunyaa ndaha ndo tsi ra naha tan iin tan iin ñuu.

<sup>35</sup> Yacan cuenda, tsata nyooho cua cunyaa cuatyí tsa cuenda tandihí ra vaha tsa tsahñi tsi tsaahnu ndo nda cuanda tsihi ra Abel tan nda cuanda quivi tsihi ra Zacarías, sehe ra Berequías, tsa tsahñi ra naha tsitsi vehe ñuhu yatyin nu nyaá altar tsa yosó tsa jamañi yo tsi Nyoo.

<sup>36</sup> Tsa nditsa catyí yu tsihin ndo, tyin tandihí cuatyí can cua coso siqui nyooho, nyivi tsa iyó vityin —catyí ra Jesús tsihin ra naha.

*Nu nducuihya cuñi ra Jesús nyehé ra tsi nyivi ñuu Jerusalén*

*(Lc. 13.34-35)*

<sup>37</sup> ¡Ñuu Jerusalén! ¡Ndahvi nyooho nyivi ñuu Jerusalén! Tyin tsahñi ndo tsi ra cuví ndusu yuhu Nyoo. Tan cañi ndo yuu tsi tandihí ra tsa jaquitsi Nyoo nu yucú ndo. Tan yuhu cuaha xaan tsaha cuñi yu jaha cuenda yu tsi ndo, tumaa iin ndivi sihi tsa jahá cuenda tsi sehe ti, tan naquihín vaha ti sehe ti tsitsi nditsin ti, maa tyin ña cuñi ndo.

<sup>38</sup> Nyehe ndo vityin, tyin tsa nacoq ihñi Nyoo tsi ndo.

<sup>39</sup> Tan catyí yu tsihin ndo, tyin ña cua nyehe ca ndo tsi yu nda cuanda quita quivi tsa cua catyí ndo tyin cahnu xaan cuví ra vatsi tsihin siivi Nyoo Jutu yo —catyí ra Jesús.

## 24

*Nu caahán ra Jesús tyin cua tani vehe ñuhu cahnu  
(Mr. 13.1-2; Lc. 21.5-6)*

<sup>1</sup> Quita ra Jesús tsitsi vehe ñuhu cahnu can, tan tsa cuñí cuhun ra, tan natuhva ra tsicá tsihin ra nu nyaá ra, tan quitsaha caahán ra naha cuhva caá vehe ñuhu can tsihin ra.

<sup>2</sup> Maa tyin nacahan ra Jesús tan catyí ra:

—¿A nyehé ndo tandihi tsa iyó ihya? Tsa nditsa catyí yu tsihin ndo, tyin ihya ndi intuhun ca yuu tan ña cua coso tsata inga tsi. Tandihi maa can tan cua tani —catyí ra.

*Nu caahán ra Jesús náa cua cuvi tsa ndi cumañi  
ca naa ñuhu ñayivi  
(Mr. 13.3-23; Lc. 21.7-24; 17.22-24)*

<sup>3</sup> Tacan tan cuahán ra naha yucu Olivo. Tan cuhva tsa nyaá ra Jesús ican, ra tsicá tsihin ra tsahan ra naha nu nyaá ra tan nducú tuhun xeehe ra naha tsi ra tan catyí ra naha:

—Cuñí ndi tsa catyi tuhun un tsihin ndi, ama cua cuvi tandihi tsa cahan un. ¿Nacaa tan coto ndi tatun tsa cuyatyin tsa cua quitsi un inga tsaha tan tsa cua naa ñuhu ñayivi?

<sup>4</sup> Tacan tan nacahan ra Jesús:

—Jaha vaha ndo cuenda coto jandavi ñaha nyivi tsi ndo.

<sup>5</sup> Tyin cuaha xaan ra cua quitsi, tan cua cutyiñu ra naha sivi yu, tan cua catyí ra naha: “Yuhu cuví ra Cristo, ra tsa jaquitsi Nyoo.” Tan cuaha nyivi cua jandavi ñaha ra naha.

<sup>6</sup> Tan cua ñihi tuhun ndo tyin iyó cuatyi tan cañi tahan nyivi ityi can tan ityi ihya. Maa tyin ña

nayuhvi ndo, tyin tacan taahán maa tsi cua cuvi tsa ndi cumañi ca naa ñuhu ñayivi.

<sup>7</sup> Tyin nyivi iin ñuu cua cañi tahan ñi tsihin nyivi inga ñuu. Tan cua coo cuatyí iin ñuu tsihin inga ñuu. Tan cua coo tama, tan cua coo cuehe, tan cuaha ñi ityi cua taan ñihi.

<sup>8</sup> Tandihí yacan cua cuvi nu ndi cua quitsaha nyehé nyivi tundoho.

<sup>9</sup> Tacan tan cua cuhva cuenda nyivi tsi ndo tsi ra cumi tyiñu naha ra na tatsi tuñi ra naha tsi ndo. Tan cua cahñi ra naha tsi ndo. Tan tandihí nyivi iyó nu ñuhu ñayivi ndasi cua cuñi ñi nyehe ñi tsi ndo tsa cuenda yuhu.

<sup>10</sup> Quivi can cuaha xaan nyivi cua jaña ñi tsa tsinú iñi ñi tsi yu, tan ndasi cua cuñi ñi nyehe tahan ñi tsi ñi. Tan cua naxico ñaha tahan ñi tsi ñi.

<sup>11</sup> Tan cuaha xaan ra caahán cuendu cua coo, tan cua catyi ra naha tyin cuenda Nyoo caahán ra naha. Tan cuaha xaan nyivi cua jandavi ñaha ra naha.

<sup>12</sup> Tan cuaha xaan tsa caquiñi cua coo. Yacan cuenda cua jandihí ñi tsa cuñí tahan ñi tsi ñi.

<sup>13</sup> Maa tyin nyivi tsa tsinú iñi tsi yu nda cuanda nu ndihí, tan ña cua ndu uvi iñi ñi, cua cacu ñi.

<sup>14</sup> Tan taniñi cahnu ñuhu ñayivi cua nacutya tuhun vaha tsa cuenda cuhva tsa ndacá ñaha Nyoo. Tan quivi cua coto nyivi tandihí ñuu tuhun vaha ihya, tacan tan cua naa ñayivi.

<sup>15</sup> Ra Daniel, ra cuvi ndusu yuhu Nyoo, tyaq ra nu tutu Nyoo tyin coo tsa cua janducaquiñi, tsa cua jativi. Quivi tsa cua nyehe ndo can tsitsi vehe ñuhu Nu Ii, (nyooho tsa cahví, na cutuñi iñi ndo).

16 Tyin quiví can, nyiví tsa iyó Judea taahán tsi tsa quita ñi ican tan cahun ñi ityi yucu.

17 Tan nyiví yucú jiñi vehe, cua nuu ñi, maa tyin ña cua quihví ñi tsitsi vehe ñi tan tava ñi tsa iyó tsitsi vehe ñi.

18 Tan nyiví yucú tsitsi cuhu ña cua cunuhu jihna ñi cunaquihin ñi jahma ñi.

19 ¡Ndahvi ñiñaha tsa ñuhú sehe quiví can! O tatun iyó sehe ñi tsa tyaxín, ¡ndahvi ñi can!

20 Ndacan ndo tsi Nyoo na ña tahan tsi cunu ndo quiví vitsin, tan ndi quiví quitatú yo.

21 Tyin tundoho tsa cua nyehe nyiví quiví can, ñaha ca maa coo can nda quiví tsa tsinu ñuhu ñayiví. Tan ndi ityi nuu ca ña cua nyehe nyiví tundoho tacan inga tsaha.

22 Tyin tatun ña cua janducuiti Nyoo quiví can, yoñi maa cua cacu. Maa tyin cua janducuiti ra tsa cuenda tsa cuñí ra tsi nyiví nacatsi maa ra.

23 "Tatun yoo cua cahan tsihin ndo: "Jihna ndo, ihya nyaá ra Cristo" o "Nyehe ndo, ndacan nyaá ra Cristo", ña tsinu iñi ndo.

24 Tyin cua quitsi ra jandavi ñaha naha ra tan cua catyi ra naha tyin ra Cristo cuví ra naha. Cua catyi ra naha tyin ndusu yuhu Nyoo cuví ra naha. Tan cua javaha ra naha seña tan tsa iyo nahnu tyin cua jandavi ñaha ra naha nda cuanda nyiví tsa nacatsi maa Nyoo tun tsatyin cuvi jaha ra naha.

25 Vaha tyin tsa tsitó ndo vityin ihya, jaha ndo cuenda tsi ndo quiví can.

26 Yacan cuenda tatun catyí nyiví tsihin ndo: "Nyehe ndo, va ra Cristo nyii nu tsiqui can", Ña cahun ndo. O tatun catyí ñi tsihin ndo: "Nyehe ndo, nyii ra tsitsi cuarto ihya", ña tsinu iñi ndo.

<sup>27</sup> Tyin tumaa tsa cañí tatsa savi nyehé yo xiñu xaan nda ityi nu caná ñicanyii tan nda cuanda ityi nu tyisó ñicanyii, tacan cua cuvi quivi quitsi yuhu, Rayi tsa quee nda gloria.

<sup>28</sup> Tumaa natacá nditsii nu cayucú tsa iñi, tacan cua nataca nyivi yihí cuenda yu quivi quitsi yu inga tsaha.

*Nacaa cua quitsi Rayi tsa quee nda gloria inga tsaha*

*(Mr. 13.24-37; Lc. 21.25-33; 17.26-30, 34-36)*

<sup>29</sup> 'Tan tsa yaha tsa cua nyehe nyivi tundoho, ñicanyii cua ndunaa tsi, yoo ña cua jandunditsin ca tsi, tan tiñuu cua cucoyo tiñuu, tan tandihi tsa iyó andivi cua nacanda.

<sup>30</sup> Tacan tan cua quituvi seña ityi andivi tyin vatsí yuhu Rayi tsa quee nda gloria. Cua quitsi yu nu vico ityi andivi tsihin tunyee iñi cahnu tan tsihin tsa cahnu cuví Nyoo. Tan tandihi nyivi iyó nu ñuhu ñayivi, cua vacu tsaa xaan ñi tsa cua nyehe ñi tsi yu.

<sup>31</sup> Tan cuaha ángel cuenda yu cua jaquitsi yu tyin ñihi cua tivi ra naha cutu tan cua jandu iin ra naha tsi nyivi nacatsi maa Nyoo. Cua quita ñi tani cahnu nu ñuhu ñayivi, nda cuanda nu ndihi ñuhu ñayivi tan nda cuanda nu ndihi andivi.

<sup>32</sup> 'Cutuñi iñi ndo iin cuhva yutun tsa nañí higo: Tatun tsa yutya soco tun, tan tsa cana ndaha yutya tun, nyooho tsitó ndo tyin tsa cua coo tsiti tun.

<sup>33</sup> Tan juvin ñi tacan, tatun tsa cuví tandihi yacan nyehé ndo, cua coto ndo tyin tsa cuyatyin quitsi yu; tan tsa nyanaá yu yuvehe cuví tsi.



34 Tsa nditsa catyí yu tsihin ndo tyin tandihí yacan cua cuví jihna, tsa ndi cumañi ca cúu nyívi iyó nu ñuhu ñayívi.

35 Tan coo quívi cua cunaa andívi tan tsihin ñuhu ñayívi, maa tyin tuhun caahán yuhu, ña cua cundihí tsi tyin cua cundaa tandihí tsi.

36 'Maa tyin quívi tan hora tsa cua cuví yacan, yoñi tsitó, ndi ángel iyó gloria tan ña tsitó ra naha. Intuhun ñi maa Nyoo Jutu yo tsitó.

37 'Tumaa cuví quívi tsa tsicoo ra Noé, tacan cua cuví quívi tsa cua quítsi nyico yuhu Rayí tsa quee nda gloria.

38 Quívi tsa ndi cumañi ca cuun savi xaan, nyívi can, tsatsí ñi, tsihí ñi, tindahá ñi, tan tsahá ñi tsi sehe síhi ñi tindaha nda cuanda quívi quíhvi ra Noé tsitsi yutun ndoo.

39 Tan sana iñi ñi tan tsaá savi tan tañi tandihí ñi. Tan tacan sana iñi ñi tan cua tahan tsi quívi quítsi nyico yuhu Rayí tsa quee nda gloria.

40 Tan tatun yucú uvi taahan rayí tsitsi cuhu quívi can, intuhun ñi ra cua quihin yu, tan cua nacoo yu tsi inga ra.

41 Tan quívi can uvi taahan ñaha cua nyico ñi. Intuhun ña cua naquihin yu, tan inga ña cua ndoo ña.

42 Cuatu vaha ndo tyin ña tsitó ndo náa hora cua quítsi ra ndacá ñaha tsi ndo.

43 Tan coto ndo tuhun ihya tyin tatun iin tsitoho vehe tan tsitó ra náa cuhva cua quíhvi ñasuhu tsitsi vehe ra, cua cuatu vaha ra tan ña cua cuhva ra tsa quíhvi ñasuhu can.

44 Yacan cuenda nyooho, cuatu vaha ndo. Tyin sana iñi ndo, tan cua quítsi nyico yuhu Rayí tsa

quee nda gloria.

*Musu vaha tan musu ña vaha  
(Lc. 12.41-48)*

<sup>45</sup> 'Musu tsa tyaá soho tsa caahán tsitoho ra, juvin ra cuví musu vaha. Tyin jahá cuenda ra vehe tsitoho ra. Tan vaha hora tsahá ra tsa catsi tandihí ca musu.

<sup>46</sup> Tan sií xaan cuñí ra cuví musu vaha can, tatun cuhva tsa jahá tyiñu ra tan tsa tsitoho ra. Tyin tyaá yahvi ra tandihí tsa taahán tsi ica ra.

<sup>47</sup> Tan tsa nditsa catyí yu tsihin ndo, tyin tsitoho ra cua nacuhva ra tandihí cuii tsa cumí ra, cua quihí ndaha ra, tyin vaha tyaá yahvi ra tsihin tyiñu jahá ra.

<sup>48</sup> Maa tyin iin musu ña vaha tsicá ñi ra tyin cua cucuee tsitoho ra.

<sup>49</sup> Tacan tan quitsaha cañí ra tsi inga musu, tan tsatsí ra tan tsihí ra nyixi tsihin ra tsiñi naha ra.

<sup>50</sup> Tacan tan sana ñi ra tan cua tsa tsitoho ra quivi tsa ña ndatú ra tsi ra, tan hora tsa ña tsitó ra.

<sup>51</sup> Tacan tan tsitoho ra ñihi xaan cua tatsi tuñi ra tsi ra tumaa tuhvá maa ra icá tsihin nyivi tsa jahá tyin vaha xaan ñi tan ña icá ñi tsa vaha. Tacan tan cua vacu ra cuví musu ña vaha can tan cahyu ña cua cuvi nuhu ra tsa nyehé ra tundocho.

## 25

*Nu cahán ra Jesús iin cuhva cuenda utsi taahan ñaha yoco*

<sup>1</sup> 'Tsa ndacá ñaha Nyoo tsi nyivi cuví tsi tumaa utsi taahan ñaha yoco tsa quihín lámpara tsa yihí acetye tan cuahán ñi iin vico tindaha tyin cua jatahan ñi tsi ra tsa cua tindaha.

2 Uhun taahan ñi, soho xaan ñuhú iñi ñi, tan inga uhun taahan ñi can catsi xaan tsicá iñi ñi.

3 Ñi tsa soho ñuhú iñi can, nyisó ñi lámpara ñi maa tyin ña quih̄in ñi juhva ca acetye tsa natyih̄i ñi tsitsi lámpara ñi tatun ndih̄i tsi.

4 Tan ñi tsa catsi tsicá iñi can, nyisó s̄in ñi inga yutyi acetye tsa cua natyih̄i ñi tsitsi lámpara can tatun ndih̄i acetye tsa yih̄i tsitsi lámpara can.

5 Tan ra tsa cua tindaha can cucueé xaan ra, tacan tan tīn ñumaahna tsi tandih̄i ñi, tan quix̄i ñi.

6 Tacan tan maa ñuu tsiñ̄i ñi iin ndusu tsa catyí tyehen: “¡Tsa vatsí ra tsa cua tindaha! ¡Quita ndo, jatahan ndo tsi ra!”

7 Tandih̄i ñi can nduvit̄a ñi tan quitsah̄a jandu-vahá ñi lámpara ñi.

8 Tacan tan quitsah̄a caahán tsa uhun ñi soho ñuhú iñi can tsihin inga uhun ñi can tan catyí ñi: “Cuhva ndo juhva acetye ndahá ndo tsi ndi, tyin cuñi ndahva lámpara ndi”, catyí ñi.

9 Maa tyin ñi yoco tsa catsi tsicá iñi can nacahan ñi tyehen: “Ña cua kuhva ndi tyin coto ña cua cutahan tsi tsa cuenda ndi tan ndi tsa cuenda nyooho. Vaha ca cuhun maa ndo kujata ndo nu cuyahví tsi.”

10 Maa tyin tsitsi tsa cuahán tsa uhun ñi soho ñuhú iñi can cuajata ñi acetye, tan tsā ra tsa cua tindaha can. Tan ñi yoco tsa ndatú vaha can, quih̄v̄i ñi tsihin ra tsitsi vehe nu cua coo vico tindaha. Tan tsicundas̄i yuvehe can.

11 Yah̄a can tan tsā nyico ñi soho ñuhú iñi can, tan catyí ñi: “¡Yooho tata! ¡Nuña yuvehe na quih̄v̄i ndi!”, catyí ñi.

<sup>12</sup> Maa tyin maa ra nacahan ra, tan catyí ra: “Tsa nditsa catyí yu tsihin ndo tyin ña nacotó yu tsi ndo.”

<sup>13</sup> Tacan tan quitsahá caahán ra Jesús:

—Cuatu vaha ndo, tyin ña tsitó ndo ndáa quiví tan náa hora cua quitsi nyico yuhu Rayi tsa quee nda gloria.

*Nu caahán ra Jesús tsihin yo na jaha tyiñu yo tsihin tsa tsahá Nyoo tsi yo  
(Lc. 19.11-27)*

<sup>14</sup> Tsa ndacá ñaha Nyoo tsi nyívi cuví tsi tumaa iin rayi tsa nyaá cua quita cuhun inga ñuu nu cañi. Tan cana ra tsi musu ra, tan tsahá cuenda ra xuhun ra tsi ra naha tyin jaha cuenda ra naha.

<sup>15</sup> Iin ra tsahá ra uhun mil xuhun, tan inga ra tsahá ra uvi mil xuhun, tan inga ra tsahá ra iin mil. Tsahá ra tsi intuhun intuhun ra nácaa cuhva tsitó ra jaha tyiñu ra naha tan cua nandaa síqui xuhun can. Tacan tan cuahán ra.

<sup>16</sup> Musu tsa quihín uhun mil xuhun can, ñihi jahá tyiñu ra tsihin xuhun can, tan jahá canaa ra inga uhun mil ca síqui tsi.

<sup>17</sup> Tan juvin ñi tacan tucu ra tsa quihín uvi mil can, jahá canaa ra uvi mil ca tsihin xuhun can.

<sup>18</sup> Maa tyin ra tsa quihín intuhun ñi mil can, tsahan ra tan tsatya ra iin yavi tsitsi ñuhu tan tyihí xeehe ra xuhun tsitoho ra.

<sup>19</sup> Cuaha quiví yahá tan tsaá nyico tsitoho musu can. Tan quitsahá natavá cuenda ra tsihin intuhun intuhun ra naha.

<sup>20</sup> Jihna ca ra tsa quihín uhun mil xuhun can tsaá, tan nacuhva cuenda ra uhun mil ca síqui can,

tan catyí ra: “Taa, uhun mil tsaha un tsi yu, juhun inga uhun mil ihya tsa jahā canaa yu siqui tsi.”

<sup>21</sup> Tan tsitoho ra catyí ra tsihin ra: “Vaha. Iin musu vaha xaan cuví un. Tan javahā un tandihí tsa cahān yu tsihin un. Luxu ñi xuhun tsahā yu tsi un tan vaha xaan tsatyíñu un itsi. Vityin cuaha ca cua cuhva cuenda yu tsi un. Quíhví nu vaha ihya, tan sií cuñi un tsihin yu.”

<sup>22</sup> Yahā can tan tsaā musu tsa quihín uvi mil xuhun can, tan catyí ra: “Taa, uvi mil ñi tsahā un tsi yu, juhun uvi mil ca ihya tsa jahā canaa yu siqui tsi.”

<sup>23</sup> Tan catyí tsitoho ra tsihin ra: “Vaha. Iin musu vaha xaan cuví un, tan javahā un tandihí tsa cahān yu tsihin un. Luxu ñi xuhun tsahā yu tsi un tan vaha xaan tsatyíñu un itsi. Vityin cuaha ca cua cuhva cuenda yu tsi un. Quíhví nu vaha ihya, tan sií cuñi un tsihin yu”, catyí ra.

<sup>24</sup> Tan cuhva tsa tsaā musu tsa quihín intuhun ñi mil xuhun can, catyí ra tsihin tsitoho ra: “Taa, yuhu tsitó yu tyin xaan xaan un tan cuñí un naquihín un xuhun nu ña jahá tyiñu un, tan cuñí un naquihin un cosecha nu ña tatsí un.

<sup>25</sup> Yacan cuenda nayuhví yu tan tsahān yu tan tyihí xeehe yu xuhun un tsitsi ñuhu. Juhun xuhun ihya tsa tsahā un tsi yu”, catyí ra.

<sup>26</sup> Tacan tan nacahān tsitoho ra, tan catyí ra tsihin ra: “Musu ña vaha cuví un, tan musu jutsan cuví yooho. Tatun tsitó un tyin naquihín yu nu ña jahā tyiñu yu, tan quihín yu cosecha nu ña tatsí yu,

<sup>27</sup> ¿nácaa tyin ña tsityihí un xuhun yu nu banco? Tun tsatyin tacan javahā un, tsa cua quitsi nyico yu cuvi naquihin yu xuhun can tsihin xuhun siqui

tsa jahā canaa tsi”, catyí ra.

<sup>28</sup> Tacan tan quitsaha caahán ra tsihin ra tsa yucú can naha ra: “Quihin nyaa ndo tsa iin mil tsa ndahá ra, tan cuhva ndo tsi ra tsa ndahá utsi mil.

<sup>29</sup> Tyin nyívi jahá tyiñu vaha tsihin tsa iyó tsi ñi, cua cuhva ca yu tsi ñi, tan cua coo cuaha tsi ñi, nda cuanda ndoo ca. Maa tyin nyívi tsa ña cuñi jaha tyiñu tsihin tsa tsahá yu, nda cuanda tsa luxu tsa cumí ñi, cua quihin nyaa ndihí yu.

<sup>30</sup> Tan musu tsa ña tsiñi ñuhu tsi yu ihya, tava ndo tsi ra nacuhun ra nu naa ityi tsata, tan ndacan cua vacu tsaa ra, tan cahyu ña cua cuvi nuhu ra tsihin tsa nyehé ra tundo ho.”

*Nu cahan ra Jesús tyin cua cutuñi tandihí nyívi*

<sup>31</sup> Quivi cua quitsi nyico yuhu Rayi tsa quee nda gloria, cua quitsi yu tsihin cuaha ángel cuenda yu. Tan cua cunyaa yu tyayu si caá tan cua cundaca ñaha yu.

<sup>32</sup> Tandihí cuii nyívi iyó naní cahnu nu ñuhu ñayívi cua nataca ñi nuu yu. Tan cua natava siin yu tsi intuhun intuhun ñi, tumaa ra jahá cuenda mbee tavá siin ra tsi mbee ticatyí tan tavá siin tucu ra tsi mbee chivo.

<sup>33</sup> Tan cua tyaa yu tsi mbee ticatyí can tsiyo cuaha yu, tan inga mbee can cua tyaa yu tsiyo satyin yu.

<sup>34</sup> Tacan tan yuhu tsa cuví yu Rey cua catyí yu tsihin nyívi nyecú tsiyo cuaha yu: “Naha nyooho nyívi tsa nasoco Jutu yu. Na quihin cuenda ndo nu cua cunyecu ndo nu ndacá ñaha Nyoo, tyin tsa cuenda maa ndo javaha ra ihya quivi javaha ra ñuhu ñayívi.

35 Tyin quiví tsisoco yu, nyooho tsaha ndo tsa tsatsi yu. Quiví na ityi ñi yu, tsaha ndo ndutya tsihi yu. Tan quiví tsica nuu yu cuví yu ra inga ñuu, tsaha ndo nu quixi yu.

36 Quiví cumañi jahma yu, tsaha ndo jahma tsinditsi yu. Quiví cuhvi yu, tsinyehe ndo nu canyií yu. Tan quiví tsinyi yu vehe caa, tsinyehe ndo nu nyii yu”. Tacan cua cahan yu tsihin ñi.

37 Tan ñi tsa vaha ñi can cua ndaca tuhun ñi tsi yu, tan catyi ñi: “Jutu Mañi yu, ¿ama nyehe ndi tsisoco un, tan tsaha ndi tsa tsatsi un? ¿Ama nyehe ndi na ityi ñi un tan tsaha ndi tsa tsihi un?”

38 ¿Ama nyehe ndi tsi un tsica nuu un cuví un ra inga ñuu tan tsaha ndi vehe nu quixi un? ¿Ama cumañi jahma un, tan tsaha ndi jahma tsinditsi un?”

39 ¿Ama nyehe ndi cuhvi un, o tsinyi un vehe caa, tan tsahan ndi tsinyehe ndi tsi un?” cua catyi ñi.

40 Tan yuhu tsa cuví Rey cua catyi yu tsihin ñi: “Tsa nditsa catyi yu tsihin ndo, tyin tandihí tumañi ñi tsa javaha ndo tsi ra ndaahvi, ra yañi yu, tsi yuhu javaha ndo tumañi ñi”, cua catyi yu tsihin ñi.

41 Tacan tan yuhu tsa cuví Rey cua cahan yu tsihin nyivi tsa yucú tsiyo satyin yu tyehen: “Catsiyo ndo nuu yu, nyooho, nyivi taahan tsi cuhun anyaya. Cuaahan ndo nu ñuhu tsa ña cua ndahva maa. Tsinu anyaya can tyin ican cua coo nu ña vaha tan tatyí ña vaha cuenda nu.

42 Tyin tsisoco yu tan nyooho ña tsaha ndo tsa catsi yu. Na ityi ñi yu tan ña tsaha ndo ndutya coho yu.

<sup>43</sup> Tsica nuu yu cuví yu iin ra inga ñuu, tan ña tsaha ndo nu cusu yu. Cumañi jahma yu tan ña tsaha ndo jahma cunditsi yu. Nacuhvi yu tan tsinyi yu vehe caa, maa tyin ña tsahan ndo tsinyehe ndo tsi yu nu tsinyi yu”, cua catyi yu tsihin ñi.

<sup>44</sup> Tacan tan cua catyi ñi tsihin yu: “Jutu Mañi yu, ¿ama nyehe ndi tsioco un, o na ityi ñi un, o tsicá nuu un cuví un ra inga ñuu, o nduve jahma un, o nacuhvi un, o tsinyi un vehe caa, tan ña jatinye ndi tsi un?” cua catyi ñi.

<sup>45</sup> Tan yuhu tsa cuví yu Rey cua catyi yu tsihin ñi: “Tsa nditsa caahán yu tsihin ndo tyin tandihi maa tsa ña javaha ndo tsihin nyivi ndaahvi ihya, ña javaha ndihi ndo tsihin yu, cuví can”, cua catyi yu tsihin ñi.

<sup>46</sup> Tacan tan ñi can cua cuhun ñi nu cayú ñuhu tsa ña cua ndahva maa. Tan nyivi vaha can cua cuhun ñi coo ñi ñayivi nyito tsa ña cua naa maa.

## 26

*Nu nducú ra mandoñi naha ra cuhva nácaa tan tñn ra naha tsi ra Jesús*

*(Mr. 14.1-2; Lc. 22.1-2; Jn. 11.45-53)*

<sup>1</sup> Cuhva tsa ndihi cahan ra Jesús tandihi tuhun can, tan quitsaha catyi ra tsihin ra tsicá tsihin ra:

<sup>2</sup> —Nyooho tsitó ndo tyin ndi cumañi uvi ca quivi tan tahan tsi vico pascua. Tan yuhu, Rayi tsa quee nda gloria, cua cuhva cuenda nyivi tsi yu na tyaa ra cumi tyiñu tsi yu nu cruu —catyi ra.

<sup>3</sup> Quivi can jutu tsa cuví ityi nuu naha ra, tan ra maestro cuenda ley vehe ñuhu naha ra, tan ra mandoñi ñuu naha ra, ndu iin ra naha nuquehe



vehe tyiñu ra Caifás, ra jutu tsaahnu tsa cuví ityi nuu.

<sup>4</sup> Tan jandaa ra naha tyiñu nácaa cua jandavi ñaha ra naha tsi ra Jesús tan tñin ra naha tsi ra tan cahñi ra naha tsi ra.

<sup>5</sup> Tan catyí ra naha:

—Ña cua cahñi yo tsi ra quivi maa vico, coto nduvaa xaan nyivi —catyí ra naha.

*Nu tyosó iin ñaha ndutya tami jiñi ra Jesús  
(Mr. 14.3-9; Jn. 12.1-8)*

<sup>6</sup> Ra Jesús nyii ra ñuu Betania, vehe ra Simón, ra tsa yihí cuehe tyaahyu.

<sup>7</sup> Tan natuhva iin ñaha nu nyaá ra Jesús, ndahá ña iin yutyi yuu vaha tsitú can yihí ndutya tami. Tan yahvi xaan nyaá ndutya tami can. Tan ra Jesús nyaá ra yuhu mesa, tan ñaha can tyoso ña ndutya can jiñi ra.

<sup>8</sup> Tsa nyehę ra tsicá tsihin ra, nduxaan ra naha tan catyí ra naha:

—¿Nacuenda jativí ña ndutya tami can?

<sup>9</sup> Vaha ca tun tsatyin xico ña can, tan ñihi cuaha ña xuhun tsihin can. Tan cuvi jatyinyee ña tsi nyivi ndaahvi tsihin xuhun can —catyí ra naha.

<sup>10</sup> Tan tsa tsiñi ra Jesús tsa caahán ra naha, tacan tan catyí ra tsihin ra naha:

—¿Nacuenda cuñí ndo jandu uvi iñi ndo tsi ñaha ihya? Tan tsa javahá ña tsihin yu, tsa vaha cuví tsi.

<sup>11</sup> Tyin nyivi ndaahvi tandihí ñi quivi cua coo ñi tsihin ndo, maa tyin yuhu, ña naha ca cua cunyii yu tsihin ndo.

<sup>12</sup> Tyoso ña ndutya tami siqui cuñu ñuhu yu, tyin janduvahá ña itsi tyin cua cuhun tsi tsitsi ñuhu.

<sup>13</sup> Tsa nditsa catyí yu tsihin ndo, tyin tandihí ñi nu cua cahan nyívi tuhun Nyoo taní cahnu ñuhu ñayívi, cua nacatyí tuhun tucu ñi tsa javaha ñaha ihya, na nducuhun iñi nyívi tsi ña —catyí ra Jesús.

*Nu xico ra Judas Iscariote tsi ra Jesús*

*(Mr. 14.10-11; Lc. 22.3-6)*

<sup>14</sup> Tacan tan iin ra tsicá tsihin ra Jesús, ra tsa nañi Judas Iscariote, tsahan ra tsicahan ra tsihin ra jutu tsa cuví ityi nuu naha ra.

<sup>15</sup> Tan catyí ra tsihin ra naha:

—¿Nacaa cua tyahvi ndo tsi yu tatun cuhva cuenda yu tsi ra Jesús tsi ndo?

Tacan tan ra jutu can naha ra tsaha ra naha oco utsi xuhun cuitsin tsi ra.

<sup>16</sup> Tan nda quívi can tan quitsaha nducú ra Judas cuhva cua nacuhva cuenda ra tsi ra Jesús tsi ra jutu can naha ra.

*Nu cuxiñi ra Jesús tsihin ra tsicá tsihin ra*

*(Mr. 14.12-25; Lc. 22.7-23; Jn. 13.21-30; 1 Co. 11.23-26)*

<sup>17</sup> Quívi jihna ñi tsa quitsaha vico nu tsatsí nyívi paan tsa nduve yutsan iya yihí, ra tsicá tsihin ra Jesús natuhva ra naha nu nyaá ra tan quitsaha tsicá tuhun ra naha tsi ra tan catyí ra naha:

—¿Numaa cuñi un tsa cujanduvaha ndi tsa cuxiñi un cuenda vico pascua ihya?

<sup>18</sup> Tan catyí ra Jesús tsihin ra naha:

—Cuaahan ndo tsitsi ñuu nda vehe rayí ihya. Tan catyi ndo tsihin ra: “Ra Maestro catyí ra tyin tsa yatyin cua cúu ra, tan vehe maa un cua jacahnu ndi vico pascua”, catyi ndo tsihin ra —catyí ra Jesús.

19 Tacan tan javahā ra naha cuhva cahān ra Jesús tsihin ra naha. Tan janduvahā ra naha tsa cuxiñi ra naha vico pascua can.

20 Tsa cunaaha tan tsicunyaā ra Jesús nu mesa tsihin tandihi utsi uvi ra tsicá tsihin ra.

21 Tan tsitsi tsa tsatsí ra naha, catyí ra Jesús tsihin ra naha:

—Tsa nditsa catyí yu tsihin ndo tyin iin nyooho cua xico ndo tsi yu tsi ra xaan iñi tsi yu.

22 Tan nducuihya xaan cuñi ra naha, tan quit-sahā tsicá tuhun tan iin tan iin ra naha tsi ra tan catyí ra naha:

—Jutu Mañi yu, ¿a ñavin yuhu cuví can?

23 Tan nacahān ra Jesús tan catyí ra:

—Ra tsa tsatsí iin ñi coho tsihin yu, ra ican cua xico tsi yu.

24 Yuhu, Rayi tsa quee nda gloria, cua tahan yu tumaa tsa caahán nu tutu Nyoo. Maa tyin ndahvi ra ndaahvi tsa cua xico tsi yu. Vaha vihi ca tun tsatyin ña cacū ra —catyí ra Jesús.

25 Tacan tan nacahān ra Judas, ra tsa xico tsi ra, tan catyí ra:

—Maestro, ¿a yuhu cuví can?

Tan nacahān ra Jesús, tan catyí ra:

—Juvin un.

26 Tsitsi tsa tsatsí ra naha, ra Jesús quihin ra paan tan nacuhvā ra tyahvi nyoo tsi Nyoo, tan tsahnū sava ra, tan tsahā ra tsi ra tsicá tsihin ra, tan catyí ra tsihin ra naha:

—Çatsi ndo. Paan ihya cuví tumaa cuñu ñuhu yu.

27 Yahā can tan quihin tucu ra vasu vinu, tan nacuhvā ra tyahvi nyoo tsi Nyoo, tan jayahā ra tsi tandihi ra naha tan catyí ra:

—Coho tandihí ndo vinu ihya.

<sup>28</sup> Tyin cuví tsi tumaa niñi yu. Tan tsihin niñi yu cua cundaa tyiñu tsa ndoo Nyoo tsihin ndo, tyin cua cati niñi yu tsa cuenda tsa vaha tsi nyivi cuaha, tyin tsihin niñi yu cua coo tucahnu iñi cuatyí ñi.

<sup>29</sup> Tan catyí yu tsihin ndo, tyin ña cua coho ca yu tahan vinu tsa cuvi ndutya uvas ihya, nda cuanda tsa coho yu vinu tsa tsihin ndo nda nu ndacá ñaha Jutu yu gloria —catyí ra.

*Nu cahan ra Jesús tyin cua cahan ra Pedro tyin ña nacotó ra tsi ra*

*(Mr. 14.26-31; Lc. 22.31-34; Jn. 13.36-38)*

<sup>30</sup> Tsa yahá tsa tsitá ra naha iin yaa Nyoo, tan cuahán ra naha yucu Olivo.

<sup>31</sup> Tacan tan quitsahá caahán ra Jesús tsihin ra naha:

—Tandihí nyooho tan cua nacoó ihñi ndo tsi yu vityin tsacuaa ihya. Tyin nu tutu Nyoo catyí tsi tyehen: “Cua cahñi yu tsi ra jahá cuenda mbee ticatyí jana yu, tan mbee can cua natsatsa ti naha ti”, catyí tsi.

<sup>32</sup> Maa tyin tsa yahá nandoto yu, jihna ca yu cua cuhun Galilea, tsa ndi cumañi ca cuhun nyooho.

<sup>33</sup> Tacan tan nacahan ra Pedro tan catyí ra:

—Vasu ndi maa tandihí ra tan ndu uvi iñi ra naha tsa nyicún ra naha tsi un, maa tyin yuhu ña cua ndu uvi iñi yu.

<sup>34</sup> Tacan tan catyí ra Jesús tsihin ra:

—Tsa nditsa catyí yu tsihin un tyin juvin ñi maa tsacuaa vityin, tsa ndi cumañi ca vacu tsitooho, uñi tsaha cua cahan un tyin ña nacotó un tsi yu —catyí ra Jesús.

<sup>35</sup> Tan ra Pedro catyí ra:

—Vasu ndi maa cúu yu tsihin un, maa tyin ña cua catyi yu tyin ña nacotó yu tsi un —catyí ra.

Tan juvin ñi tacan catyí tandihí ca ra tsicá tsihin ra.

*Nu tsican tahvi ra Jesús tsi Nyoo nda Getsemaní (Mr. 14.32-42; Lc. 22.39-46)*

<sup>36</sup> Tacan tan tsaa ra Jesús tsihin ra tsicá tsihin ra iin nu iyó cuaha yutun nu nañi Getsemaní, tan catyí ra tsihin ra naha:

—Cunyecu ndo ihya tsitsi tsa cuahán yu ndacan cua ndacan tahvi yu.

<sup>37</sup> Tan quihin ra tsi ra Pedro tan nduvi sehe ra Zebedeo cuahán tsihin ra. Tan quitsi tucuiihya iñi cahnu tsi ra, tan tsa tuñu cuñi ra.

<sup>38</sup> Tacan tan catyí ra tsihin ra naha:

—Cahnu xaan tucuiihya iñi nyaá aña yu, nda cuanda cuñi cahni ña can tsi yu. Ndo ndo ihya tan coo nyito ndo tsihin yu —catyí ra.

<sup>39</sup> Tacan tan cuahán ra Jesús luxu ca ityi nuu tan tsicuiñi tsiti ra tan tsaquin ra nuu ra nda nu ñuhu, tan tsicán tahvi ra tsi Nyoo tan catyí ra:

—Tyaa, tun tsatyin cuvi jatsiyo nyaha un tundoho ihya siqui yu, vaha xaan. Maa tyin na ña cuvi cuhva cuñi maa yu, tan na cuvi cuhva cuñi maa un —catyí ra.

<sup>40</sup> Tacan tan tsaa ra nu yucú ra tsicá tsihin ra, tan nyehe ra tyin quixí ra naha. Tan catyí ra tsihin ra Pedro:

—¿A ña cuví coo nyito ndo tsihin yu vasu tan intuhun hora?

<sup>41</sup> Coo nyito ndo, tan ndacan tahvi ndo tsi Nyoo; tacan tan ña cua javaha ndo cuhva cuñi nu ña vaha. Tsa nditsa tyin aña ndo, cuñi xaan tsi

nanducu tsi tsi Nyoo, maa tyin cuñu ñuhu ndo cuví tsa vita cuñí —catyí ra Jesús.

<sup>42</sup> Tan tsa tsahan ra tsa tsinu uvi tsaha, tsican tahvi ra tyehen:

—Tyaa, tatun ña cuvi tsa jatsiyo nyaha un tun-doho ihya siqui yu, na cuvi cuhva cuñí maa un —catyí ra.

<sup>43</sup> Tacan tan tsaq ra inga tsaha tan nyehe ra tyin quixí nyico ra tsicá tsihin ra, tyin tsicundasí maa tinuu ra naha tsihin tsa cuñí xaan ra naha cusu ra naha.

<sup>44</sup> Tacan tan nacoq ra tsi ra naha, tan cuahán ra tsa tsinu uñi tsaha cua ndacan tahvi ra. Tan tsican tahvi ra tsi Nyoo juvin ñi maa tsihin tuhun tsa tsa yahá cahan ra.

<sup>45</sup> Tacan tan tsaq nyico ra nu yucú ra tsicá tsihin ra, tan catyí ra tsihin ra naha:

—Vityin cusu ndo tan quitatu ndo. Tyin tsa tsaq cuhva tsa cua nacuhva cuenda ra can tsi Rayi tsa quee nda gloria tsi ra iyó cuatyí naha ra.

<sup>46</sup> Nduvita ndo, cohon ndo. Tyin tsa vatsí ra tsa xicq tsi yu —catyí ra Jesús.

*Nu tsahá cuenda ra Judas tsi ra Jesús tsi nu xaan iñi tsi ra nahnu*

*(Mr. 14.43-50; Lc. 22.47-53; Jn. 18.2-11)*

<sup>47</sup> Ndi caahán ca ra Jesús yacan, tan tsaq ra Judas, ra tsa cuví iin ra tsicá tsihin ra Jesús. Tan tsihin ra Judas tsaq tucu cuaha xaan nyivi ndahá mityi tan yutun jacuhun ra cuví jutu tsa cuví ityi nuu naha ra tan ra cuví mandoñi nyivi Israel naha ra.

<sup>48</sup> Tan ra Judas, ra tsa tsahá cuenda tsi ra Jesús, tsa yahá tsahá ra iin seña tsi ra can naha ra, tyin

coto ra naha yóo cua t̄in ra naha. Tyin tsa yaha cahan ra tsihin ra naha:

—Ra tsa cua tyayuhu yu, ra ican cuví ra tsa cua t̄in ndo.

<sup>49</sup> Tacan tan natuhv̄a ra Judas nu nyaá ra Jesús tan catyí ra:

—Nacumi tsi un, Maestro.

Tan tyayuh̄u ra tsi ra.

<sup>50</sup> Tacan tan nacahan ra Jesús tan catyí ra tsihin ra:

—¿Náa tyiñu vatsí un ñih?

Tacan tan natuhv̄a ra can naha ra tan t̄in ra naha tsi ra Jesús.

<sup>51</sup> Tacan tan iin ra cutahán tsihin ra Jesús, tav̄a ra mityi tan tsahnȳa ra soho musu jutu tsaahnu tsa cuví ityi nuu.

<sup>52</sup> Tan catyí ra Jesús tsihin ra:

—Natyihi mityi un tsitsi vena un. Tyin tandih̄i nȳivi tsa cañí tahan tsihin mityi, juvin ñi tsihin mityi cua cúu ñi.

<sup>53</sup> ¿A ña tsitó un tyin tatun yuhu tan cuñí yu, cuví ndacan yu tsi Jutu yu, tan maa ra cua jaquitsi ra vityin vityin yaha ca uñi xico utsi mil ángel, tan jacacu ra naha tsi yu?

<sup>54</sup> Maa tyin tatun tacan javaha yu, ¿nácaa cua cundaa tsa nyaá nu tutu Nyoo nu catyí tsi tyin taahán maa tsi tsa tahan yu tyehen? —catyí ra.

<sup>55</sup> Tacan tan catyí ra Jesús tsihin tandih̄i nȳivi:

—¿A vatsí t̄in ndo tsi yu tumaa cua t̄in ndo iin ñasuhu? tyin ndahá ndo mityi tan yutun. Tandih̄i qūivi tsinyīi yu jacuah̄a yu tsi ndo tsitsi vehe ñuhu cahnu, tan ña t̄in ndo tsi yu.

<sup>56</sup> Tandihí yacan cuví tyin tacan tan cundaa cuhva catyí tuhun Nyoo, tsa tyaa ra cuví ndusu yuhu Nyoo taħan tsanaha.

Tacan tan tandihí ra tsicá tsihin ra, tsinu ra naha. Tan ndoq intuhun ña maa ra.

*Nu tsicq tuhun ra mandoñi naha ra tsi ra Jesús tatun Sehe Nyoo cuví tsi ra*

*(Mr. 14.53-65; Lc. 22.54-55, 63-71; Jn. 18.12-14, 19-24)*

<sup>57</sup> Tan ra tsa tñin tsi ra Jesús, tsindaca ra naha tsi ra nuu ra Caifás, ra jutu tsaahnu tsa cuví ityi nuu. Tan iin cahnu ñi yucú ra maestro cuenda ley vehe ñuhu naha ra ican tan ra mandoñi naha ra.

<sup>58</sup> Tan ra Pedro cuahán ra tsata ra naha, tan tsaq ra nda nuquehe vehe ra Caifás can. Tan quihví ra tan ndoq ra nyii ra tsihin vitya can naha ra, tyin cua nyehe ra nácaa cua quita tuhun can.

<sup>59</sup> Ra jutu tsa cuví ityi nuu naha ra, tan ra mandoñi naha ra, tan tandihí ra cumí tyiñu naha ra, nducú ra naha tsi ra cahan cuendu siqui ra Jesús. Tyin tacan tan cuví cahñi ra naha tsi ra.

<sup>60</sup> Maa tyin ña ñihí maa ra naha cuatyi tyaa ra naha siqui ra, vasu ndi maa cuaha nyivi tsahan ñi tsicahan ñi cuendu siqui ra. Tan nu ndihí tuhun, tsaq uvi ca tsa ndaa tsa caahán cuendu.

<sup>61</sup> Tan catyí ra naha:

—Ra ihya, catyi ra tyin cuví cani ra vehe ñuhu cahnu Nyoo, tan tsitsi tsa uñi quivi cua janduvita ra tsi inga tsaha —catyi ra naha.

<sup>62</sup> Tacan tan ra jutu tsa cuví ityi nuu can, nduvita ra, tan catyí ra tsihin ra Jesús:

—¿A ña nacahan un nu caahán ra ihya naha ra? ¿A nditsa tsa caahán ra ihya naha ra, o ña nditsa?



<sup>63</sup> Maa tyin ra Jesús ña nacahan ra. Tacan tan catyí ra jutu tsaahnu tsa cuví ityi nuu tsihin ra:

—Tsihin sivi Nyoo nyitó, catyí yu tsihin un tyin catyi un tsa nditsa vaha. ¿A ra Cristo Sehe Nyoo cuví tsi un? —catyí ra.

<sup>64</sup> Tan catyí ra Jesús tsihin ra:

—Juvín yu cuví. Tan catyí tucu yu tsihin ndo, tyin cua nyehe ndo tsi yuhu, Rayi tsa quee nda gloria, cunyaa yu xiin cuaha Nyoo ra iyó tandihi tunyee ñi, tan cua nyehe ndo nu cua quitsi yu nu vico ityi andivi inga tsaha —catyí ra.

<sup>65</sup> Tacan tan ra jutu tsaahnu tsa cuví ityi nuu can tsahnya ra jahma ra tumaa iin seña tyin cuñí maa ra tyin ña vaha tsa caahán ra Jesús, tan catyí ra tsihin tandihi ca ra naha:

—Ra ihya tsicoo cuatyí ra nuu Nyoo tsihin tsa caahán ra. ¡Nyehe ndo vityin! Ña cuñí ca tsi tsa nducu yo inga tsa ndaa tyin tsa tsiñi maa ndo tsa ña vaha tsa cahan ra.

<sup>66</sup> ¿Náa catyí ndo vityin?

Tan nacahan ra naha tan catyí ra naha:

—Iyó cuatyí ra, yacan taahán tsi tsa cúu ra.

<sup>67</sup> Tacan tan tiví sii ra naha nuu ra tan cañi ra naha tsi ra. Inga ra cañi ra naha nuu ra tsihin tsiqui.

<sup>68</sup> Tan catyí ra naha tsihin ra:

—Tatun nditsa tyin ra Cristo cuví un, ¡nacoto yóo cañi tsi un!

*Nu cahan ra Pedro tyin ña nacotó ra tsi ra Jesús  
(Mr. 14.66-72; Lc. 22.56-62; Jn. 18.15-18, 25-27)*

<sup>69</sup> Tsitsi tsa ndi nyíí ra Pedro nuquehe ityi tsata vehe can, tan iin ñaha tsa cuví musu jutu can, natuhv̄a ña nu nyaá ra tan catyí ña tsihin ra:

—Yooho tucu tsic̄a un tsihin ra Jesús, ra Galilea can.

<sup>70</sup> Tan ra Pedro catyí ra nuu tand̄ih̄i nyiv̄i yucú can:

—Ña tsic̄a yu tsihin ra can. Ña tsitó yu náa caahán un.

<sup>71</sup> Tacan tan cuahán ra Pedro ityi yuvehe nu cuví yuhu cora, tan nyehe inga ña tsi ra, tan catyí ña tsihin ra yucú can:

—Juvín ñi tsic̄a nd̄ih̄i tucu ra ihya tsihin ra Jesús, ra ñuu Nazaret —catyí ña.

<sup>72</sup> Tan inga tsaha tyih̄i xeehe ra Pedro tsa nacotó ra tsi ra tan catyí ra:

—Naha Nyoo tyin ña nacotó yu tsi ra can.

<sup>73</sup> Tañi cuii ca, tan ra yucú can natuhv̄a ra naha nu nyaá ra Pedro tan catyí ra naha tsihin ra:

—Nditsa tyin ra vaha iñi tsi ra can cuví yooho, tyin cuhva caahán ra Galilea naha ra, caahán un.

<sup>74</sup> Tacan tan iyo xaan caahán ra tan catyí ra:

—Tsitó vaha Nyoo tyin ña nacotó yu tsi ra can, tan na cahñi maa Nyoo tsi yu tatun ña nditsa tsa caahán yu —catyí ra.

Tan juvin ñi cuhva can navacu tsitooho.

<sup>75</sup> Tacan tan nducuhun iñi ra Pedro tsa cahan ra Jesús tsihin ra: “Tsa ndi cumañi ca vacu tsitooho, yooho tsa yaha cahan un uñi tsaha tyin ña nacotó un tsi yu”, catyí ra Jesús, nducuhun iñi ra. Tacan tan quit̄a ra ican, tan tsacu xaan ra tsa cuiihya cuñí ra tsa javah̄a ra tacan.

## 27

### *Nu nacuhv̄a cuenda ra naha tsi ra Jesús tsi ra Pilato*

(Mr. 15.1; Lc. 23.1-2; Jn. 18.28-32)

<sup>1</sup> Tan tsa tuv̄i inga quiv̄i, tandih̄i ra jutu tsa cuv̄i ityi nuu naha ra tan ra mandoñi ñuu can naha ra, ndō ra naha tyiñu tsa cua cahñi ra naha tsi ra Jesús.

<sup>2</sup> Tan nuuhñí ra jah̄a ra naha. Tan tsahan ra naha tsinacuhv̄a cuenda ra naha tsi ra nuu ra Poncio Pilato, ra ndacá ñaha tsa queē nda ñuu Roma.

### *Nu tsih̄i ra Judas*

<sup>3</sup> Tsa nyehē ra Judas, ra tsa xicō tsi ra Jesús, tyin cua cúu ra, tan ndu uv̄i iñi ra tsa javah̄a ra, tan nacuhv̄a ra tsa oco utsi xuhun cuitsin can tsi ra jutu tsa cuv̄i ityi nuu naha ra, tan tsi ra mandoñi ñuu naha ra.

<sup>4</sup> Tan catyí ra:

—Tsicō cuatyí yu, tyin tsah̄a cuenda yu tsi iin ra nduve cuatyí na cúu ra.

Tan nacañan ra naha tan catyí ra naha:

—¿Nacuenda nyuhu? ¡Nyehe maa yooho!

<sup>5</sup> Tacan tan tyosō ihñi ra Judas xuhun can tsitsi vehe ñuhu cahnu, tan quit̄a ra cuahán ra tsityih̄i ra yoho jucun ra tan ticāa ra tsi ra iin nu yutun, tan tsih̄i ra.

<sup>6</sup> Ra cuv̄i ityi nuu tsihin jutu can naha ra naquih̄in ra naha xuhun can tan catyí ra naha:

—Ña cuv̄i tyihi yo xuhun ihya tsitsi caja nu yih̄i xuhun tsa tsahá nyiv̄i tsi Nyoo tyin xuhun tsa cuyahv̄i ra tsa cua cati niñi cuv̄i can.

<sup>7</sup> Tacan tan ndoo ra naha tyiñu, tyin cua jata ra naha ñuhu tsa nañi “Ñuhu Ra Javahá Quisi” tsihin xuhun can. Tyin coo nu cucutsi ra naha tsi nyivi inga ñuu tun tsihi ñi ñuu can.

<sup>8</sup> Yacan cuenda nañi ñuhu can nda cuanda vityin “Ñuhu Cuenda Tsa Tsañi Niñi Nyivi”.

<sup>9</sup> Tacan cuvi tyin cunda tsa tyaa ra Jeremías, ra cuvi ndusu yuhu Nyoo tañan tsanaha nu catyi tsi tyehen: “Juvin ñi maa ra naha quihin nyico tsa oco utsi xuhun cuitsin, tsa jata ra naha tsi ra Cristo.

<sup>10</sup> Tan tsihin can, jata ra naha ñuhu tsa nañi ‘Ñuhu Ra Javahá Quisi’, tacan catyi Jutu Mañi yo tsihin yu”, catyi tsi.

*Nu nyehe ra Pilato tyin nduve cuatyí ra Jesús  
(Mr. 15.2-5; Lc. 23.3-5; Jn. 18.33-38)*

<sup>11</sup> Tsindaca ra mandoñi can naha ra tsi ra Jesús nuu ra ndaca ñaha, tan ra can tsica tuhun ra tsi ra, tan catyi ra:

—¿A yooho cuvi rey cuenda nyivi Israel?

Tan ra Jesús catyi ra tsihin ra:

—Juvin yu, tumaa cuhva catyi maa un.

<sup>12</sup> Tan cuhva tsa tyaa ra jutu can naha ra tan ra mandoñi naha ra cuatyí siqui ra, ña nacahan maa ra.

<sup>13</sup> Tacan tan catyi ra Pilato tsihin ra:

—¿A ña tsiñi un tandi tsa caahan ra naha siqui un?

<sup>14</sup> Maa tyin ra Jesús ña nacahan maa ra. Tan iyo xaan cuñi ra ndaca ñaha can tyin ña nacahan ra.

*Nu cahan ra cumi tyiñu tyin taahan tsi cúu ra Jesús*

*(Mr. 15.6-20; Lc. 23.13-25; Jn. 18.38—19.16)*

15 Tan vico pascua tuhvá ra ndacá ñaha jañá intuhun ra yucú vehe caa. Ndáa ra tsa nacatsi maa nyívi, juvin ra cua quita nuña.

16 Tan quívi can nyíi iin ra tsa nañí Barrabás vehe caa. Tan tandíhi nyívi tsitó tuhun ra.

17 Tan cuhva tsa ndu iin nyívi, ra Pilato tsica tuhun ra tsi ñi, tan catyí ra:

—¿Ndáa ra cuñí ndo tsa tava nuña yu? ¿A ra Barrabás, o ra Jesús, ra tsa nañí Cristo? —catyí ra.

18 Tyin tsitó ra tyin tsa cuenda tsa ndasi cuñí ra jutu can naha ra nyehe ra naha tsi ra Jesús, yacan cuenda tsaha cuenda ra naha tsi ra tsi ra Pilato.

19 Tsitsi tsa nyaá ra Pilato nu tyayu ra, nu jahá tyiñu ra, jacuhun ñasihi ra tyiñu tsi ra tan catyí ña: “Ña tyíhi un tsi un tsihin ra vaha can. Tyin cuñi nyehe yu ñumaahna tsa cuenda ra. Tan jayuhvi xaan tsi tsi yu”, catyí ña.

20 Maa tyin ra jutu can naha ra tan ra mandoñi naha ra, cuñihi ra naha natyuhú ra naha tsi nyívi na ndacan ñi tsa jaña ra Pilato tsi ra Barrabás, tan na cúu ra Jesús.

21 Tacan tan ra ndacá ñaha catyí ra tsihin ñi inga tsaha:

—Tsitsi tsa nduvi ra naha, ¿ndáa ra cuñí ndo tsa jaña yu?

Tan nacahan ñi, tan catyí ñi:

—Jaña tsi ra Barrabás.

22 Tan ra Pilato tsica tuhun ra tsi ñi, tan catyí ra:

—¿Tan náa cua javaha yu tsihin ra Jesús tsa nañí Cristo ihya?

Tandíhi ñi nacahan ñi tan catyí ñi:

—¡Tyaa tsi ra nu cruu na cúu ra!

23 Tacan tan catyí ra Pilato tsihin ñi:

—Tan ¿náa tsa ña vaha javahā ra?

Maa tyin maa ñi canā tsaa ñi inga tsaha tan catyí ñi:

—¡Tyāa tsi ra nu cruu na cúu ra!

<sup>24</sup> Tsa nyehe ra Pilato tyin ña cuvī jaha ra tsi nyivi, tyin ñihi xaan cavaá jahá ñi. Tacan tan tsican ra ndutya, tan nacatyā ra ndaha ra nu nyivi can, tan catyí ra:

—Ña cua ndoo cuatyí tsa cua cúu ra vaha ihya siqui yuhu, tyin siqui nyooho cua ndoo cuatyí can.

<sup>25</sup> Tan tandihī nyivi nacahan ñi, tan catyí ñi:

—Na ndoo maa tsi siqui ndi tan siqui sehe ndi.

<sup>26</sup> Tacan tan ra Pilato jañā ra tsi ra Barrabás, tan tava tyiñu ra na ndoho ra Jesús, tan nacuhva cuenda ra tsi ra tsi ra andaru naha ra na cúu ra nu cruu.

<sup>27</sup> Tacan tan ra andaru cuenda ra Pilato, ra ndacá ñaha can tsindacā ra naha tsi ra Jesús nda vehe tyiñu ra Pilato, tan jandu iin ra naha tsi tandihī ca andaru nu nyaá ra.

<sup>28</sup> Tacan tan tava ra naha jahma ra tan jacunditsi ra naha iin jahma cuaaha tsi ra.

<sup>29</sup> Tan tyihī ra naha iin corona tsa tsinu tsihin iñu jiñi ra. Tan tsahā ra naha iin yutun tatun na cundaha ra tsihin ndaha cuaha ra. Tacan tan tsicuiñi tsiñi ra naha nuu ra, tan tsacu nducu ra naha tsi ra tan catyí ra naha:

—¡Nacumi tsi un, yooho Rey cuenda nyivi Israel!

<sup>30</sup> Tan tivī siñi ra naha tsi ra. Tan quihin ra naha yutun tatun can tan cañi ra naha jiñi ra.

<sup>31</sup> Tsa yahā tsa tsacu nducu ra naha tsi ra tan tava ra naha jahma cuaaha tsa nditsi ra, tan jacunditsi nyico ra naha jahma maa ra tsi ra. Tacan tan

cuahán ra naha tsihin ra cua cahñi ra naha tsi ra nu cruu.

*Nu tyaa ra naha tsi ra Jesús nu cruu  
(Mr. 15.21-32; Lc. 23.26-43; Jn. 19.17-27)*

<sup>32</sup> Tsa quita ra naha ican, taħan ra naha tsi iin ra ñuu Cirene, tsa nañí Simón. Tan jañiñi ra naha tsi ra na cuiso ra cruu ra Jesús.

<sup>33</sup> Tan tsaā ra naha iin nu nañí Gólgota, tan cuñí tsi catyí “Yiqui Jiñi Ndiyí”.

<sup>34</sup> Tan ican tsaħa ra naha vinu nasaca tsihin ndutya uva xaan coho ra Jesús. Tan tsa yaha tsa tsihi ra luxu can, ña cuñí ca ra coho ra.

<sup>35</sup> Tan tsa yaha tsa tyaa ra naha tsi ra nu cruu, tacan tan ra andarū can quihin ra naha jahma ra tan tava cuenda ra naha tyin cua nyehe ra naha ndaa ra jaha canaa intuhun intuhun jahma ra. Tacan cuvī tyin cundaā tuhun tsa tyaa iin ra cuvī ndusu yuhu Nyoo taħan tsanaha nu catyí tsi tyehen: “Tava cuenda ra naha tan tsatsa ra naha jahma yu”, catyí tsi.

<sup>36</sup> Tacan tan tsinyecu ra naha ican tyin jaha cuenda ra naha tsi ra.

<sup>37</sup> Tan ityi jiñi ra tyaa ra naha letra tsa catyí nacuenda cua cúu ra. Tan catyí tsi tyehen: “Ra ihya cuvī ra Jesús, rey cuenda nyivi ñuu Israel.”

<sup>38</sup> Tan tyaa tucu ra naha uvi taahan ra suhu tsihin ra nu uvi taahan ca cruu. Iin ra tyaa ra naha xiin cuaha ra, tan inga ra xiin satyin ra.

<sup>39</sup> Tan nyivi tsa yaha ican, caahán ñi tsi ra, tan javicó ñi jiñi ñi tsa tsacú nducu ñi tsi ra.

<sup>40</sup> Tan catyí ñi tsihin ra:

—¡Yooho tsa caħan un tyin cua canī un vehe ñuhu cahnu, tan tsitsi tsa uñi quivi tan cua janduvaha

nyico un itsi, jacacu tsi maa un vityin nu cruu juvin, tatun nditsa tyin Sehe Nyoo cuví tsi un! —catyí ñi tsihin ra.

<sup>41</sup> Tan juvin ñi tacan tsacú nducu ra jutu tsa cuví ityi nuu naha ra tsi ra, tan ra maestro cuenda ley vehe ñuhu naha ra tan ra fariseo naha ra, tan ra mandoñi ñuu naha ra. Tan natuhún tahan ra naha tan catyí ra naha:

<sup>42</sup> —Jacacu ra tsi inga nyivi, maa tyin ña cuví jacacu ra tsi maa ra. Tun nditsa tyin Rey cuenda nyivi Israel cuví ra, na nuu ra nu cruu can, tan cua tsinu iñi yo tsi ra.

<sup>43</sup> Nditá xaan iñi ra tsi Nyoo, vityin na jacacu Nyoo tsi ra, tatun nditsa tyin cuñi ra tsi ra. Tyin catyí ra tsihin yo tyin Sehe Nyoo cuví tsi ra.

<sup>44</sup> Tan nda cuanda nu ñasuhu nahnu tsa nyaá nu cruu xiin ra tan tsacú nducu ndihi nahnu tsi ra.

### *Nu tsihi ra Jesús*

*(Mr. 15.33-41; Lc. 23.44-49; Jn. 19.28-30)*

<sup>45</sup> Tacan tan ndunaa tanii cahnu ñuhu ñayivi tsa ora tan nda cuanda caa uñi tsa tseñi.

<sup>46</sup> Tan juvin ñi cuhva can, ñihi xaan cana tsaa ra Jesús. Tan catyí ra:

—Elí, Elí, ¿lama sabactani? —tan cuñi tsi catyí: Nyoo Jutu yu, Nyoo Jutu yu, ¿nacuenda nacoq ihñi un tsi yu?

<sup>47</sup> Juhva ra yucú can naha ra, tsiñi ra naha tsa cahñ ra, tan catyí ra naha:

—Ra Elías, ra cuví ndusu yuhu Nyoo tsanaha, caná tsaa ra.

<sup>48</sup> Tan juvin ñi cuhva can, cuahán iin ra cua quihin ra iin yahma cuhva caá catyi, tan jatyi ra



tsihin vinu iya, tan tyaa ra nu yutun, tan jatuhva ra yuhu ra Jesús tyin na coho ra.

<sup>49</sup> Maa tyin inga ra naha catyí ra naha:

—Ña cuhva naha un can tsi ra; na nyehe jihna yo tatun cua quitsi jacacu ra Elías tsi ra.

<sup>50</sup> Inga tsaha cana tsaa ñihi ra Jesús, tacan tan tsihi ra.

<sup>51</sup> Tan juvin ñi cuhva can ndata sava jahma tsa ticaá tsitsi vehe ñuhu cahnu tyasi Nu li Xaan, nda cuanda ityi siqui tan nda cuanda ityi tsaha. Tan ñihi xaan taan. Tan tahvi cuatyí cava nahnu.

<sup>52</sup> Tan nuña yuhu ñaña. Tan cuaha nyivi tsa tsinú iñi tsi Nyoo tan tsihi ñi, nandoto ñi.

<sup>53</sup> Tan tsa yaha nandoto ra Jesús quitá ñi nu ñaña tan quihvi ñi tsitsi ñuu Jerusalén, tan cuaha nyivi nyehe tsi ñi.

<sup>54</sup> Tacan tan ra capitán tan ra andaru tsa jahá cuenda tsi ra Jesús, nayuhvi xaan ra naha tsa taan, tan tsa nyehe ra naha inga ca tsa cuvi. Tan catyí ra naha:

—Nditsa nditsa cuii, tyin Sehe Nyoo cuví tsi ra ihya.

<sup>55</sup> Cuaha ñiñaha tsa tsinyicun tsi ra Jesús nda Galilea tan jatyinyee ñi tsi ra, yucú ñi nyehé ñi ndasava.

<sup>56</sup> Tan juhva ñi ican cuví ñi ihya: ña María tsa quee Magdala, tan ña María sihi ra Jacobo tan ra José, tan ñasihi ra Zebedeo.

*Nu tsicutsi ra naha tsi ra Jesús*

*(Mr. 15.42-47; Lc. 23.50-56; Jn. 19.38-42)*

<sup>57</sup> Cuhva tsa cuñi cuaa, quitsi iin ra cuca tsa nañi José, ra ñuu Arimatea. Tan tsinú iñi ra tsi ra Jesús.

58 Tan tsahan ra tsicahan ra tsihin ra Pilato, tan tsican ra cuñu ñuhu ra Jesús. Tacan tan tava tyiñu ra Pilato na cuhva ra andaru naha ra cuñu ñuhu ra Jesús tsi ra.

59 Tacan tan quihin ra José cuñu ñuhu ra, tan cava nuu ra iin jahma cuitsin vaha tsi ra.

60 Tan tyihj ra cuñu ñuhu ra Jesús tsitsi iin ñaña tsa tsa cuví iin yavi yuu tsa tava tyiñu ra tsatya ra naha. Tan tsa yaha tsa nacasi ra yuhu ñaña can tsihin iin yuu cahnu, tan cuahán ra.

61 Tan ña María tsa quee Magdala, tan inga ña María, ndoo ñi yucú ñi yuhu ñaña can.

### *Nu jahá cuenda ra andaru ñaña ra Jesús*

62 Tan tsa inga quivi, quivi quitatú nyivi cuví can, tan ra jutu tsa cuví ityi nuu naha ra, tan ra fariseo naha ra tsahan ra naha tsicahan ra naha tsihin ra Pilato.

63 Tan catyí ra naha tsihin ra:

—Yooho taa, nducuhun iñi ndi tyin ra vatya can, catyi ra tahan nyito ra tyin tsa yaha tsa uñi quivi tsa cua cúu ra tan cua nandoto ra.

64 Yacan cuenda tava tyiñu na jaha cuenda vaha ra andaru naha ra ñaña can, nda yaha tsa uñi quivi, coto cahun ra tsica tsihin ra tsa tsacuaa, tan suhu ra naha cuñu ñuhu ra. Yaha can tan cua catyi ra naha tsihin nyivi tyin tsa nandoto ra. Tatun tacan cua cuvi, yaha ca cuhva cua cuvi tan ñavin ca tsa jihna ñi —catyí ra naha.

65 Tan ra Pilato catyí ra:

—Quihin ndo andaru ihya. Cuaahan ndo, tan jaha cuenda vaha ndo ñaña can, nácaa cunye maa ndo jaha cuenda ndo —catyí ra.

<sup>66</sup> Tacan tan cuahán ra naha, tan jahá cuenda vaha ra naha ñaña can, tan tyaa ra naha iin tsa tyaa ra naha tsata yuu tsa ndasí can tyin tatun nacanda yuu can coto ra naha. Tan nacoq ra naha tsi ra andaru jahá cuenda ra naha ican.

## 28

### *Nu nandoto ra Jesús*

*(Mr. 16.1-8; Lc. 24.1-12; Jn. 20.1-10)*

<sup>1</sup> Tsa yaha quivi tsa quitatú nyivi, cuhva tsa cuñí cunditsin, nu quitsaha tsaha vitya, tan ña María tsa quee Magdala can, tan inga ña María tsahan ñi nu ñaña.

<sup>2</sup> Tan ñihi xaan taan tyin quitsi iin ángel Jutu Mañi yo quee ra andivi, tan tsaq ra nu ñaña can. Tan jatsiyo ra yuu tsa ndasí yuhu can, tan tsicun-yaq ra tsata can.

<sup>3</sup> Tan xiñu xaan ra, tumaa tsa cañi tatsa. Tan cuitsin xaan jahma ra.

<sup>4</sup> Cuhva tsa nyehę ra andaru can naha ra tsi ra, nayuhvi xaan ra naha tan quitsaha nihí ra naha, tan nda cuanda tsihi naaha ra naha tsihin tsa yuuhvi ra naha.

<sup>5</sup> Tacan tan catyi ángel can tsihin ñiñaha can:

—Ña nayuhvi ndo. Yuhu tsitó yu tyin ra Jesús tsa tsihi nu cruu nanducú ndo.

<sup>6</sup> Yoñi ca ra nyii ihya, tyin tsa nandoto ra, tumaa catyi ra. Naha ndo tan nyehę ndo nu tinyii ra naha tsi ra.

<sup>7</sup> Janumi xaan ndo cahun ndo cucatyi tuhun ndo tsihin ra tsica tsihin ra tyin tsa nandoto ra, tan tsa cuahán ra nda Galilea, cua cuatu ra tsi ra naha

ndacan. Yacan cuví tsa catyí tuhun yu tsihin ndo —catyí ángel can tsihin ñi.

<sup>8</sup>Tacan tan numi ñi quita ñi nu ñaña can. Yuuhví ñi, tan sii xaan cuñí tucu ñi. Tan tsinú xaan ñi cuahán ñi cua catyí tuhun ñi tsihin ra tsica tsihin ra Jesús.

<sup>9</sup>Tan cuhva can quituví ra Jesús nuu ñi tan tsaha ra nacumi tsi ñi. Tacan tan natuhva ñi nu nyaá ra tan tsicuiñi tsiti ñi nuu ra tan jacahnú ñi tsi ra, tan tsicunumí nyaa ñi tsaha ra.

<sup>10</sup>Tan catyí ra tsihin ñi:

—Ña nayuhvi ndo. Cuaahan ndo cujacoto ndo tsi yañi yu tyin na cuhun ra naha nda Galilea, tan ndacan cua ñihi tahan ndi —catyí ra tsihin ñi.

*Tuhun tsa nacatyí tuhun ra andaru naha ra*

<sup>11</sup>Tsitsi tsa cuahán ñi can, juhva andaru tsa jaha cuenda ican, cuahán ra naha nda ñuu, cua nacatyí tuhun ra naha tsa cuví can tsihin ra jutu tsa cuví ityi nuu naha ra.

<sup>12</sup>Tacan tan ra jutu can naha ra tsahan ra naha tsicahan ra naha tsihin ra mandoñi ñuu naha ra na natuhun tahan ra naha nácaa cua javaha ra naha. Tacan tan cuaha xaan xuhun tsaha ra naha tsi ra andaru can naha ra.

<sup>13</sup>Tan catyí ra naha tsihin ra naha:

—Nyooho cua cahan ndo tyin tsa tsacuaa tsitsi tsa quixí ndo, tsahan ra tsica tsihin ra Jesús tan quihin ra naha cuñu ñuhu ra.

<sup>14</sup>Tan tatun cua coto ra ndacá ñaha tuhun ihya, cua nyehe maa ndi nácaa cua cahan ndi tsihin ra, tan nyooho ña caca ñni ndo. Nduve náa cua tahan ndo.

<sup>15</sup> Tacan tan quih<sub>in</sub> ra andaru can xuhun can, tan cuahán ra naha cuajavahá ra naha cuhva caty<sub>i</sub> ra naha tsihin ra naha. Tan nda quiv<sub>i</sub> vityin tan tacan caahán nyiv<sub>i</sub> ñuu Israel.

*Nu tava tyiñu ra Jesús tsi ra tsicá tyiñu ra  
(Mr. 16.14-18; Lc. 24.36-49; Jn. 20.19-23)*

<sup>16</sup> Tan tacan, tandih<sub>i</sub> tsa utsi iin ra tsicá tsihin ra, cuahán ra naha nda Galilea nda yucu nu caty<sub>i</sub> maa ra Jesús tsihin ra naha tyin cahun ra naha.

<sup>17</sup> Tan cuhva tsa nyehe ra naha tsi ra Jesús, jacahn<sub>u</sub> ra naha tsi ra, maa tyin juhva ra naha uvi ñi tsicá ñi ra naha.

<sup>18</sup> Tacan tan natuhv<sub>a</sub> ra Jesús nu nyecú ra naha tan caty<sub>i</sub> ra tsihin ra naha:

—Nyoo tsah<sub>a</sub> ra tsa cundaca ñaha yuhu tandih<sub>i</sub> andiv<sub>i</sub> tan nu ñuhu ñayiv<sub>i</sub> ihya.

<sup>19</sup> Yacan cuenda, cuaahan ndo tandih<sub>i</sub> nu iyó nyiv<sub>i</sub>, tandih<sub>i</sub> ñi ñuu, tan caty<sub>i</sub> ndo tsihin ñi na cunyicun ñi tsi yu. Tan jacoondutya ndo tsi ñi tsihin siv<sub>i</sub> Jutu yo Nyoo tan tsihin siv<sub>i</sub> yuhu Sehe ra, tan tsihin siv<sub>i</sub> Taty<sub>i</sub> Ii ra.

<sup>20</sup> Tan jacuaha ndo tsi ñi na tyaa yahvi ñi tandih<sub>i</sub> tsa caty<sub>i</sub> yu tyin javaha ndo. Tan coto ndo tyin yuhu cunyaa yu tsihin ndo tandih<sub>i</sub> quiv<sub>i</sub> nda cuanda naa ñayiv<sub>i</sub> —caty<sub>i</sub> ra Jesucristo tsihin ra tava tyiñu ra.

Tan na cuvi tsi tacan ñi.

**Tuhun tsaá tsa nacoó jutu mañi yo Jesucristo  
tsi yo  
New Testament in Mixtec, San Juan Colorado  
(MX:mjc:Mixtec, San Juan Colorado)**

copyright © 1994 Wycliffe Bible Translators, Inc.

Language: Mixtec, San Juan Colorado

Translation by: Wycliffe Bible Translators, Inc.

Mixteco, San Juan Colorado [mjc], Mexico

**Copyright Information**

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, San Juan Colorado

**© 1994, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

cli

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

c270ec54-172a-541f-83e6-7760f619c744